



a Mayoebung / Joachy  
 vom alten und  
 neuen Christen.  
 1758.  
 Joachy mit  
 Perret / aus  
 1758.

Neue Magdeburger (Zumpin) v. d. H. v. d. H.

reg. HB Nr. 23.

e libri

Regist. boerig. 1811 f. a. con. de nob.  
op. 7, 3,



# Des Durch:

leuchtigen Hochgebornen

Fürsten vñ Herrn / Herrn Johans  
Friderichen des Mittlern / Vertzogen  
zu Sachssen / Landgrauen in Düringen/  
vnd Marggrauen zu Meissen / für sich selbs/  
Vnd von wegen seiner S. G. Brüdere / Herzog  
Johans Willhelmen / vnd Herzog Johans Fri  
derichen des Jüngern zu Sachssen etc. in Got  
tes wort / Prophetischer vñnd Apostolischer  
schriffte / gegründete Consutationes / Widerles  
gungen vnd verdammung etlicher ein zeit her/  
zu wider demselben Gottes wort / vnd heilige  
Schriffte / auch der Augspurgischen Confession  
Apologien / vnd den Schmalkaldischen Artis  
keln / Aber zu förderung vnd wider anrichtung  
des Antichristlichen Papstums eingeschliche  
ten / vnd angerissenen Corruptelen / Secren vñ  
Tzethumen / Wie dieselben vnterschiedlich / vnd  
in Specie / namhafftig angezeigt werden / An  
threr S. G. getrewe Landstende / Vnterthanen  
vnd Verwandten ausgangen / Damit sie sich  
durch Götliche verleihung / dafür zu hüten /  
Auch in Gottes worts / vnd der Christlichen  
Religion Sachen / gemelter Augspurgischen  
Confession / Apologien / vnd den Schmalkal  
dischen Articeln gemes (dabey den ihes

S. G. durch Götliche gnad / bis an  
derselben ende zuuerharren  
willens vñ entschlossen )  
zu halten wissen  
und haben.



Von Gottes Gnaden/ Jo-  
hans Fridrich der Mittler/ Her-  
zog zu Sachssen etc.



PSAL. II.

So lasse euch nu weisen jr Könige/  
Vnd lasse euch züchtigen jr Rich-  
ter auff Erden.

Dienet dem HERRN mit furcht/  
Vnd frewet euch mit zittern etc.

# Von Gottes

Gnaden / Wir Johans  
Friderich der Mittler / Herzog zu  
Sachsen / Landgraff in Thüringen / vnd Marggraff  
zu Meissen

**W**erbieten für vns /  
vnd von wegen der  
Dochgebornē Für-  
sten / Herrn Jo-  
hans Wilhelmen /  
vnd Herrn Jo-  
hans Friderichen  
des Jüngern / auch Hertzogen zu  
Sachsen etc. vnser freundlichen  
lieben Brüder / Allen vnd iglichen  
vnsern vnd irer Liebden / Prelaten /  
Grauen / Herrn / Auch Doctorn /  
Magistern vñ Professorn / irer Lieba-  
den vñ vnser Vniuersitet zu Jhene /  
Desgleichen den Superintendenten /  
Pfarrherrn / Predigern / Daubt  
24 vnd

vnd Amptleuten / denen von der  
Ritterschafft / Schößern / Schul-  
tessen / Kastnein / Gleitsleuten /  
Burgermeistern / Richtern / Rehten  
der Stedte / Schulmeistern / Ges-  
meinden / vnd sonst vnsern vnd irer  
Liebden Vnterthanen vnd Verwan-  
ten / Vnsern Grus / Gnade / vnd als  
les guts zunor.

Ehrrwürdige / Edle / Wolgebora-  
ne / vnd Vebste / lieben Andechtige /  
Rehte vnd Betrewen / Euch vnd  
dem gantzem Dentschenlande ist  
wol bewust / wie der ewige allmech-  
tige Gott aus lauter Barmhertzig-  
keit / gnade vnd güte / sein heiliges /  
ewiges / vnuergengliches / vnd als  
lein seligmachendes Wort vnd E-  
uangelium / in diesen letzten / gefehr-  
lichen vñ sorglichen zeiten / verschie-  
ner Jar / durch seinen Werckzeug /  
den Ehrrwürdigen vnd Hochgelar-  
ten vnsern lieben Andechtigen Ern-  
Martinum Luther / der heiligen  
Schrift Doctor / seligen / der ar-  
gen / bösen / vnd vndanckbarn Welt /  
widera

widerumb gnediglich offenbaret/  
an das Licht vnnnd an tag gege-  
ben vnd komen hat lassen. Welchs  
durch seiner Allmechtigkeit sonder-  
liche Gnade vnnnd schickung/wei-  
land die auch Dochgeborne Für-  
sten / Herr Friderich / Herr Jo-  
hans / vnd Herr Johans Friderich  
Wertzogen zu Sachsen / des heili-  
gen Römischen Reichsertzmar-  
schalhe vnd Churfürsten etc. vnser  
freundliche lieben Vetter / Herr  
Grosuater / vnd gnediger Herr Va-  
ter / seliger vnd Christlicher gedech-  
nis / angenomen / Auch mit hindan-  
setzung vieler bedraulichen / fürste-  
henden / vnd zum teil begegneten  
Gefahr vnd schaden / öffentlich für  
aller Welt / vngeschewet bekand /  
Vnd dabey bis in irer Liebden vnd  
Gnaden Tod / bestendig vnd one  
wancken blieben vnd verharret.

Vnd denn nach genants vnser  
gnedigen lieben Herrn vnd Vatern  
seligen absterben / Wir vnd gemel-  
te vna

A iij

te vna

te vnſere liebe Brüdere / als ſeiner  
Gnaden Erben vnd Söne / durch  
göttliche verleihung in die Fürſt-  
liche Regirunge / ſeiner Gnaden ver-  
laſſen / vnd auff vns vnd iſre Liebden  
geſellten Lande getretten / So ha-  
ben wir vnnnd iſre Liebden / ſonder-  
rhum / durch göttliche Gnade / vn-  
ſern vleis / Fürſtlichen vnd Chriſt-  
lichen Euer / dahin gewand / Vnd  
vns / als das fürnemſte / höchſte vñ  
größte / mit gantzem ernſt obgeles-  
gen ſein laſſen / Wie ſolch Gottes  
geoffenbaret Wort / heilig Euang-  
gelium vnd Chriſtliche Religion /  
nicht allein in vnſern vnd iſrer Lieb-  
den Landen / auch bey den Vnter-  
thanen rein / lauter / klar vnd vnuer-  
ſelcht / in rechtem einfeltigē Chriſt-  
lichen Verſtand / vnvermiſcht / eini-  
ger Tradition vnd Menſchen Leres  
In maſſen ſolchs bey gedachten vn-  
ſern Vettern / Herrn Grosuatern /  
vnd gnedigen Herrn Vatern ſeli-  
gen beſchehen / auch Gott lob / auff  
vns vñ vnſere liebe brüdere komen /  
mit

mit Gottes gnediger Dülff / we-  
ter auch möcht erhalten / vnd auff  
die Nachkommen gebracht / Son-  
dern auch an andern Orten in glei-  
cher weis gepflantz vnd ausgebre-  
tet werden / Vns auch sampt iren  
Liebden / aus tragendem vnd von  
Gott verliehenē Fürstlichem ampt/  
Christlicher Lieb vnd verwandnis  
dazu schuldig vñ verpflichtet erkand.

So sind wir vnd vnser freunds-  
liche liebe Brüde / vermittelt gött-  
licher Verleihung / vorgeantent  
vnsern Vettern / Herrn Grosuatern  
vnd gnedigen Herrn Vatern / in des-  
ren Fusstapffen wir vnd ire Lieb-  
den getretten zu folgen / vnd bey ein-  
mal angenomener erkant vnd be-  
kantar Wahrheit / reinem Gottes  
wort vnd Euangelio / inhalt vnd be-  
sage der zu Augspurg Anno 1530.  
vbergebenen Confession / Apologie  
en / vnd denn zu Schmalkalden An-  
no 37. darauff erfolgten Artikeln  
bis in vnser Grube / nicht weniger  
A iij auch

auch bestendig zu bleiben/entschlossen/  
Der gantzlichen vnd tröstlichen  
zuversicht/ Der barmhertzige trewe  
liebe Gott / den wir auch darumb  
von hertzen bitten wollen/ werde  
vns vnd vnsern lieben Brüdern sol-  
ches gnediglich geben vnd verleis-  
hen.

Wiewol nu zu hoffen gewest/  
Es würde meniglich Gottes wort/  
vnd heilig Euangelium/ mit höch-  
ster Dancksagung/ wie billich/ von  
hertzen angenommen / Sich dessel-  
ben gebessert / vnd sein leben dar-  
nach gericht vnd angestellet haben/  
Auch dabey / als der ewigen vns-  
wandelbarn warheit/welche durch  
manchfeltige herrliche beweisung  
göttlicher Gegenwertigkeit / wir-  
ckung vnd bestetigung bezeuget ist/  
standhaftig verharret sein / So ist  
doch das widerspiel leider am tage/  
Befindet sich auch so viel / Das  
man des lieben Worts fast allent-  
halben vberdrüssig / müd vnd sat  
worden / Daraus denn an stat der  
Danck-

Danckbarkeit gegen Gott / grosse  
vnd endliche Verachtung desselben  
Worts wechffet vnd entsethet / Die  
Gott schwerlich vngestraft wird  
hingehen lassen.

Was auch nach obgenants vna  
fers gnedigen lieben Herrn vnd Va  
ters seligen / von Gott verhengten  
vñ erbermlichen Tiderlage in Gotz  
tes worts / vnd der Christlichen Kes  
ligion Sachen / für ein erschreckli  
cher vnd jemerlicher Fall / vber alle  
zuuersicht vnd vermutung gefol  
get / Vnd das wider Gottes wort /  
allerley Mitteldinge / Bepstische  
vnd vnchristliche Irrthumē / grew  
el vnd Misbreuche / nicht zu gerins  
ger Verfelschung der reinen Lere /  
in die Christlichen Kirchen / Die  
lang zuuor durch Gottes wort / vnd  
das heilige Euangelium / dauon  
gantzlich gereiniget / wider einge  
fürt / vnd auffgerichtet / Solchs  
ist meniglich wol bewusst. So hat  
es auch die Erfarung gnugsam ge  
ben / vnd zeugens zwar noch auff

A v

diesen

Diesen heutigen tag die Schrifften  
im Druck ausgangen / vnd vieler  
gottseligen fromen Christen betrüb-  
te Gewissen / senfftzten vnd verlan-  
gen / Welche hie durch gantz irrig/  
bestürtzt vnnnd zweifelhaftig ge-  
macht / Das sie eigentlich vñ gründ-  
lich nicht wissen / noch sich beschei-  
den mügen / Was sie in Gottes  
worts sachen thun oder lassen sol-  
ten.

Welcher gestalt auch darüber  
mancherley Secten / Kotten vnnnd  
Schwermereien itzt wider herfür  
brechen / Auch sich von newem / zu  
wider Gottes Wort vnd dem heili-  
gen Euangelio / sonder zweifel /  
aus seiner Allmechtigkeit rechtem  
Zorn vnd verhengnis vmb vnser  
aller Sünden willen / zutragen vnd  
ereugen / Auch mit Gewalt / list vnd  
betrug verteidigt werden / Ist  
gantz vnuerborgen.

Vnd ob wir vns wol verses-  
hen solche Secten vnd Irrthumen/  
soltten bey dieser reinen lere / vnd hel-  
lena

tem Liecht göttlichs Worts / von  
sich selbs wider gefallen vnd auff  
gehört haben / Auch die Lerer / An  
henger vnd Förderer derselben / wie  
billich / Gott seinem Wort vnd Eu  
angelio / die ehre gegeben / Sicher  
kant / davon gentslich abgelassen  
haben / vnd endlich wider zu recht  
komen sein / So erscheinet doch aus  
tegllicher erfahrung / Das dieselben  
Secten vnd Irrthumen / von jnen  
für recht vnd Christlich gehalten /  
gelert vnd verteidigt / Auch durch  
den Druck je lenger je mehr hin vnd  
wider ausgebreitet / Damit denn  
vieler einfeltiger Christen hertzen  
angezündet vnd beschmeißt wer  
den.

Welchs billich allen Christa  
lichen / vnd Gottes Worts liebend  
den Oberkeiten / zu hertzen vnd ges  
müte gehen / Auch dahin getrach  
tet werden solt / Wie denselben Sec  
ten vnd Irrthumen / die allein zu  
Verdrückung vnd verfeschung Got  
tes worts / vñ der reinen Lere gents  
lich

lich vnd endlich gemeint vnd gericht  
tet sind / vermittelst verleihung sei-  
ner Allmechtigkeit / durch gebür-  
liche Mittel vnd wege / möchte ge-  
stewret / gewehret / vnd Gottes  
wort vnd die reine Lere des Euang-  
gelij / von diesen vnd allen andern  
Irrthumen / vnd Verfelschungen  
errettet vnd erhalten werden.

Wie es aber in diesen hochwichti-  
gen Sachen / die nicht das zeit-  
liche / sondern das ewige betreffen /  
bis anher gegangen / vnd noch ge-  
het / ist offenbar vnd wissentlich.  
Gleichwol aber feiret der Feind vnd  
Satan / seiner art nach / darunter  
nicht / durch die seinen jmer fort zu  
faren / was zu Verfelschung / ver-  
tunckelung vnd gantzlicher Aus-  
reutung Gottes worts vnd der rei-  
nen Lere gereichen mag.

Vnd wiewol ( vnserm lieben  
Gott sey lob vnd danck ) vnser vnd  
vnser lieben Brüder Lande vñ Für-  
stenthum bis anher / mit solchen  
vnd

vnd dergleichen Irthumben vnd  
Verfälschungen in gemein gantzlich  
vnbefleckt / Sondern bey Gottes  
wort/vnd dem Euangelio rein/laute  
ter vnd klar / einhelliglich blieben  
vnderhalten worden vñ noch sind/  
Des Allmechtigkeit wölle h n für  
der mit Gnaden weiter auch verleis  
hen. So haben wir doch betrach  
tet / da solchem allem lenger zuge  
sehen / Vñnd dazu ferner stille ge  
schwiegen solt werden / Das dar  
aus endlich anders nichts / denn  
gantzlicher Vntergang vnd Verlies  
rung Gottes Worts/vnd der reinen  
vnuerselchten Lere des heiligen E  
uangelij / Dazu allerley schendliche  
Ergernis (dafür doch der allmech  
tig Gott / vmb seines lieben Son  
nsers D Ern/einigen Erlösers v i  
Seligmachers Ihesu Christi wol  
len gnediglich vñnd veterlich sein  
wölle) gewislich folgen / vnd w i  
ter einreissen würde / Vnd darumb  
diesem hochschedlichē Vnrat durch  
Gottes hüff zu begegnen / seiner  
Allmech

Allmechtigkeit zu Lob vnd ehre/ zu  
erhaltung/ pflantzung vñ mehrung  
seines ewigen Worts vnd heiligen  
Euangelij/ Auch zu trost vnd erret-  
tung vieler irriger/ zweifelhafftis-  
ger/ versürter vnd beschwerter Ge-  
wissen fürgenommen/ vns mit etlich-  
en vnsern fürnemen Theologen/ in  
statlicher anzal persönlich/ hie von  
allenthalben notdürfftig zu vnter-  
reden/ zu tractiren vnd zu handeln.

Vnd darauff auch nach zeit-  
lichem vorgehabten Christlichem  
Rath/ Bedencken/ vnd Erwegun-  
gen auff solche Secten vnd Irrthu-  
men/ vnterschiedliche/ Christliche/  
vnd in Gottes wort Prophetischer  
vnd Apostolischer Schrift gegrün-  
dete *confutations* vnd Widerlegung/  
durch sie/ mit hindansetzung aller  
privat Affect/ Hasses vnd Ehrgeiz-  
tes/ auch anderer Personen gunst  
vnd ansehen/ zusammen ziehen/ stellen  
vnd verfertigen lassen. Wie solchs  
alles in folgendem Druck klerlich  
vnd ausdrücklich zu befinden.

Regia

Register oder Verzeichniß  
aller Irrthum / so in sonderheit /  
vnd nach einander in dieser Con-  
futation widerlegt sind.

- I. Widerlegung des Irrthums  
Serueti. fol. 1. a.
- II. Widerlegung des Irrthums  
Schwenckfels. fol. 7. b.
- III. Widerlegung des Irrthums  
der Antinomer. fol. 26. b.
- IIII. Widerlegung des Irrthums  
der Widerteuffer. fol. 39. b.
- V. Widerlegung des Irrthums  
der Sacramentirer. fol. 42. b.
- VI. Widerlegung des Irrthums  
vom freien willen. fol. 74. b.
- VII. Widerlegung der Irrthum  
Psiandri vnd Stanckari. fol.  
85. b.
- VIII. Widerlegung des Irrthums  
D. Maioris. fol. 95. b.
- IX. Widerlegung des Irrthums  
der Adiaphoristen. fol. 109. a.

Reichlich über Verordnungen  
 und in demselben alle  
 und nach demselben in demselben  
 fahen verordnet sind.

- i. Verordnungen des Reichs  
fol. 1. a.
- ii. Verordnungen des Reichs  
fol. 7. b.
- iii. Verordnungen des Reichs  
fol. 2. d.
- iiii. Verordnungen des Reichs  
fol. 2. d.
- v. Verordnungen des Reichs  
fol. 4. b.
- vi. Verordnungen des Reichs  
fol. 4. b.
- vii. Verordnungen des Reichs  
fol. 1. a.
- viii. Verordnungen des Reichs  
fol. 2. d.
- ix. Verordnungen des Reichs  
fol. 1. a.

in  
 sp  
 D  
 vi  
 st  
 vi  
 an  
 se  
 so  
 ge  
 an



# Widerlegung des Irrthums Cerueti.



S haben zwar vor  
langst vnd allzeit sich  
seer vnd vnzelich viel  
Ketzerien vnd Gott-  
loser Irrthum allent-  
halben erhaben / Da  
stoltze vnd vngchalte-  
ne Köpffe / sich vnterstanden / auff's  
spitzsündigst zu erkunden vnd erfaren/  
Was / vnd wer Gott sey / Jedoch / wie  
viel jr jemals gewesen / vnd noch ent-  
stehen können oder mügen / So lenden  
vñ ziehen sie sich doch alle furnemlich  
auff einerley Ziel / Das sie aus vermes-  
senheit menschlicher Vernunft / durch  
solche erforschung / entweder an der  
göttlichen Maifestet vnd wesen / Oder  
an dem göttlichen Willen anlauffen.

B            Welche

## Widerlegung des

Welche zwar alle zu gleich / alt vnd  
new / in diesen beiden vnterscheiden  
sind / vnd eigentlich von jedermennig-  
lich können erkennet werden.

Zum ersten hauffen / von denen /  
so wider das göttliche Wesen streiten /  
gehört Seruetus / Der zu dieser itziger  
zeit / vnter so viel andern Schwärmern  
vnd Ketzern / sich allein vnterstanden /  
vnd mit seinen Lesterschriften / diesen  
Artikel vom göttlichen Wesen / ange-  
griffen vnd angefallen hat / Vnd die  
veralteten Lestierungen vnd Irrthum  
Samosatani / Photini / vnd anderer  
alten Ketzer / widerumb ernewart vnd  
herfür bracht / Vnd darff trötzlich vnd  
freuenlich sagen / das das Wort (da-  
non im Euangelio Johannis Cap. i.)  
nicht vom Son Gottes / Als von ei-  
ner vnterschiedlichen Person / von des  
Vaters Person / selbstendig / die da an  
jr selbs Lebendig / Verstendig / vnd vol  
komen / Sondern sey allein des Va-  
ters Gedancken / Raht / Bedencken  
oder

oder fürsatz / Vnd nicht anders / denn  
wie ein Dall oder verschwindlicher  
vnd vergenglicher laut einer Stim / so  
von jr selbsts sich im reden in der Luffte  
verliere / geredet vnd verstanden werde.

Dieser erschrecklicher Irrthum  
mus one allen zweifel gewislich fol-  
gen / Wo man das erkenntnis / so in der  
heiligen Schrifft / von der heiligen  
Dreifaltigkeit / das ist / von den drey  
vnterschiedenē Personen des göttlich-  
en Wesens / zeuget / fallen leßt / vnd  
sich allein blos on alle Schrifft hen-  
get / an das Erkenntnis / von dem ein-  
gen göttlichen Wesen / Denn ob wol  
das Euangelium offentlich leret / von  
dreiē vnterschiedlichen Personen des  
Göttlichen Wesens / Jedoch kan die  
Vernunfft das viel besser begreiffen  
vnd fassen / Das / wie Gott nur einer-  
ley vnd nicht dreierley sein künde / Als  
so auch derselb nur eine / vnnnd nicht  
drey Personen sein müsse / Vnd stercket  
Wij solche

## Widerlegung des

solche der vernunfft gedanken / Sonderlich des Gesetzes ernstes Gebot / vnd strackte Befehl / die on vnterlas treiben vnd befelhen / Das man allein einen einigen Gott sol anbeten / anruffen vnd ehren. Aus solchem der Vernunfft fast scheinlichem vnd allen menschlichē gedanken begreiffllichem Grund / haben Samosatenus vnd Seruetus / sampt Türcken vnd Jüden mit geschwindem vnd grossen trot / sich auch vnterstanden / den vnterscheid der Personen / des göttlichen Wesens / beide zu leugnen vnd zuerspotten / Also / das sie es für die höchste Abgötterey anruffen / Das wir aus dem heiligen Euangelio in vnserm Glauben bekennen vñ leren / Das Christus vnd der heilige Geist / sey ein vnzertrenlicher ewiger Gott / eines einigen göttlichen wesens / mit dem Vater / vñ doch in dreien vnterschiedlichen Personen / So doch (wie gesagt) das Gesetz allein einen Gott anzubeten /

ten/vnd demselben allein zu dienen be-  
 sitht. Deut. 6. Höre Israel/der Herr  
 vnser Gott/ist ein einiger HERR.

Das ist aber in keinem wege des  
 Gesetzes Meinung / oder Verstand /  
 Das / dieweil es zeuget von einem ei-  
 nigen göttlichen Wesen/eines einigen  
 vnzertrenlichen Gottes / Also damit  
 auffhebe den Vnterscheid der Perso-  
 nen / solcher göttlichen einigen Na-  
 ieset / Sondern die Lere / das nur ein  
 einiger Gott sey / macht rechten vnter-  
 schied / zwischen Gott vnd den Crea-  
 ture / Vnd stößet zu bodē / den Grewel  
 der Heiden / vnd aller deren / die nicht  
 allein die Creaturen für Götter geeh-  
 ret vnd angeruffen / Sondern zu allen  
 Sachen / Dendeln / Arbeit / Glück vna-  
 glück etc. vnzelich viel Götter ertichtet  
 haben / Welche doch alle nur eitel Er-  
 schaffene / vnd lauter vergengliche Cre-  
 aturn / Oder anch wol vergebliche er-  
 tichte Wahngötzen sind / Vnd ist nicht  
 damit gemeinet / die Dreifeltigkeit der

B ij

Persoa

## Widerlegung des

Personen / in vnzertrenlichem einigen göttlichen Wesen / zu verneinen. Das her auch / das Gott anzeigete / dz noch ein herrlicher Offenbarung vom göttlichen wesen vñ willen folgen sollte / so verbies er / Deut. 18. einen andern Propheten zu erwecken / Welchen man für allen dingen hören / vnd jm folgen sollte.

Derhalben ist zum höchsten von nöthen / Das wider diesen Missuerstand / aus dem Gesetz gezogen / von dem einigen göttlichen Wesen / die einfeltigen Hertzen / aus gründlichem Zeugnis der vnuerfälschten waren heiligen Schrift / wol versichert vnd gegründet werden / Darinnen sie klerlich sehen mügen / wie sich Gott selbs in seinem Wort offenbaret / vnd jederman solchen vnterscheid der Personen / des Vaters / des Sons / vnd des heiligen Geistes / klerlich vnd ausdrücklich / predigen vnd verkündigen leset zc. Davon denn dieses ein gewaltiger vnd treff-

trefflicher Spruch ist/ im ersten Buch  
 Mose/ am 1. Cap. Da Moses also zeu-  
 get / Das bald im anfang / da Gott  
 den Menschen hat schaffen wollen /  
 sey er gleich selbs zu rath ggangen / vnd  
 bedacht ( menschlicher Weise also zu  
 reden ) Nach wem er doch denselben  
 Menschen schaffen vnd bilden wolte/  
 Vnd endlich solche Schepffung / sei-  
 nem selbs Bilde ehnlich nach / mach-  
 en wollen / Vnd gesagt / Lasset vns  
 Menschen machen / ein Bilde / das  
 Vns gleich sey.

Hiemit zeuget Moses klar / aus  
 Gottes eigenen Worten / Mund vnd  
 werck / Das er ein einiger Vater / vnzer-  
 trenlicher Gott vnd Schepfffer / vnd  
 doch in vnterschiedlichen Personen /  
 ein Gott sey / der da gesagt / Lasset vns  
 Menschen machen. Auff solche wei-  
 se zeuget mit Mose auch S. Johan-  
 nes in der Predigt seines 1. Cap. vom  
 Wort / Das es ewig vnd warer Gott  
 B iij sey/

## Widerlegung des

sey / vnd spricht. Im anfang war das  
Wort / vnd das Wort war bey Gott /  
vnd Gott war das Wort. Darnach  
leret er / wie dis Wort / so ewiger Gott  
ist / sich habe auff zweierley weise of-  
fenbaret / Vnd zu erkennen geben.  
Erstlich / als der zu gleich mit dem Va-  
ter anfanglich alle ding geschaffen  
habe / Alle ding sind durch dassel-  
big (Wort) gemacht etc. Vnd on das  
selb ist nichts gemacht / was gemacht  
ist. Item / Vnd die Welt ist durch das-  
selbige gemacht. Zum andern / Dat  
er sich offenbart / als der Heiland vnd  
Erlöser der gantzen Welt / durch die  
Menschwerdung / da er spricht / Vnd  
das Wort ward fleisch. Diese rede alle  
vom Wort / können so eigentlich nicht  
verstanden werdē / von einem vergeng-  
lichen Wort / Das / so bald es von je-  
mand aus dem Mund geredt wird / im  
laut / zu gleich verschwindet vnd auff-  
höret /

höret / Auch nicht von einem solchen  
vergenglichen gedancken / den jemand  
bey sich selbs gedencket / Welche ver-  
gengliche Wort oder Gedancken / je  
nicht können ein Schepffer werden /  
Viel weniger etwas oder alle ding /  
vnd die Welt machen. Darumb müs-  
sen / sollen vnd können sie auch nicht  
anders verstanden werden / denn von  
einer gleichwesenden göttlichen vnd  
doch vnterschiedenen Person / Die mit  
dem Vater / vnd dem heiligen Geist  
alle ding geschaffen hat.

Mit diesem schönen Zeugnis Jo-  
hannis / stimmt der heilige Prophet  
Michas im 5. Cap. da er also spricht /  
Vnd du Bethlehem Ephrata / die du  
klein bist / gegen den Tausenten in Ju-  
da / Aus dir sol komen / der in Israel  
HERR sey / Welchs Ausgang von  
anfang vnd von Ewigkeit gewesen ist.  
In dieser Weissagung leret der Pro-  
phet von zweierley Ankunfft Christi /

B v      Lii

## Widerlegung des

Einer zeitlichen aus Bethlehem / vnd  
einer ewigen / Welcher anfang von  
Ewigkeit gewesen ist. Darumb auch  
S. Paul 1. Tim. 3. gewaltig spricht /  
Kündlich gros ist das Gottselige Ge-  
heimnis / Gott ist offenbaret im  
Fleisch / Gerechtfertiget im Geist / Er-  
schienen den Engeln / Geprediget den  
Heiden / Begleubet von der Welt /  
Auffgenommen in der Herrlichkeit.

Dieher gehören auch alle diese  
spruch / in der gantzen heilige schrift /  
Die den NERN Christum / Gottes  
eingebornen Sonnenennen / vnd in da-  
mit vnterscheiden / von allen andern  
Kindern Gottes / Die er im zur Kind-  
schafft / nach seiner Barmhertzigkeit  
beruffet vnd erwehlet / Vnd sonder-  
lich auch diese Sprüche / die da be-  
selben / Das man Christum / als den  
Allmechtigen Weiland vnd Selig-  
macher / sol anruffen vñ anbeten / Wie  
im

im 2. Psal. Küßet den Son / das er  
nicht zürne. Vnd aber / Wol allen / die  
auff in trawen. Itē / auch diese sprüch /  
so von seiner allmechtigen Gegenwer-  
tigkeit vnd wunderbaren vielfeltigen  
Erlösungen zeugen / Damit er seine  
Kirchen teglich errettet / beschützet /  
vnd erlöset.

Von solchem seinem Schutz / für  
die Kirchen / zeuget S. Paulus offent-  
lich 1. Cor. 10. Das der ware Gott / der  
das Volck Israel / vnter der Wolcken  
aus Egypten durchs Meer gefüret /  
sey derselbe **DEUS** Christus. Item /  
er saget / Man solle Christum nicht ver-  
suchen / wie in das Volck Israel ver-  
sucht hat / Vnd sind alle derwegen von  
den Schlangen umbbracht worden.

Solchen Artikel des Glaubens  
von Christo / haben auch die alten Väter  
/ vnd anfengliche Kirche / von den  
lieben Aposteln her / also gepflantzet /  
bezeuget / Vnd auff jre Nachkommen  
geleret. Als der Eltesten einer / Ire-  
neus /

## Widerlegung des

nens / Polycarpi Jünger (Welcher Polycarpus S. Johannis jünger gewesen / vnd von im solche Lere empfangen vnd gelernet hat ) saget mit seer tröstlichen Worten / Das das Wort (λόγος uel Verbum) Christus sey allzeit beharrlich bey seiner Kirchen blieben / vnd hernach ein warer Natürlicher Mensch worden. Es schreibet auch Eusebins lib. 7. Das dieser lesterlicher Irrthum / wider die göttliche Herrlichkeit Christi / sey im Concilio zu Antiochia / mit grossen ernst verdampt vn̄ verworffen / vnter dem Keiser Aureliano / lange zeit / vor dem Concilio zu Nicen / In welchem hernach auch derhalben der Ketzer Arius verdampt worden ist.

Derwegen sol man sich in dem hohen Artikel von der göttlichen Maiestat vnd irem Wesen / Ja wol vnd fleissig fürsehen / fürsichtig zu halten vnd handeln / Das man nicht durch der törichtten Vernunfft kluges forschen /  
nach

nach der Maiestet / vnfers Herrn Got-  
tes gar feite / Wie Salomon sagt /  
Die erforscher vnd erkünder der Ma-  
iestet werden zu schanden. Welchs den  
eigentlich in denen zweien eussersten  
zielen / allen Klüglingen gewislich  
widerfaren / Das sie entweder zu  
niderig oder zu hoch faren / Als diese  
faren zu niderig / vnd können solchen  
Artikel nicht erreichen / Seruetus / die  
Türcken vnd Jüden / Dieweil sie dar-  
umb / das nur ein einiger warer Gott  
ist / die vnterscheid der göttlichen Perso-  
nen verwerffen / vñ in solchem man-  
gel / den waren Gott gar zu gleich vera-  
lieren. Die andern verlieren den war-  
ren Gott damit / das / dieweil das  
göttliche Wesen / sich hat offenbaret /  
in drey vnterschiedlichen Personen / sie  
auch mehr Götter machen / wie die  
Valentiniani vnd Deiden / inen viel  
mehr vnd mancherley Götter erticha-  
tet vnd getreumet haben.

Darumb sollen die fromen einfelt-  
tigen

## Widerlegung des

tigen Christen/damit sie in diesem Artitel/im nicht zu viel/ noch zu wenig thun/auff der rechten Bahn der heiligen Schrift/Auch der ersten Kirchen/vnd Augspurgischen Confession bleiben/vnd dagegen diese vnd der gleichen Ketzerey meiden. Welche Schrift/Kirche/vnd Augspurgische Confession vns leren/das nur ein einziger ewiger warer Gott/eines göttlichen Wesens/gleicher allmechtiger Gewalt/vnd doch in dreien Personen/vnterschiedlich ist/nemlich/der Vater/Son/vñ heiliger Geist. Dem sey Lob/Ehr vnd preis/von Ewigkeit zu ewigkeit/Amen.

## II.

# Widerlegung des Irthums Schwenc- feldts.

Nach



Ach dem wir Seruetti  
 Irrthum/als der dem  
 Artikel vnsers Glaubens vom göttlichem  
 Wesen/vnd Gottheit  
 Christi/anfichtet/wia  
 derleget habē/wollen  
 wir folgendts auch die andere für die  
 Dand nemen / Die fürnemlich alle  
 sampt sich vnterziehen / den göttlichen  
 en geoffenbarten Willen vnd werck  
 anzugreifen/vnter welche Schwere  
 felt billich / als der fürnemeß / dem  
 vorzug behelt. Sintemal die andern  
 alle/nur einzele/etliche wenig Artikel  
 vnd Stück/vnserer Christlichen Lere  
 angreifen / Dieser aber allein / darff  
 sich trötzlich vnd frenelich anmassen/  
 die Deubtartikel vnd gantze Christa  
 liche Lere / zu gleich in einem hauffen/  
 feindselig anzufallen / Vnd wil er  
 halten / Das es gentzlich nicht Got  
 tes wille vnd befehl sey / das Er vns  
 durch die Predigt vnd vbung des heil  
 igen Göttlichen Worts / Prophea

## Widerlegung des

tischer vnd Apostolischer Schrifft /  
durch den heiligen Geist erleuchte/be-  
kere/vnd samle/ Vnd das ist auch vn-  
ter allen der furnemeste / tückische vnd  
hemische alte Griff des Teufels / Da-  
mit er trachtet vnd suchet / wie er vns  
von der rechten einigen vnd von Gott  
geordneten strassen vnd Bahn/wil ab-  
füren / vnd auff Irrwege endlich be-  
seits bringen/vnd in ewiges verderben  
abstürtzen.

Denn nach dem der tückische arg-  
listige Teufel erfahren hat / wie zu diesen  
zeiten aus sonderlicher Gnade vnd  
Barmhertzigkeit Gottes / durch den  
trewen vnd vleissigen Arbeiter vnd  
Man Gottes Lutherum / Das liebe  
Wort vnd Predigampt / von den greu-  
lichen Papistischen Irrthumen / Men-  
schen sätzen / vnd gottlosen Wei-  
ligendienst / welche fast in eitel euf-  
ferlichen dingen / als in umbstenden  
der örter / stedte / zeit / essen vñ trincken /  
in Kleidern vnd geweihten dingen / in  
zeichen

zeichen vnd geberden / vnd dergleichen  
 narrenwercken gestanden ist / dazu vn-  
 zelich vieler fromen Menschen heil vnd  
 Seligkeit / ist widerumb zu recht / vnd  
 nach Christi ordnung vnd befehl an-  
 gestalt worden / hat er diesen trotzigen  
 Schwencckfelt erregt vnd getrieben /  
 Das er sich Luthero hierüber wider-  
 setzet / vnd die tolle Welt dahin brecht-  
 te / das sie von Keinen eusserlichen Mit-  
 teln oder Gottesdiensten ( als da sein /  
 das eusserliche mündliche Wort vnd  
 Lere / Sacrament / vnd dergleichen )  
 nichts halte / sie seien gleich von Moses  
 vñ Propheten / oder von Christo selbs  
 geordnet vñnd eingesetzt / Sondern  
 Gott vnd die ewige Seligkeit / solten  
 in lautern heimlichen offenbarungen /  
 Ja trewmen vnd gespensten des leidli-  
 gen Satans / ausser dem mündlichen  
 Wort / vnd also die blosser vnerforsch-  
 liche vñ unbegreifliche Maifestet Got-  
 tes gesucht vñnd erforschet werden /  
 nicht anders / denn wie vorzeiten die  
 heid-

E

## Widerlegung des

Heidnischen Pfaffen / so durch des Teufels einblasen / wie die vnfinnigen / zu künfftige ding ertrewmet / vnd ausgeben habē. Also spielet auch Schwenckfelt itziger zeit / mit der armen Leute höchsten Trost vnd Seligkeit / vnd ertichtet ein besonder Strasse vnd Leiterlin / darauff der Affensteiger / die vnuerstendigen wil bereden / in Dime / in die vnerforschliche Geheimnis der göttlichen Maiestet zu klettern vnd steigen / Vnd füret hiemit die einfeltigen Leute von dem rechten Liecht (das vns Gott selbs hat zu einer Fackel vnser füsse angezündet / Vnd damit aus den tieffen Finsternissen des leidigen Papssts erlediget ) widerumb durch seine stinckende bittere Rauchbrende / in noch viel tüstere vn eusserste finsternis. Damit wir durch erkündigung der vnerforschlichen Geheimnis / Ja auch zu gleich den geoffenbarten willen Gottes verlieren / vnd nimmermehr zur rechten Wahrheit / Liecht vnd Erkenntnis

kenntnis komen mügen / Sondern in  
solchem finsternis / Nacht für tag / Lügen  
für Wahrheit halten vnd hören  
müssen.

Es ist aber des Schwencckfelts  
Schwermerey so viel desto schedlicher  
weil aller Menschen hertzen / zu erfors-  
chung heimlicher vnd hoher dinge be-  
gierig vnd geneigt sind. Denn also helt  
aller Menschen weise / das sie von Na-  
tur hochzufaren geneigter vnd fürwitziger  
sind / inen selbs in irer Weisheit  
wol gefallen zu haben / Vnd gefelt vns  
sonderlich wol / was wir on das wort  
frey aus eigener witz von vns selbs /  
von Gott scharffs sinnen vnd dencken  
können / Vnd sind gar vngedultig  
vnd vnwillig / das vns Gott so gar  
wil allein in sein Wort / als wie in ei-  
nem gefengnis / oder Thurm / versper-  
ret / vnd verpflockt haben / Wie denn  
solche der Klugen Welt hohe weisheit  
wider die liebe Predigt der Apostel vñ  
Diener Gottes im 2. Psalm / gar artig  
C ij abge-

## Widerlegung des

abgemalet ist / vnd der Pocher scharren / toben vnd freuel / gar wol dargeben / Lasset vns (sagen sie) jre bande zu reissen / vnd jr Joch von vns werffen.

Zu solchem vnnütigen Widerwillen / wider die Predigt vnd vnnötiges forschen / des vnbegreiflichen willens Gottes / bringen alle Menschen unsere erste Eltern / welche im Paradis / so bald im anfang sich liessen den leidigen Satan / mit seinen listigen vnd geschwindē schmeichelligen / oberreden / frey vom offenen Wort vnd furge-setzten Zeichen / So jnen Gott am verbotenen Baum gesetzt / abfüren / vnd verhofften noch zu höherm vnnnd mehrerem Verstande vnd erkentnis zu kommen / wie die Schlange sagt / Gott weis / das welches tages jr dauon esset / So werden ewre Augen auffgethan / vnd werdet sein wie Gott / vnd wissen was gut vnd böse ist. Diese empfangene

pfangene Gifft / aus lauter des Teufels  
 geschafft; vñ Lügenmörderischem  
 beibringen / erbet vnd naturet sich an/  
 von den ersten gefallen Eltern / auff alle  
 Nachkommen vnd Erben / Also das  
 wir alle / aus angenaturter dürfftig-  
 keit grosse neigung vnd begierde ha-  
 ben / wider das geordnete Wort Got-  
 tes / zu solcher fantastischer Schwenc-  
 feltischer vnd fleischgeistlicher Theo-  
 logia. Vnd ist gar kein zweifel / Das /  
 wie dieser Irrthum so bald im anfang  
 der Welt / der erste ist gewesen / Das  
 durch der Mensch (wie gesagt) vom  
 fürgestellten Wort / von Gott ist ab-  
 gefallen / er also itzund auch durch  
 Schwencckelt / widerumb zum Bes-  
 schlus / zu vntergang der vndanckba-  
 ren Welt / vom Teufel herfür bracht  
 wird. Denn es mit der Welt vndanck-  
 barkeit eigentlich auch noch dahin ko-  
 men wird / Das man das liebe Wort  
 gering vnd verechtlicher / denn ein Fä-  
 bel vnd Merlin / halten wird / nach der

## Widerlegung des

weissagung S. Pauli / aus dem heiligen Geist / 2. Timo. 4. Das in den letzten zeiten werden etliche von dem Glauben abtreten / vnd anhangen den verfürischen Geistern.

Derhalben ist Schwenckfelts Irrthum vnd Schwermerey / vor andern / wol einer starcken Widerlegung werth / Als der mit seiner Lesteringe die gantze Neubtsache Christlicher Lere vnd Göttlicher Weisheit angreiff / das sie billich für ein grundsuppen vnd strom aller Irrthum sol gehalten werden. Denn im Nachtmal des D. Ern / helt ers fast zugleich mit den Zwinglianern / in der Lere von der Rechtfertigung / leret er zum teil wie Dsiander / zum teil wie die Papisten / Denn er schmeltzt die göttliche wesentliche Gerechtigkeit mit vnser Ernewerunge / vnd eigenem Gehorsam zusammen / vnd macht vnd genckelt eine besondere Gerechtigkeit daraus.  
Wir

Wir wollen aber zu diesem mal nicht alle seine Irthum/die er hin vnd wider in seinen Schrifften herfür bringet/handeln/Sondern allein diese widerlegen/Die er für sich besonders für andern/wider das geschriebene Wort vnd mündlich Predigamt zu erhalten vermeinet. Derselben sind die fürnemsten diese drey.

Der erste Heubtirrthum  
Schwencckfelts.

**I**st/das er sagt/Das die heilige Schrift(so man die Bibel nennet) sey nicht eigentlich vnd gründlich zureden Gottes ware wort/Sondern/es heisse wol Gottes wort/Aber nicht in rechtem/Sondern in einem frembden verstande/vnd anderer deutung/Als wenn man ein Zeichen/damit etwas anders bedeutet vnd gemeinet wird/für dasselbig also verstehet/vnd achtet/als were es dasselb/

## Widerlegung des

So doch nur damit bedeutet wird.  
Diese seine meinung findet man also  
in seinen Büchern von der heiligen  
Schrift / im Capitel / Von dem vnters  
scheid der heiligen Schrift / vnd dem  
Wort Gottes / am 27. vnd 28. blat /  
Vnd im Buch / Vom Wort Gottes.

Die vrsach dieses Irrthums nimpt  
Schwenckfelt aus dem 1. Cap. Jo-  
hannis / Da der Son Gottes Ihesus  
Christus / wird das wesentliche Wort  
des Vaters genennet / der gleiches gött-  
lichen Wesens mit dem Vater ist / von  
Im in Ewigkeit geboren / Daraus  
schleust Schwenckfelt also / Dieweil  
Christus ist allein das Wesentliche  
Wort Gottes / So kan vnd mus sonst  
kein ander Wort / Gottes Wort sein /  
so man anders eigentlich reden wil.  
Wer sibet nu hie nicht / welcher eines  
rechten verstands ist / die Gottlose vnd  
lesterliche meinung Schwenckfelts.  
Denn ob gleich kein Gottseliger vnd  
rechts

rechtglaubiger Mensch zweinelt / oder  
 ja zweineln sol / das der Son Gottes /  
 oder die ander Person / das Wort ge-  
 nennet wird / wie denn Joha. 1. vnd 1.  
 Johan. 1. vnd in andern etlichen orten  
 zu sehen ist / Welchs namens vrsprung  
 vnd eigenschafft wir alhie nicht wöl-  
 len tieffer forschen (wiewol vns nicht  
 unbewusst ist / das die Veter vnd Scri-  
 benten desselbigen mancherley vrsach-  
 en zuerzelen pflegen) noch gleichwol  
 iſts gewis / das die himelische Lere in  
 göttlicher Schrift begriffen / war-  
 hafftiglich vnd eigentlich genennet  
 wird / vnd ist auch Gottes Wort.

Daher nennet auch die Schrift  
 alle die Lere / so Gott durch die Pro-  
 pheten vnd Aposteln zu predigen be-  
 folhen / vñ geboten hat / Gottes wort /  
 Als 1. Samue. 15. Da Gott zu Sa-  
 muel spricht / Es rewet mich / Das  
 ich Saul zum Könige gemacht hab /  
 Denn er hat sich hinder mir abge-

S v wand /

## Widerlegung des

wand/ vnd mein Wort nicht erfüllet.  
Vnd hernach / Da Samuel den Kö-  
nig Saul straffet / spricht er / Weil du  
nudes **HERREN** Wort verworffen  
hast / Hat er dich auch verworffen /  
Das du nicht König seiest. Item / Ich  
wil nicht mit dir ombkeren / Denn du  
hast des **HERREN** Wort verwor-  
ffen / vnd der **HERRE** hat dich auch  
verworffen. So m der befelß Gottes  
zu Saul / Das er den Malekiter solt  
schlahen vnd vertilgen / Gottes wort  
ist / Welchs doch nicht kan von Chri-  
sto dem ewigen göttlichen wesentli-  
chen Wort verstanden werden / So  
mus je alle Predigt vnd befelß / von  
Gott an geschafft / auch Gottes wort  
sein. Item / Deut. 2. 4. 5. 6. vnd 11. nen-  
net Moses das Gesetz vnd zehen Ge-  
bot / das Wort des **HERREN** / das  
damals in steinern Tafeln von Gott  
selbst geschrieben / vnd hernach ge-  
hent /

beut / Das man von dem selben sol  
 denckmal machen / an Denden / Klei-  
 dern / Thürpfosten etc. Also nennen  
 auch die Propheten / jr Predigten vnd  
 Weissagungen / Gottes Wort / das  
 sie mit diesem Titel vnd Namen / wi-  
 der solche Schwencckeltische verecht-  
 liche Lessigkeit / vnd vberdrus ire zu-  
 hörer / vnd meiniglich munter / fleissig  
 vnd dem Wort zu gehorsamen willig  
 machen / vnd widerholen oft diese re-  
 de / Höret das Wort des **HEXXI**.  
 Item / So spricht der **HEXX**. Item  
 Isa. 58. Denn des **HEXXI** Mund  
 sagts. Vnd Jere. 29. da er viel straffen  
 erzelet / Die er vber das vngehorsam  
 Volk wil bringen / setzt er die vrsach  
 dazu / vnd spricht / Darumb (wil ich  
 diese Plagen vber sie schicken ) Das  
 sie meinen Worten nicht gehorchen /  
 spricht der **HEXX** / der ich meine  
 Knechte die Propheten zu euch stets  
 gesand hab / Aber jr wolt nicht hören /  
 spricht der **HEXX**. Die

## Widerlegung des

Diese vnd alle dergleichen Sprüche  
können mit gutem grund nicht ange-  
fochten / noch mit dieser Schwenck-  
feltischen Deutunge / als würde eins  
für das ander genommen vnd verstan-  
den / getaddelt werden. Den also sagt  
auch S. Paulus / 1. Thessa. 2. Dar-  
umb auch wir on vnterlas Gott dan-  
cken / das jr / da jr empfienget von vns  
das Wort göttlicher Predigt / namet  
jrs auff / nicht als Menschen Wort /  
Sondern (wie es denn warhafftig ist)  
als Gottes wort / Welcher auch wir  
cket in euch / die jr gleubet. Diemit zeu-  
get der Apostel / das sein Euangeli-  
um / warhafftig sey Gottes Wort / on  
einige Deutung vnd andern verstand.  
Also rhümet auch S. Petrus / 2. Pet.  
1. der heiligen Propheten vnd Apo-  
stel Predigt / vnd spricht / Wir haben  
ein fest Prophetisch Wort / vnd jr thut  
wol / das jr drauff achtet / als auff  
ein

ein Liecht / das da scheint in einem  
 tuncckeln ort / bis der tag anbreche / vñ  
 der Morgenstern auffgehe in ewren  
 hertzen / Vnd das solt jr für das erste  
 wissen / Das keine Weissagung in der  
 Schrift geschicht / aus eigener Aus-  
 legung. Denn es ist noch nie kein  
 Weissagung aus menschlichem Wil-  
 len herfür bracht / Sondern die heilts  
 gen Menschen Gottes haben geredt /  
 getrieben von dem heiligen Geist.

Derhalben / alle die mit Schwencck-  
 felt / die heilige Schrift der heiligen  
 Propheten vñnd Apostel / nicht für  
 Gottes Wort halten / irren nicht we-  
 niger / denn die da leugnien / Das auch  
 Christus nicht sey das Ewige vñd selb  
 wesende Wort / Denn eben der Gott /  
 der dis Wort / Nemlich / den Son /  
 von Ewigkeit geboren hat / hat dis  
 Wort der Lere / zu gewisser zeit auch  
 herfür



## Widerlegung des

herfür bracht / vnd dem Menschlichen  
Geschlecht offenbaret / Auff das er  
durch dasselbige seinen willen von vn-  
ser Seligkeit / vnd also seine Krafft  
vnd macht gegen vns erzeigete / vbete/  
vnd auff vns brechte / Vmb welcher  
macht willen / der Apostel S. Paul.  
Rom. I. das Euangelium nennet eine  
Krafft Gottes / die da selig macht alle  
die daran glauben.

Also sucht der verfluchte Satan  
eigentlich mit diesem Stenckfelts  
Irrthum anders nichts / denn das er  
mit solcher verkleinerung des Worts  
Gottes / jederman wil zur höchsten  
verachtung verursachen / Das man  
endlich von der heiligen Prophetische  
vnd Apostolischen Schrift aus lau-  
ter Gnaden vnd Barmhertzigkeit /  
dem Menschlichen geschlecht offen-  
baret / gar nichts halten / vnd darnach  
der offentlichen Predigt / gar nichts  
achten / müde vnd vberdrüssig wer-  
den / vnd endlich gantz vnd gar fallen  
lassen

lassen sol. Denn wenn die Zuhörer ein  
mal das bey sich für recht vnd gewis  
schliessen / Das die heilige Schrifft  
von Gott durch Mosen / die Prophe-  
ten vnd Aposteln vns gegeben / nicht  
das warhafftige Gottes wort sey /  
so faren sie so bald hinein / vnd sagen /  
Was nicht Gottes Wort ist / Das ist  
eigentlich vnd gewislich eitel Lügen  
vnd Irrthum / nur Menschen lere /  
vnd vergebliche betriegliche eitel wort  
vom Teuffel ertichtet. Darumb sol es  
auch billich von jederman verachtet /  
vnd in keinem wege gehört / noch an-  
genommen werden / Vnd also hat der  
Teufel ein gewonnen Spiel / vnd ge-  
wissen Eingang / alle Hertzen vom  
Christo zu borauben / vnd abzuführen /  
Vnd macht durch solche seine Lere /  
den armen verblenten Zuhörern / aus  
Christo der vns zuerkennen vnd zuer-  
greiffen / als der rechte vnd einige Wei-  
land / im Wort wird fürgehalten / ei-  
nen strengē Richter / Der auch on solch  
mündē

## Widerlegung des

mündlich Wort / für anders nicht er-  
kennet werden mag.

Denn wie Christus im einfeltigen  
Wort vnd Sacramenten gesucht / sich  
jederman zu finden vnd ergreifen / als  
der trewe vnd einige Heiland / fürstel-  
let / der allen Bleubigen seine woldhat  
mitteilt vnd zueigent / wie er selbs sagt  
Matth. 18. Wo zween oder drey ver-  
samlet sind in meinem Namen / da bin  
ich mitten vnter jnen. Vnd Joha. 14.  
Wer mich liebet / der helt mein Wort /  
Vnd mein Vater wird in lieben / Vnd  
wir werden zu jm komen / vñ wohnung  
bey jm machen / Also / Wo man das  
Wort faren lest / vnd wil Christum on  
vnd außser dem Wort suchen / Da fin-  
det man in nicht anders / den als einen  
strengē ernstest Richter / vnd verzerend  
feyr / Bleibt auch wol one das Wort  
sonst jederman vnbegreiflich. Dar-  
umb / da er Joha. 8. von den Jüden  
gefragt ward / Wer bistu denn? Ant-  
wortet er jnen mit diesen worten / Erst-  
lich

lich der ich mit euch rede. Damit er  
men so viel wil geantwortet haben /  
Das sie im one seine Predigt / Lere /  
Wort vnd Sacrament / nach seinem  
göttlichen Wesen / wol werden vners  
tündigt bleiben lassen.

Der ander Irrthum.

Im andern / ertichtet vnd ver-  
neinet Schwencckfelt / Das der  
Mensch bekeret vnd erleuchtet  
werde / durch das geordnete Mittel  
des göttlichen Predigampts / Sons-  
dern saget / Der Mensch werde beke-  
ret vnd erleuchtet von Gott / one Mit-  
tel / vnd one vnd vor der Predigt.

Diesen Irrthum zu erhalten /  
braucht Schwencckelt zu mal leicht-  
fertige / vntüchtige vnd lose vrsachen /  
vnd saget / Es habe mit Gott gar die  
meinung nicht / Wie es etwa mit ei-  
nem Zimmerman zugehe / Derselb /  
Wenn er ein haus sol bawen / mus er  
vnuor Bret / Beiel / vnd andere waffen  
haben.

## Widerlegung des

haben/die er zu volbringen des Bawes/  
es/vnd der selben arbeit haben mus/  
Gott aber handele mit des Menschen  
bekerung/als ein allmechtiger Schep  
ffer/der aus nichts schaffen vnd ma  
chen kan/ von sich selbs / one einig  
Mittel/Was vnd wie er wil. Dieser  
Irrthum ist in seinem Buch/Von der  
heiligen Schrift / zu finden / am 10.  
blat/auff der andern seiten. Item/am  
11. blat/auff der andern seiten .

Es ist aber zwar auch dieser irrthum  
leichtlich zu erkennen. Denn was kan  
das für eine Folge werden / So man  
etwas schliessen wolt/aus Gottes vn  
geoffenbarter allmechtiger Krafft /  
von seinem geoffenbarten willen / vnd  
ordentlicher Wirkung / *Atq; sic ab  
omnipotentia DEI, ad eius uoluntatem.*  
Denn so Gott das nicht alles thut /  
das er doch wol thun vnd schaffen  
könde / auch in diesem zeitlichen Les  
ben/wie viel weniger geschihet das in  
geiste

geistlicher Wirkung? Er künde wol  
 alle menschen schaffen/ vñ zu dem lebē  
 one einig zuthun der Eltern helfen/  
 Aber er thuts nicht/ Sondern braucht  
 dazu seines selbst dazu geschaffenen  
 Mittels vnd Werkzeugs/ Nemlich/  
 den heiligen Ehestand. Eben dergleis-  
 chen künde er wol alle Menschen be-  
 keren vnd erleuchten/ on einige Pre-  
 digt vnd mündlich Wort/ durch son-  
 derliche trewme vñ heimliche erleuch-  
 tunge/ Aber er thuts nicht/ Sondern  
 er hat jm einen besondern Werkzeug  
 dazu geschaffen/ Nemlich/ sein liebes  
 Wort vnd Predigamt mit den heilī-  
 gen Sacramenten/ Durch welche er  
 vns/ als durch eine mütter/ durch wir-  
 ckung vnd erleuchtung des heiligen  
 Geists/ anders gebiret/ bekeret vnd era-  
 newert.

Darumb wird auch an viel orten  
 das Göttlich Predigamt genennet  
 vnd verglichen / einer Mütter Leib /

D 4

Als

## Widerlegung des

Als im 110. Psal. Deine Kinder wer-  
 den dir aus Mutter leibe geboren / Wie  
 der Thau aus der Morgenröte. Vnd  
 Isa. 46. Höret mir zu / Ir vom hau-  
 se Jacob / vnd alle vbrigen vom hau-  
 se Israel / die jr von mir im leibe getra-  
 gen werdet / vnd in der Mutter ligt.  
 Vnd Jac. 1. Er hat vns gezeuget nach  
 seinem willen / durch das Wort der  
 Wahrheit / Auff das wir weren Erst-  
 ling seiner Creaturen. Fast auff solche  
 weise redet David im 131. Psalm / da er  
 spricht / Wie ein junger Sengling sein  
 narung vnd erhaltung habe aus der  
 Mutter brösten / Also hab er sich ge-  
 neret vnd gestercket in seinen Ansech-  
 tungen / durch Trost des göttlichen  
 worts / welchs auch allein seiner See-  
 len Narung allzeit gewesen sey. Zeigt  
 auch an / das es kein mal gefehrlicher  
 vmb in gestanden sey / denn wenn er  
 dieses Trosts mangel gehabt / vnd al-  
 lein

lein bey sich selbsts in seinen gedancken  
 Trost gesucht hab/ Vnd saget/ HErr/  
 mein hertz ist nicht hoffertig/ vnd mei-  
 ne augen sind nicht stolz / Vnd wan-  
 dele nicht in grossen dingen/ die mir zu  
 hoch sind/ Wenn ich meine Seele nicht  
 setzet vnd stillt/ So ward meine See-  
 le entwenet/ Wie einer von seiner mut-  
 ter entwenet wird.

Dieher gehören vnzelich viel  
 Sprüche/ die da leren/ Das man Got-  
 tes werck zu vnser Erleuchtung nir-  
 gend/ denn allein in Gottes Wort su-  
 chen sol/ Als Isa. 8. Ja nach dem ge-  
 setz vnd zeugnis/ Werden sie das nicht  
 sagen/ So werden sie die Morgenrö-  
 te nicht haben. Das ist so viel/ Wer  
 das mündliche Wort Gottes verach-  
 tet/ vnd aus demselbigen nicht geleret/  
 der wird nimmermehr zum Liecht des  
 Erkentnis Gottes komen / Sondern

D ij

mus

## Widerlegung des

mus in der finsternis alles Missuers  
stands / vnnnd zueueln von Gott zu  
grund vnd bodem gehen. Davon gibt  
S. Paulus Rom. 10. diesen grund vnd  
feste Regel / So kompt der glaub aus  
der Predigt / das predigen aber durch  
das Wort Gottes. Vnd setzet vor die-  
ser Regel ein Frage / Darinnen er be-  
weist / Das es ein vnmüglich ding  
sey / on die Predigt zu erleuchtung vnd  
Glauben zu komen / vnd sagt / Wie  
sollen sie glauben / von dem sie nicht ge-  
hört haben? Vnd damit er solchen eis-  
genen hochfarenden Gedancken vnd  
nachforschen / außser vnd one das euf-  
serliche Wort fürkome vñ wehre / weis-  
set er jederman zum trewlichsten an  
das Wort / vnd sagt / Die Gerechtig-  
keit aus dem Glauben spricht also /  
Sprich nicht in deinem hertzen / Wer  
wil hinauff gen Himmel faren? Aber so  
saget sie / Das Wort ist dir nahe /  
Nemo

Nemlich / in deinem Munde vnd in  
deinem Herzen / Vnd das ist das wort  
vom Glauben / das wir predigen.

Dis beweisen auch trefflich viel  
schöner Exempel deren / so aus den  
Neiden zum Glauben durch die Pre-  
digt der Apostel gebracht vnd erleucht  
worden sind. Derhalben auch S.  
Paulus sich frey darff nennen Gottes  
Miterbeiter / Item / seiner zuhörers Vas-  
ter / die er durch die Predigt von Chri-  
sto new geboren hab.

Wiewol nu das war ist / das der  
heilige Geist die vrsach ist vnser Bes-  
kerung / vnd Erleuchtung / Darumb  
er auch genennet wird Gottes finger /  
Als der der rechte Bawmeister / das  
verderben vnseris Fleisches wider zu  
recht bringt vnd gantz macht / Jedoch  
wil er damit sein Werckzeug vnd wafa-  
ren solcher seiner Wirkung nicht weg-  
werffen / noch auffheben / oder abge-  
than haben / Wie die thun / die one

D iij den

Widerlegung des

den Werckzeug solche Ernewerung  
allein dem heiligen Geist/ one das Pre  
digampt zumessen. Darumb sündiget  
man hiebey zwifach / Entweder das  
man dem Bawmeister zumisset / der  
arbeit volziehung on den Werckzeug/  
Oder dem Werckzeug die erbeit besil  
het/ one den Meister.

Derhalben sol man der Sachen  
recht thun / vnd beides beisamen be  
halten / Wie es Gott zu vnser Bete  
rung selbs geordent hat / Nemlich /  
den heiligen Geist / mit vnd bey dem  
Wort vñ Sacramenten / darin er wir  
cket / vnd thetig ist / gegen allen Men  
schen / Wie denn in der Warheit das  
Predigampt / one Wirkung des heili  
gen Geistes / gar nichts vermag / noch  
kan / Wie solche Wirkung vnd erbeit  
des heiligen Geistes / in vnd durch das  
Wort bezenget / Isa. 59. Vnd ich ma  
che solchen Bund mit dir / spricht der  
HERR / Mein Geist / der bey dir  
ist /

ist/ Vnd meine Wort / die ich in dei-  
 nen Mund gelegt hab / sollen von dei-  
 nem Munde nicht weichen / noch von  
 dem mund deines Samens / vnd Kin-  
 des kind / spricht der HERR / von mir  
 an bis in Ewigkeit. Mit diesen wor-  
 ten verspricht sich Gott mit seiner Kir-  
 chen / durch einen ewigen Bund / Das  
 er sie durch diese zwey Mittel / allzeit  
 wolle samlen vnd erhalten / Nämlich /  
 durch das mündliche Wort vnd den  
 heiligen Geist / Isa. 55. Denn gleich  
 wie der Regen vnd Schnee vom Hi-  
 mel fellet / vnd nicht wider dahin ko-  
 met / Sondern feuchtet die Erde / vnd  
 macht sie fruchtbar vnd wachsend /  
 Das sie gibt samten zu seen / vñ Brod  
 zu essen / Also sol das Wort / so aus  
 meinem Munde gehet / auch sein / Es  
 sol nicht wider leer zu mir komē / Son-  
 dern thun das mir gefellet / Vnd sol

D v jm

## Widerlegung des

im gelingen / dazu ichs sende. Vnd  
Psal. 8. vnd Matth. 21. wird angezei-  
get / Wie Gott seinen Khum vnd lob/  
welchs ist vnserer bekerung / das wir  
in erkennen lernen / vnd loben / nicht  
anders wircke / denn durch den Mund  
der Vnmündigen vnd Seuglingen /  
Rom. 8. Welche er versehen hat / die  
hat er zuvor beruffen. Damit bewei-  
set er gewaltiglich / das die versehenung  
zum ewigen Leben vnd Herrlichkeit /  
anders nicht geschehe / Denn allein  
durch das mündliche Predigamt.

Aus diesem allem / ist klar vnd of-  
fenbar / Das auch dieser Stenckfelts  
Irrthum gottlos vnd vnrecht / ver-  
flucht vnd verdampft ist / Dieweil er  
leret / Das die Bekerung des Mens-  
chen / nicht geschehe von dem heiligi-  
gen Geist / durchs Wort vnd Sacra-  
ment. Denn damit füret er die Leut  
vom Predigamt gar ab / vnd hebt  
folgendes das Predigamt zu gleich  
gar

gar auff/ Vnd beraubet vns aller wir-  
ckung vnd krafft des heiligen Geists/  
Vnd nach dem er vns / beide Wort vñ  
Geist / wegnimpt / wirfft er vns also  
gantz vnd gar dem Teufel zu verfin-  
stern vnd verblenden für. Dieselbe ver-  
blendung ist die eusserste vnd erschreck-  
lichste Straffe/ vber alle vndanckbare  
Verechter des Predigampts. Isa 6.  
Matth. 13. Acto 28. Rom. 11.

### Der dritte Irrthum.

**W**um dritte/ schwermet Schwencck-  
felt / Der heilige Geist wircke  
vnd heilige nicht durch das Pre-  
digampt derer Lerer / die da selbs streff-  
lich vnd vnheilig sind / Ob sie auch  
gleich sonst ordentlich beruffen sind/  
vnd recht leren / Im Buch der Sum-  
ma seiner Antwort / fol. 11. Item / im  
buch von der heilige Schrift / fol. 22.

Diesen Irrthum hat Schwencck-  
felt von den Donatisten gelernet / vnd  
ist

## Widerlegung des

ist nicht weniger schädlich / denn die  
vorigen alle beide. Denn damit wil  
der leidige Satan die Kirchen des vber  
reden / Das des heiligen Geists Krafft  
vnd Wirkung stehe in der würdigkeit  
der Diener des Worts. Nu ist aber  
allein Gott / als der ein rechter Wertz  
kündiger ist / vnd keinem Menschen  
möglich / einiges Dieners Wertz vnd  
würdigkeit zu erforschen. Da nu das  
war solt sein / würde die Kirch nimer  
mehr können gewis werden / der rech-  
ten Lere vnd grund irer Seligkeit / So  
fern der heilige Geist mit seiner Krafft  
solt an des Dieners Person gebunden  
vnd geknüpffet sein.

Darumb mus die Kirche mit ge-  
wissem grund recht gefasset sein / Das  
der heilige Geist kressig vnd thetig  
sey / durch die Predigt / auch der vn-  
würdigen Diener. Wie köndten doch  
jemals ergere Buben gefunden wer-  
den / denn die Schriftgelerten vn Phari-  
seer waren zu Christi zeiten. Denz  
noch

noch beſilhet Chriſtus Matt. 23. Das man ſie ſo lange hören ſol / So lang ſie in der rechten Bahn beharren / vnd bleiben. Auß dem Stul Moſi (ſaget er) ſitzen die Schrifftgelerten vñ Phariſeer / Alles was ſie euch heißen halten / das haltet. Dis Gebot Chriſti were gar vergeblich / vnd vmb ſonſt / wenn des Predigampts Krafft vntüchtig vnd vnnütz were vmb der böſen Buben willen / Wie Schwencckfelts meinung helt. Also leret auch Chriſtus Matth. 7. Das in ſeinem Namen viel werden weiſſagen / Teufel austreiben / vnd im Predigamt allenthalben viel Krafft beweifen / So ſie doch als die erſten Ubeltheter zum Verdammnis verurteilt werden. Dergleichen klagt S. Paulus Phil. 1. Das das Euangelium nicht von allen mit gleicher Treu vñnd redligkeit gepredigt werde / Denn von etlichen werde es gepredigt aus rechter Lieb vñnd guter  
meinung

## Widerlegung des

meinung/ Von etlichen aber vmb hasß  
vnd hadders willen/ Was ist im aber  
denn? (sagt er) Das nur Christus  
verkündiget werde/ allerley weise. Dat  
doch der heilige Geist seine Krafft als  
so wol bewiesen / an des Verrehters  
Jude/ als an Petri vnd der andern A-  
postel Predigampt/ Der doch ein recht  
arger Bösewicht war.

Es were aber wol zu wünschen/  
Das alle die zum Predigampt beruf-  
fen sind vnd werden / zu gleich from  
vnd heilig weren / an Eere vnd leben/  
Vnd also jr Predigampt / mit einem  
heiligen wandel zierten / Auch ire Zu-  
hörer mit gutem Exempel besserten/  
Wie S. Paulus sagt/ Das ein Bis-  
choff sol sein ein Surbilde der Herde.  
Weil man es aber in dieser schwachheit  
nicht haben kan / Mus man darumb  
nicht dencken / Das vmb irer vnrich-  
tigkeit willen / auch das Predigampt  
nichts solt tügen noch werd sein. Den  
was

was die Ernewerung vnd Bekerung  
antrifft/ gilt irer Person halben / das  
Predigampt nicht mehr noch weniger  
hilfft noch schadet nichts / Sondern  
ist vnd bleibet für sich ein Werck vnd  
Krafft Gottes / Der da wircket durch  
den heiligen Geist on jr eigen zuthun /  
Der ist allem Meister / Vorbereiter vnd  
Volbringer seines Wercks. Denn es  
kan wol ein Prediger seine Kirchen  
vnd Zuhörer recht leren / vnd zum heil  
vnterrichten / Vnd er für sein Person /  
vmb seines Unglaubens / vngeschick  
tes Leben / Vnd losen Wandels wil  
len / zum Teufel faren. Derwegen  
straffet auch S. Paulus die Gemeine  
zu Corintho so hefftig / 1. Cor. 3. Das  
sie des Predigampts Krafft vnd wir  
ckung / an der Prediger Person vnd ana  
sehen heffteten. Warumb (spricht er)  
zänckt jr euch vnternander / vnd erhebt  
sich einer wider den andern / Ich bin  
Paulisch / vnd ein ander / Ich aber bin  
Apolo

Widerlegung des

Apollisch / Wer ist den Paulus? Wer  
ist nu Apollo? Diener sind sie / durch  
welche ir seid Gleubig worden / Vnd  
dasselbig / wie der HERR einem ig-  
lichen gegeben hat / Ich habe gepflan-  
zet / Apollo hat begossen / Aber Gott  
hat das gedeien gegeben. So ist nu  
weder der da pflanzet / noch der da be-  
gusst / etwas / Sondern Gott / der  
das gedeien gibt. Der aber pflanzet /  
vnd der da begusst / ist einer wie der  
ander. Denn sie sind Gottes Mitar-  
beiter.

Weil denn nu aus diesem allem /  
vnwidersprechlich war ist / das des  
Schwenckfels meining Irrig / vnd  
Gottes Wort zu wider ist / Erstlich /  
das er leugnet / das der heiligen Pro-  
pheten vnd Apostel Schrifften sollen  
Gottes Wort sein. Darnach das er  
leugnet des heiligen Geists wirkung  
durch



## Widerlegung des

leßt/ Vnd aus seinem Thron/ da sonst  
niemand hinkomen kan / mündlich  
mit vnserm Dertzen zureden herfür  
thut/ Vnd vns seiner Gnaden willen/  
Wie er vns wolle selig machen/ vnd zu  
sich in sein ewiges Leben abfoddern/  
darinnen eröffent. Dat auch darumb  
solchen offenbarten willen / menig-  
lich anzuhören / vnd zuglauben ge-  
boten/ als den vnwandelbaren Rath/  
Weisheit vnd Sackel seines willens/  
Die vns den rechten Weg/ aus diesem  
Jamertal vnd der Welt reich / durch  
die irrige Finsternis / leiten vnd weisen  
sol / zum richtigen vnd stracken Weg  
zum ewigen Vaterland. Wie es denn  
auch ist die einige Regel/ Die die rech-  
te Anleitung gibt / wie man in recht  
erkennen vnd im dienen sol/ vnd ein ge-  
wisse Richtschnur / Darnach wir alle  
vnsrer gedanken/ sinn vnd gemüt rich-  
ten sollen.

Weiter ist auch gar kein zweifel/  
Das diese Donatische Lere/ vnd an-  
der

der Schwencckfeldische Irrthumb /  
 Sonderlich / das er saget / Der Glaube  
 komme nicht aus dem gehör / eusser-  
 licher mündlicher lere sey von der Aug-  
 spürgischen Confession verdamnet /  
 Denn in derselbigen stehen Num 5.  
 vnd 8. diese wort. Wir verdamne auch  
 alle irrige Geister / so leren / Das man  
 den heiligen Geist anders denn mit  
 dem Wort vnd glauben erlange / Vnd  
 verachten das eusserliche Wort des  
 Euangelij / Vnd leren des heiligen  
 Geistes Wirkung / Liecht vnd Trost  
 des Hertzens / one das Euangelium  
 vnd außser dem Euangelio suchen /  
 Vnd füren also die hertzen von Gottes  
 Wort / vnd den Sacramenten / auff  
 eigene Wahn vnd erleuchtung / Wel-  
 ches das aller schedlichste ist.

Auch ist in den Schmalkaldische  
 Artikeln ein herrlicher Ort / Da  
 dieser Irrthum oder vnfinnigkeit des  
 Schwencckfeldts reichlicher vnd nach

¶ ij

der

## Widerlegung des

der lenge verdampt wird / Wie das im  
Capitel von der Beicht zusehen ist.

Dieweil denn nu dieser gottloser  
schedlicher Irrthum auch dem Wort  
Gottes öffentlich zu wider ist / Vnd  
von vnsern Kirchen allezeit ist verdam-  
net / So sollen vnd wollen wir in auch  
für verdampt vnd verworffen halten /  
Vnd in bestendig vnnnd ernstlich  
mit sampt seinen Weistern / vñ  
Schutzherrn verfluchen  
vnd meiden.

### III.

## Widerlegung des Irrthums der An- tinomer.

Der



Er Zrrthum der Antinomer folgt billich zum Nechsten auff Schwencckfels Schwermerey / Wie ein Glied seinem Körper vnd wie das Gesetz ein stück des Predigampts göttliches Worts ist. Denn wie Schwencckfelt leugnet / das vnser Bekerung vnd Erleuchtung geschehe vom heilige Geiſt durch das geschriebene oder mündliche Wort vnd Sacrament / Vnd damit das gantze Predigampt zu gleich gar auffhebt / Vnd weiſet vns beſeits auff newe vnd beſondere erleuchtung des Geiſtes / on Wort vnd Mittel / Also werffen die Antinomer das Gesetz / in ſeinem rechten Ampt auch gar hinweg / In dem ſie leugnē / Das der heilige Geiſt die ware New durch das Gesetz wircke / Denn damit ſtummeln ſie ſo bald im anfang das Predigampt diereil ſie des Geſetzes eigen vnd vnterschieds

L iij

terschieds

## Widerlegung des

terschiedlich Ampt / in das Euangelium vermengen / Vnd wollen / das man die New oder buspredigt zu Gott nicht aus dem Gesetz / Sondern allein aus dem Euangelio nemen sol.

Zu diesem Irrthum hat sie verursacht / vieler Prediger vnerstand / Die bald im anfang / da Gott diesen Landen / des heiligen Euangelij reine Predigt / wider geben hat / aus vnflisonen einigen rechten vnterschied / dem Euangelio / nicht allein seine gebürliche Eigenschafft nicht gegeben / Das es sey eine Predigt / von der vergebung der Sünden / Sondern vnbescheiden in hauffen geredt / Vnd das Euangelium schlecht / in gemein für ein Buspredigt getrieben / Als das es das Erkentnis der Sünde one das Gesetz lere.

Dieser Irrthum ist eine seer heymisch vnd tückischer behender Griff des Teufels / Der eigentlich damit hat  
das

das wollen ausrichten / Das / wie das  
 Papstum nur ein stete Predigt des Ge  
 setzes gewesen ist / Da man nichts  
 vom Euangelio vnd vergebung der  
 Sünden geleret / Sondern nur mit  
 treiben der werck / die Gewissen gemar  
 tert / vnd in verzweimeln gefüret hat /  
 Also wolt ers vnter dem Euangelio  
 auch umbkeren / Vñ durch die Predigt  
 des Euangelij / one Gesetz / die erledig  
 ten Gewissen / aus des Papssts Wen  
 ckerey / in ein eitel ruchlose / fleischliche  
 Sicherheit bringen. Das heisst denn  
 recht / nach dem Sprichwort / dem  
 Regen entlauffen / vnd gar ins Wasser  
 fallen / Vnd von einer Dell in die an  
 der rennen. Denn die ruchlose fleisch  
 liche Sicherheit vnd verachtung des  
 gestrengen Gerichts Gottes / wider  
 die Sünde / füret die Leute (Wo man  
 das Gesetze nicht neben dem Euange  
 lio treibet / sondern die Sünde lefft  
 schlaffen) eben so wol vom himelreich  
 weg zur Dellen zu / Als die endliche

L iij

ver

## Widerlegung des

verzweinelung an der Barmhertzig-  
keit Gottes / So durch des Papssts  
Gesetz vnd wercklere verursacht wird.

Da nu der Satan das ersehen hat/  
das durch die Predigt des Euangelij/  
die Gewissen aus den erbermlichen  
banden des Gesetzes / zu rechtem vnd  
gewissem Trost sind gebracht wor-  
den / Vnd in durch solchen Trost / alle  
ursach zu verzweineln / weggenommen  
worden ist / Wirfft er diesen Irrthum  
der Antinomer / als ein vngeworden  
Klotz / der Predigt des Euangelij in  
weg / Als damit er verhofft / demsel-  
bigen den richtigen Lauff zu verhin-  
dern vnd erwehren / Jederman damit  
als durch ein starcke Posaunen / in ei-  
nem busfertigen / fleischlichen / sich-  
ern Leben zu behalten / Vnd sucht der  
arglistige seelmörder damit das / Das  
vns das Euangelium on des Gesetzes  
Predigt eben so viel solt nütz sein / als  
zuuor das Gesetz one das Euange-  
lium /

tzig  
apsts  
vird.

Hat/  
gelij/  
schen  
vnd  
worz  
/alle  
omen  
hum  
wren  
elij in  
mfelz  
rhinz  
amit  
in eis  
sichz  
ot der  
Das  
setzes  
/als  
angez  
ium/

lium /im Bapstum gewesen ist. So  
meisterlich kan sich der vnrufige listi-  
ge Feind verdrehen / vnd Gott all sein  
Werck verkeren vnd verwenden/ Füret  
vnd treibet die Hertzen von dem rech-  
ten Weg vnd Strasse beseit ab/ Vnd  
nimpt dem Predigamt seine fürnem-  
ste Deubtstück / das Gesetz vnd Euan-  
gelium / vnd menget sie / eins in das  
ander / Oder trennet sie gantz vnd gar  
von einander.

Vnd das ist des Bösewichts des  
Tenfels fürnemster Tück vnd griff ei-  
ner/ Das er die heilsame Ertzney ( die  
da ist das Wort Gottes) zu einem lau-  
tern schedlichen vnnnd verderblichen  
Gifft machet/ Vnd hindert die werck  
des heiligen Geistes / dadurch die kir-  
che von jm bernuffen vnd versamlet/ die  
irrigen vnd verfürten bekert werden.  
Denn das Gesetz vnnnd Euangelium  
recht vnd vnterschiedlich getrieben/  
sind die rechten vnd heilsamen Mittel/  
dadurch der heilige Geist diese seine

E v wunz

## Widerlegung des

wunderbarliche Werck / den Sünder  
zu Gott zubekeren / durch rechte Reu  
vnd Glauben / ausgerichtet / Also / das  
wir durch warhafftig erkentnis der  
Sünden / ernstlich geschreckt / vnd  
durch erkentnis der herrlichen Gerech  
tigkeit / die vns durch Christum ver  
heissen / vnd aus Gnaden geschenckt /  
von hertzen erfreuet vnd getröstet  
werden / Auff das wir durch diese heil  
same vergleichung des schreckens vnd  
Glaubens / Gott recht lernen erken  
nen vnd ehren / Wie der 2. Psalm sagt /  
Dienet dem **HEXEN** mit furcht /  
vnd freuet euch mit zittern. Denn weis  
das Gesetz vnd Euangelium entwe  
der one vnterscheid vermengen / oder  
aber eines on das ander getriebē wird /  
So wird so bald des heiligen Geistes  
werck an vnser Bekerung gehindert /  
das man zu keinem rechten Schrecken  
vnd Glauben komen kan.

Denn gleich wie das Gesetz / so es  
one

one das Euangelium gepredigt wird/  
 allen Glauben / vertrauen vnd zuuer-  
 sicht zu Gott / sampt dem rechten Ge-  
 bet auslesset / vnd dafür nur schre-  
 cken / dadurch man für Gott fleucht/  
 vnd eitel Cainische Verzweimelung /  
 oder aber Phariseische / heuchlische  
 vnd ertichte frödigkeit / durch welche  
 die Barmhertzigkeit Gottes / Vns  
 durch Christum verheissen / verworf-  
 fen wird / bringet. Eben also helt sichs  
 auch mit dem Euangelio / Wenn es  
 one das Gesetz blos geprediget wird/  
 Als denn verlischt in den hertzen alle  
 rechte furcht Gottes / heilsame Reu  
 vnd Demut. Dagegen aber wachsen  
 vnd entstehen fleischliche sicherheit /  
 Daraus folget gewolliche verachtung  
 des gestrengen vnd ernstern Gerichts  
 Gottes / vber die Sünde / Vnnd das  
 noch mehr ist / Es wird dadurch die  
 trewe Barmhertzigkeit Gottes / vnd  
 das einig verdienst vnsers Herrn Ihe-  
 su Christi mit höchster vndanckbar-  
 keit

## Widerlegung des

keit vergessen. Denn/ es sey denn/ das jemand durch erkenntnis der Sünd/ vermaledeinung vñ schrecken des zorns Gottes getödtet / vnd in die Hellen angst getrieben werde/ So wird er nicht mehr von hertzen / mit ernst begern vnd suchen oder fragen nach der Gnad/ Gerechtigkeit/ Segen/ Leben/ oder Himel / Wie solchs zungen der 119. Psal. Ehe ich gezüchtiget ward/ irrte ich / Nu aber halte ich mich zu deinem Wort. Item Matt. 11. Den Armen wird das Euangelium verkündiget. Isai. 61. Der HERR hat mich gesand den Elenden zu predigen/ die zerbrochene hertzen zu verbinden etc. Item / Zu trösten alle traurigen.

Aus diesen Puncten kan man fein verstehen / Das niemand das Euangelium fruchtbarlich vnd mit rechtem nutz hören / noch die vberschwemliche

liche Reichthum des Herrn Christi /  
darinnen ergreifen noch fassen kan /  
Er werde denn zuvor durch des Ge-  
setzes Krafft dahin getrieben / Das er  
an im selbs erfare / wie gar ein vntüch-  
tig / schwach vnd gebrechlich Gefes er  
sey / Vnd was für grosse Schult vnd  
ewige straff er verdienet habe / Als  
denn lernet man recht verstehen / wie  
die Erbsünde so gar ein grosser vnheil-  
samer schade ist / in der verderbten Na-  
tur des Menschen / Das er so gar in  
allen seinen krefften wider das Gesetz  
Gottes gerichtet ist. Item / was für  
ein mercklicher Mangel das ist / Das  
wir so gar alle die erste Erbgerechtig-  
keit / vnd rechtes Bilde Gottes verlo-  
ren / vnd des beraubt sind / vnd dafür  
ein vngehewr Bild / vnd des Satans  
gar leibeigen worden sind / schuldig  
des ewigen zorns vnd verdammis.

Wer diese hohe vnd grosse Men-  
gel vnd gebrechen im Gesetz / nicht  
recht

## Widerlegung des

recht gründlich vnd ernstlich erkennen  
vnd fület/der wird je lenger je sicherer/  
vnd setzet seinen trotz vnd wolgefals  
len auff das vermügen des eigenen  
freien Willens. Derwegen müssen  
die Dertzen zuuor durch des Gesetzes  
Damer/wie harte Wacken vnd Kiesel-  
steine/wol zerschlagen/vnd zurschmet  
tert werden/ ehe vnd zuuor sie durch  
den edlen/ thewren vnd werden schatz  
des Euangelij getröstet / vnd damit  
erfüllet werden / Wie Esaie 40. Be-  
reitet dem HERRN den Weg/  
Macht auff dem Gefilde ein ebene  
Bahn/ vnserm Gott/ Alle Thal sollen  
erhöhet werden/ Vnd alle Berge vnd  
Hügel/ sollen genidriget werden etc.

In diesem Spruch wird künzt-  
lich begriffen der gantze handel des  
Reichs Christi / mit vns. Denn erst-  
lich wird vns der DERR Christus gar  
tröstlich für gemalet/ wie er alle schetz  
vnd

vnd Reichthumb vnsers verlorne  
 Heils / mit grossen hauffen auff sein  
 Hals geladen hab / vnd vns dieselben  
 widerbringen wolle. Darnach wer  
 den vnser sünde vmb des erbschadens  
 willen / verglichen einem vngedaneten  
 vnd so gar vngewrem Wege / dahin  
 niemand reisen noch hindurch ko  
 men kan / von wegen der tieffen vnd  
 finstern Talen / vnd vbermessig ho  
 hen Bergen / Decken / gestruetch / wilt  
 nis etc. Darumb schreiet er den Pra  
 digern so ernstlich zu / Lieber / bereitet  
 mir doch den Weg / Ziehet die Ber  
 ge vnd Hügel ein / vnd machet die  
 Tal damit eben / Reutet die Gestreu  
 che aus / Nawet die Decken vmb /  
 Brennet die dörner aus der Strassen /  
 das Ich doch mit meinem Trost mü  
 ge vngehendert vnd vnnerseumet zu  
 meinem trostlosen Volck komen. Die  
 se hohe Berge / so Christum zu vns  
 zu komen / verhindern / sind das ho  
 he / stoltze Vertrauen vnser eigenen  
 Krefte

## Widerlegung des

Krefft vnd Würdigkeit / Da wil er haben / das man sie sol midrigen vnd einziehen / durch des Gesetzes Predigt wider die Sünde vnd Tod. Die Tal aber / sind die geengstigten vñ zerschlagen Hertzen / die durch zweineln in höchster gefahr stehen / Die bevilhet er durch die Predigt des Euangelij / von der Gerechtigkeit vnd ewigem leben / durch Christum erworben / vnd aus lauter Gnad vns geschenckt / zu stercken vñd auffzurichten. Die irre Krümme / vnd mit dornegstreich verwachssene Wege / sind alle die vbrige angeborne / vñd im fleisch bleibende mengel vnd gebrechen / darinnen die newgebornen Kinder Gottes / sich noch hart kratzen vnd engsten / Die selben Lustseuch sol man tödten vñd auffreumen / vnd in einem newen Leben / als einer ebner vnd wolbereiten Strassen / anweisen / zurichten vñd lencken.

Dis ist die rechte vñd heilsame  
weis

weise / dem **HERRN** seine Wege zu  
 bereiten / Der sollen auch alle trewe  
 Lehrer vnd Prediger / ernstlich folgen/  
 nemlich / Das sie das Reich Gottes  
 an vns pflantzen vnd ansahen / Erst-  
 lich die sichern / wilde vnd rohe Wers-  
 tzen / durch das Gesetz schrecken / Dar-  
 nach die Busfertigen mit dem Euang-  
 elio wider trösten vnd aufrichten.  
 Dagegen aber / verhaben diese Chris-  
 sto die Strassen / die da nach Papistis-  
 scher / Phariseischer weise / allein das  
 Gesetz treiben / one das Euangelium /  
 Oder aber mit den Antinomern / als  
 lein das Euangelium one das Gesetz  
 predigen / Straffen die laster nicht mit  
 rechtem euer vnd ernst / Vnd lassen in  
 des den gemeinen hauffen / jmer frey  
 anhin sündigen. Denn die ersten mas-  
 chen die Thal noch viel tieffer / Vnd  
 gründen / bis zur Wellen hinunter /  
 Also / das der **HERR** gar nicht zu den  
 seinen komen kan. Die andern aber  
 tragen vnd setzen einen Berg auff dem

**S** andern

## Widerlegung des

andern/ das er auch nicht hinauff zu  
jnen Klettern mag.

Diweill denn beide teil / die Pa-  
pistischen Gesetzprediger / vnd die ho-  
nigfüßen Gnadenprediger / die Antis-  
nomi / vns das Reich Gottes je mehr  
abtreiben / vnd vns so gar dauon abfü-  
ren / Also / das sie vns enweder dem  
Teufel durch verzweueln / oder durch  
eitel sicherheit zufüren / So drawet  
jnen zu gleich miteinander Gott im  
Propheten Ezech. am 13. gar erschreck-  
lich / Vnd spricht vnter andern / Wehe  
euch / die jr die Seelen zum Tod ver-  
urteilt / die doch nicht solten sterben /  
Vnd urteilt die zum Leben / die doch  
nicht leben solten etc. Item / Das jr  
das Herz der Gerechten felschlich be-  
trübet / die Ich nicht betrübet habe /  
Vnd habt gestereckt die hende der gotts-  
losen / das sie sich von jren bösen Wer-  
gen nicht

gen nicht bekeren / Damit sie lebendig  
möchten bleiben.

Darumb sol man der Antinomier  
Lere / als ein arges giff / vnd ein son-  
derlich schedlich waffen des Teufels  
fliehen / als damit er sucht alle fleisch-  
liche sicherheit zubestetigen. Dagegen  
aber sei das Gesetz Gottes in der Kir-  
chen an seinem gebürlichen Ort / recht  
gepredigt vnd angehört werden / Vnd  
die Zuhörer fleissig vnd vnterschied-  
lich gelert werden / das es als ein stück  
des Predigampts / nicht kan noch sol  
ausgelassen werden / Sintemal der  
heilige Geist dadurch / als durch einen  
heilsamen werckzeug / seine erste ar-  
beit wircket / zu vnser bekerung / Nem-  
lich / rechte Kere / vnd tödtung des al-  
ten Menschens / Vnd macht / das wir  
vns ernstlich sehnen / vnd des Trosts  
im Euangelio begirig werden / vnd  
vertilget des fleisches sicherheit.

Es sol sich auch niemand lassen

S ij irre

## Widerlegung des

irre machen / durch der Antinomier  
Sprüche / die sie iren Irrthum zu er-  
halten auffbringen / Als Johan. am  
16. Der heilig Geist wird die Welt  
straffen vmb die Sünd etc. Vnd Luce  
am 24. Also musste Christus leiden /  
vnd predigen lassen in seinem Namen  
Bus vnd vergebung der Sünden / vn-  
ter allen Völkern. Vnd Rom. 1. Denn  
Gottes zorn vom Himmel wird offen-  
bar vber alles gottloses Wesen etc.

In diesen vnd dergleichen Sprü-  
chen / sol man sich nach der Regel Lu-  
theri richten / die er geben hat in seiner  
andern Disputation / wider die Anti-  
nomer / Prop. 18. Alles was die sünd-  
zorn vnd tod weiset / das thuts durch  
des Gesetzes Ampt / Es geschehe im  
alten oder newen Testament. Vnd am  
selbigen Ort sagt er / Das das Gesetz  
vnd Predigt von der Sünde vnd zorn  
Gottes / sind gleichlautende Rede.

Diese Regel ist werth / das man  
sie wol mercke / vnd sonderlich allen  
Theos

Theologis nötig. Denn man mus das Gesetz vnd Euangelium / als zwey vnterschiedliche Teil des gantzen Predigampts / recht vnd wol vnterscheiden / Vnd einem jglichen seine art vnd eigenschafft lassen / Als wieder glaub an Christum / allein des Euangelij Werck ist / Also ist auch hinwider die reu vnd erkenntnis der Sünden / allein des Gesetzes eigen Werck. Wo nu diese Eigenschafft solten vermengert werden / müste der grund der gantzen heiligen Schrift / verkeret werden / Dar aus denn nichts gewissers zu erwarten / denn vnzeliche Irrthum in allen Artikeln vnd heubtstückten der Christlichen Lere.

Dieweil den der Antinomier schweremerey dem göttlichen Wort / vnd dem Schriftē / so von den vnsern ausgangen / auch vnser Christlichen Religion vnd Kirchen entgegen vnd zuwider ist / So sollen wir sie auch von ganzem hertze verdamnen vnd verfluchē.

S ij      Widers

Widerlegung des  
IIII.

Widerlegung  
des Irrthums der Wi-  
derteuffer.

**W**ie ein Siegel an et-  
nen Brieff angehen-  
get oder fest auffge-  
druckt / fest anklebet /  
Also folgen den vor-  
rigen irrthumen wie-  
der das Predigampt  
die Irrthum der Sacramentschwer-  
mer / Sintemal die Sacrament sind  
himlische Siegel vnd gewisse Pfand-  
de / die Gott nicht one besonder grosse  
Ursach an die Predigt des Euangelij  
gehendet hat. Denn es ist vber die  
masse ein schwer ding den hertzen / die  
durchs Besetz erschreckt vnd gestrafft  
sind

sind/die Vergebung der Sünden/die  
 in gemein/durch die Predigt des E-  
 uangelij/dem hauffen zu gleich wird  
 fürgetragen/für sich selbs/vnd von  
 einem jeden besonders zu ergreifen  
 vnd für eigen anzunemen. Darumb  
 hat Gott die Sacramenta dazu ver-  
 ordnet/das dadurch einem jeden in son-  
 derheit/die vergebung der Sünden zu  
 geeigent vnd mitgeteilt werde. Vnd  
 dasselb geschicht nicht allein/wie in  
 der Predigt/durch blosser Wort/Son-  
 dern auch in sichtigen vnd begreiffli-  
 chen Mitteln vnd Zeichen/damit ein  
 armer vnd erschreckter Sünder selbs  
 sehe vnd höre/Das Gott im handel  
 der vergebung der Sünden/mit jm zu  
 thun vnd zu schaffen haben wolle/jm  
 auch meine/vnd jm hiemit sein Gnad  
 vnd Weil/durch hören des Worts/  
 vnd niessung der Zeichen/ins hertz zu  
 eigen schencken/Auff das er mit des-  
 ste festern Glauben vnd freidiger zu-  
 versicht/die geschenckte Gnade vnd

S iij

Barnz

## Widerlegung des

Barmhertzigkeit anneme / Vnd mit derselben sich in seinen anfechtungen wehren / vnd dadurch zum Gebet stercken künde.

Darumb / dieweil die Sacrament dem Glauben vnd Gebet so nützliche vnd heilsame hülffe thun / So sucht der Satan / wie er dieselben auch künde durch sondere Irrthum vnd schwermerey besuddeln / Damit er vns ja nichts / das zu vnserm Weil / vns von Gott verordent ist / vnangefochten lasse / Auff das / wie er durch der Antinomer schwermerey das Gesetz hat auffgehoben / Vnd damit alle furcht Gottes aus dem hertzen gerissen / vnd men zur fleischlichen sicherheit eine offene Freiheit zu sündigen gemacht / Also auch durch der Sacrament verfelschung dem Glauben alle seine hülffe / daran er sich halten mus / wegrenmet / Auff das er damit alles bestendig vertrawen in dem Wertzten auslessche / vnd nur zu verzweueln vr-  
Dazu

Dazu dienet der Widerteuffer Irrthum auch sonderlich. Denn dieweil das Sacrament der Tauffe / als die erste Thür ist / dadurch wir aus dem Reich der welt vnd des Teufels / in die Kirchen vnd Reich Christi treten vnd eingehen / Welcher darin mit einem jglichen Menschen in sonderheit / einen ewigen Bund macht seiner Gnade / vnnnd vns wider new gebirt / vnd vns die wir tod vnd fleischlich waren / wider lebendig macht / Darumb erbeitet der Satan mit höchstem fleis dahin / das er vns solche Thür verrenne vnd verschliesse / vnd durch der Widerteuffer schmeheliche vñ lesterliche irrthum / vns hinein zu gehen / verhindere vnd auffhalte.

Derwegen mus man zu solchen gottlosen Secten nicht stillschweigē / Sondern zu Errettung der heiligen Tauffherrlichkeit / müssen wir der heillosen Widerteuffer lesterung auch etliche widerlegen. Denn wiewol diese

f v Sect

## Widerlegung des

Sect seer viel grobe vñ vngeheure ir-  
thum hat / die alle öffentlich wider die  
ander Tafel sind / Als / das sie fürge-  
ben / Es müsse kein Oberkeit sein vn-  
ter den Christen / Item / Es könne kei-  
nem Christen ein Eid zu thun zugelas-  
sen werden. Item / Sie halten die Ehe  
nicht / vñnd treiben wider die Ehe  
scheusliche Büberey vñd Unzucht /  
Item / Sie geben für / man müsse ni-  
chts eigens haben / Leide keine Bewer-  
be vñnd Wendel / Damit sie jnen ein  
Freiheit machen zu stelen / vñd andern  
jre eigene Güter zu entwenden etc.  
Doch weil diese grewliche vñd lester-  
liche Bubenwerck dieses allgemeinen  
zeitlichen lebens Gemeinschaft / von  
Gott selbs also bestelt vñd geschaffen /  
zugehören / So wollen wir sie / als die  
der weltlichen Oberkeit / zu straffen  
gebühren / auch hiemit zustellen vñd bes-  
selhen / Denn es je augenscheinlich ist /  
das diese Sect / öffentlich vom Tensel  
getrieben wird. Ober diese aber / haben  
sie noch

sie noch grausamer Irrthum wider die erste Tafel / Sie ertichtē alle semptlich mit einander / Es sey gar kein Erb sünde / vnd daher geben sie auch für / Es sey nicht von nöten / das man die jungen Kindlin teuFFE, Andere halten mit Seructi Irrthum / wider die drey vnterschiedene Personen des göttlichen Wesens. Etliche halten wie die Mönch vnd sagen / Man werde gerecht aus eigenen wercken / auch die in eufferlicher zucht geschehen / Als gedult / sawrsehen / vnd das man sich von gemeinem Dauffen absondere / vnd ein einsam Leben füre / vnd der grewlichen Irrthum viel mehr.

Wir wöllen aber zu diesem mal / diese ire Irrthum zu handeln nicht für vns nemen / Sondern kürtzlich allein die / so sie wider die heilige Tauffe haben / daher sie auch iren Namen bekommen / Vnd dasselbige kürtzlich. Vnd vnter jnen sind erstlich diese / So da leugnen / Das der heilig Geist durch die

## Widerlegung des

die Tauffe wider new geborn vnd lebendig mache / die zuuor im Fleisch vnd Geist tod sind / Die andern geben das zu / doch nur in den Alten / aber nicht an den jungen Kindern / die noch irer Vernunft nicht brauchen können. Vnd damit berauben sie ein grosse vnzeltliche Menge der Kindlin / der Gemeinschafft der Kirchen / mit höchster gefahr derselben Seelen seligkeit. Vñ wenn dieselben in des in irer Jugend on die Tauffe sterben / befelhen sie dieselben stracks Gott in sein Gericht.

Derhalben mus man mit gewissen vnd klaren zeugnissen der Schrifft gefasset sein / die vns gründlich weisen / Was / vñnd an wem die Tauffe wircke / nemlich / Das der heilig Geist warhafftig durch die Tauffe / one vnterscheid / es sey Man oder Weib / jung oder alt / wider gebere vnd lebendig mache. Darumb nennet S. Paulus Titto 3. Die Tauff ein Bad der Weibers

dergeburt vnd Erneuerung des heiligen Geists / der vns durch dieselben Seligmache. Vnd zun Ephe. 5. nennet ers ein Wasserbad im Wort / Das durch der Son Gottes seiner Kirchen runtzeln vnd masen der angeborenen Sünde / vnd was wir von derselben vnflats an vns kleben haben / abwasche / reinige / Vnd richte sie jm zu / zu einer Braut / die herrlich sey / Die nicht hab einen flecken oder runtzeln / oder der etwas / Sondern das sie heilig sey vnd vnstrefflich / Also / da Nicodemus Joh. 3. Christum fragte von der rechten Kirchen vnd Gemeinschaft des Reichs Gottes / Antwort er jm / Das niemand zu solcher gemeinschaft kommen könne / Er werde denn new geboren durchs Wasser vnd heiligen Geist. Aus diesem allen schliessen wir mit gutem vnd beständigem Grund / Das die Widergeburt des fleischlichen Menschen geschehe allein durch den heiligen Geist / in der Tauffe. Dieweil  
aber

## Widerlegung des

aber die jungen Kindlin / eben so wol  
als die alten Menschen fleischlich / vnd  
mit der Erbsünde vergiffet vnd ver-  
derbt sind / So sol man sie auch teuf-  
fen / vnd in der Tauff inen solchen Un-  
flat abwaschen / auff das sie auch new  
geboren werden / Denn Christus ver-  
dampt vnd verwirfft an gemeltem  
ort / an allen menschen zu gleich / jung  
vnd alt / die fleischliche Geburt / da er  
spricht / Was vom fleisch gebore wird /  
das ist fleisch. Das ist so viel gesagt /  
Was natürlicher weis / nach ordnung  
der ersten Eltern geborn wird / das ist  
verderbt / vnd für Gott schuldig / geist-  
lich tod / Vnd mus durch die Tauffe  
wider oder new geborn werden.

Daher feret der Herr Christus  
seine Jünger so vbel an / die da Marc.  
am 10. die Eltern auffhielten / die im  
jre junge Kindlin zubrachten / vnd  
sagt / Lasset die Kindlin zu mir kom-  
men

men/ vnd wehret inen nicht / Denn  
 solcher ist das Himmelreich / Warlich  
 ich sage euch / Wer das Reich Got-  
 tes nicht empfehet / als ein Kindlin/  
 der wird nicht hinein komen / Vnd so  
 bald herket er sie / legt inen die hende  
 auß / vnd segnet sie. Mit diesen wor-  
 ten vnd geberden / zeigt er gnugsam  
 an / das seine meinung gar nicht ist /  
 Das man die Kindlin der Tauff beraub-  
 en sol / Sintemal sie ja seiner Kirchen  
 vñ Reichs glieder sind / Wie er spricht /  
 Denn solcher ist das Himmelreich. Dar-  
 umb sündigen die Widerteuffer vber  
 die mas seer / Das sie die Kindlin nicht  
 teuffen lassen / die weil sie irer Ver-  
 nunfft noch nicht mechtig sind / Als  
 solten sie darumb auch zum Glauben  
 vnd Himmelreich vntüchtig sein / Vnd  
 führen allein die Christo zu / so nu zu irē  
 jaren komen / vnd der Vernunfft brau-  
 chen können / Vnd derhalben des  
 Glaubens vnd Reichs Christi solten  
 fehiger

wol  
vnd  
ver-  
euf-  
On-  
new  
ver-  
tem  
ung  
da er  
ird/  
agt/  
ung  
as ist  
eists  
uffe  
stus  
dare.  
e im  
vnd  
fo-  
men



## Widerlegung des

fehiger sein / Gleich als müste der Glaube durch die Menschliche Vernunft gefasset vnd ergriffen werden. Aber Christus sagt das Widerspiel / vnd spricht / Das die jungen Kindlin viel tüglicher sind / das Dimelreich zu empfaben / denn eben die Alten / Darumb das die Alten durch ire vernunft vom Satan listiglich vom Glauben auff's geschwindest werden abgefüret / Welcher beider gefahr die jungen Kindlin vberhaben sind / Die weil sie nicht von irer Vernunft können regirt / noch durch des Teufels fewrige pfeile so gar verletzt werden / sondern sind gantz vnd gar vnter des heiligen Geistes schutz / regirung vnd wirkung / wie in einer sanfften vnd stillen ruhe / Denselben lassen sie alles in jnen machen vnd schaffen. Darumb wil auch Christus / das die Alten viel mehr sich sollen den jungen Kindlin nach / in aller einfalt / dem heiligen Geist vnterwerffen vnd ergeben / Vnd nicht /

nicht / das sich die Kinder den Alten nach / mit irrer Vernunft / vermessentlich in Gottes vnd des Himelreichs Sachen sollen empor in die Höhe schwingen.

Vnd ist wol zu glauben / Das die Apostel auff diese ernste Straffe des Herrn Christi / wider der Widerteuffer irrthum / die Kindlin auch zu teuffen hernacher nicht gehindert / sondern wol selbs die Kindlin getaufft haben. Vnd das kan man daraus abnehmen / Dieweil in der Apostel Geschicht so offft bezeugt wird / Das die Apostel alle Hausgenossen oder heuser getaufft haben / Darunter je auch die Kinder begriffen werden / Vnd one zweuel mit den andern allen auch getaufft worden sind. Denn man findet selten Denker one Kinder. Solchs beweist auch Origenes vber das 6. cap. zun Römern / vnd spricht / Die Kirch hat eine Satzung von den Aposteln selbs geordnet / empfangen / Das man

B

auch

## Widerlegung des

auch die Unmündigen Kindlin teuff-  
fen sol. Denn sie haben wol gewusst/  
Als denen die göttlichen Geheimnis  
sind vertrauet vnd befolhen gewesen/  
das in allen menschen mancherley vn-  
flath der Sünden klebt / Die alle allein  
vom heiligen Geist vnd Tauff müssen  
abgewaschen werden.

Derhalben sol man die Wider-  
tenffer / mit irer gottsesterlichen Ke-  
tzerey / gantz vnd gar meiden / Auch  
in keinen weg sie in der rechten Kir-  
chen dulden / Sondern als schedlich  
Unkraut / vñ des Teufels selbs werck-  
zeug fliehen / Wie sie denn offtmals in  
der Augspurgischen Confession / Ap-  
pologia / Schmalkaldischen Arti-  
keln / vnd fast in allen Schrifften vnser-  
rer Kirchen vnd Lerer auff's ernstlichst  
vnd mit beständigem grunde verdam-  
net worden sind. Dagegen aber sol  
man die Tauffe mit höchster ehrebie-  
tung herrlich halten / Als den rechten  
heils

heilwertigen vñ gnadenreichen born/  
 darin der Son Gottes / mit dem Va-  
 ter vnd heiligen Geist / die schuldigen  
 los spricht / die fleischlichen wider ge-  
 birt / vnd die geistlich tod sind / wider  
 lebendig macht / Vnd endlich mit ei-  
 nem jeden Menschen / sie seien Kind-  
 lin oder Alte / einen ewigen beständige  
 Bund auffrichtet. Das / ob sie schon  
 aus Menschlicher Dürfftigkeit vñnd  
 schwachheit nach der Tauff sündigen /  
 Doch / so sie von hertzen vnd mit rech-  
 tem ernst Busse thun / vnd von dem sel-  
 ben Bund weder weichen / noch  
 sich dauon abweisen lassen / das  
 gleichwol derselb Bund vn-  
 brüchig / stet vñ fest blei-  
 ben sol.

G ij

Widera

**Widerlegung**  
 des Irrthums der al-  
 ten vnd neuen Zwinglia-  
 ner vom Abendmal des  
 Herrn.

**D**ieich wie man zu er-  
 haltung dieses leiblich-  
 en Lebens vnd ges-  
 undtheit / allzeit mus  
 im Vorrat haben / ni-  
 cht allein speis vnd  
 Nahrung / Sondern  
 auch mancherley nützliche vnd heil-  
 same Ertzney / Damit man den Leib  
 für künfftigen Franckheiten beware /  
 vnd denselbigen damit fürkome / Oder  
 aber / da er mit Franckheiten vberfal-  
 len / denselbigen wehre / vnd sie damit  
 ver-

vertreibe/ Also darff das geistliche leben nicht weniger auch seiner verwahrung vnd hülff/ Dadurch der angesungen Glaub mit allerley göttelikeit/ in so grosser vnnnd gefehrlicher schwachheit gemehret/ gesterckt/ wach seynd erhalten werde.

Darumb hat Gott nicht allein im alten Testament die Sacrament verordent/ vmb menschlicher schwachheit willen/ Sondern es hat auch der Herr Christus im newen Testament die heiligen Sacrament fürnemlich eingesetzt vnd bestetiget/ Vnd das in solcher Ordnung vnd gebrauch/ Das die wir in der heiligen Tauff angefangen/ vnd durch den heiligen Geist new geborn sind/ So offft wir durch des alten Adams schwachheit vnd vnglauben/ auch vom zorn Gottes/ der sündelast/ Vnd letztlich sonst von andern des Teufels feurigen Pfeilen angefochten vnd beschweret/ auch gleich fast gekrencket vnd gemattet würden/ So

G iij bald

## Widerlegung des

bald mit vnsern Gewissen / zu diesem heisamen Tisch zulauffen solten / Vnd bey dieser tröstlichen Speise / Labung / Erquickung / vnd newe Krafft vnd stercke holeten / vnd suchten / Wenn sich der Glaube auff das Wort Gottes vnd die Sacrament lehnete / vnd sich damit stercket. Denn in massen ein Francker vnd abgematteter Leib / durch *Confortatiua* vnnnd labung / Also wird die Seel vnd Gewissen der Christen / durch das Nachtmal hertzlich vnd krefftiglich gelabet / vnd vberkommen mit dauon entpfindlichen Trost vnd Sterck.

Vnd vmb solcher notwendigen Ursachen willen / müssen diese zwey Sacrament jmer vñ allzeit in der Kirchen bleiben / vnd wider alle Irrthum vnd Ketzerien erhalten / vnd verteidigt werden / als die einige rechten Siegel vnd Warzeichen / so vns die Gnade vnd Verheissung Christi zuerlangen. Vnd wo wolte doch sonst ein  
geengz

geengstigt vnd zerschlagen Gewissen/  
 beständigen Trost suchen oder finden/  
 denn so es in seiner Angst sich des be-  
 stetigten Bunds/den Gott mit jm in  
 der Tauff angefangen vnd gemacht  
 hat/widerumb erinnert / Vnd bedenk-  
 cket/das derselb ewig vnd vnrandel-  
 bar ist für Gott / Wie Isai. sagt am  
 54. Denn es sollen wol berge weichen/  
 vnd Hügel hinfallen / Aber meine  
 Gnade sol nicht von dir weichen/Vnd  
 der Bund meines Friedes sol nicht  
 hinfallen / spricht der HERR dem  
 Erbarmen. Vnd ob wir wol nach der  
 Tauffe in vnserer grossen schwachheit/  
 oft vnd wol teglich an diesem Tauff-  
 bund brüchig werden / So hebt doch  
 Gott darumb solchen Bund mit nicht-  
 ten auff / Ja er hat eben vmb vnser  
 Schwachheit willen / das Nachtmal  
 gestiftet vnd eingesetzt/ Das wir vns  
 darin von newem solches bundes/ als  
 den er hiemit teglich wider erneue/

G iij vnd

## Widerlegung des

vnd bestetige/ annemen/erinnern/ vnd damit wider vnser schwachheit trösten vnd auffrichten sollen. Denn da sind wir den Son Gottes / als vnsern waren trewen Mittler zwischen dem Vater vnd vns / allzeit gegenwertig/ Der mit einer hand / seinen eigenen Leib vnd Blut / damit er vns erlöset hat / dem Vater zeigt / vnd vns dadurch mit im versünet / Vnd mit der andern hand zu gleich auch denselben Leib vnd Blut / vns reichet / Darinnen Er die Gleubigen auch aller seiner Wolthat warhafftig teilhafftig macht / Vnd einem jeden Gewissen / wider seine eigene Not vnd ansechtunge/ rechten Trost vnnnd bewerte Erztney gibt.

Aber wie bald nach der Apostel zeit/ der leidige Satan/ durch seine listige geschwinde Tück/ den hohen Artikel von dem göttlichen Wesen / vnd von dem waren vnd rechten Erkentnis Gottes / grewlich hat angefochten/

ten/ vnd sich vnterstanden mit allerley  
 Irrthumen vnd verfelschungen / die  
 einfeltigen hertzen irre zu machen / vnd  
 vom rechten erkentnis Christi abzufu-  
 ren / Also feiret noch ruhet er nicht in  
 dieser letzten zeit / nicht weniger / Vnd  
 trachtet sonderlich darnach / wie er  
 vns mit seiner geschwinden behendig-  
 keit / vmb die heilsame Mittel vnd  
 werckzeug / Darin sich Gott vns zu er-  
 kennē gibt / mit vns handelt / vns auff-  
 nimpt / erleuchtet / vnd wie durch Rin-  
 nen vnd röhren / seine Gnade vñ barm-  
 hertzigkeit zufüret vnd zuleitet / brin-  
 gen / vnd derselben gantz vnd gar be-  
 rauben / Vnd sie mit seinem grausam-  
 en vnleidlichen grewel vnd gestancē  
 der Irrthum / vnd schleim verstopffen  
 müge.

Vnd des hat er sich so bald vnter-  
 standen / als Gott seines Euangelij  
 heilsames Liecht / durch den thewren  
 Man Gottes Lutherum seliger Ge-  
 dechtnis / wider hat herfür bracht /

G v Kenn

## Widerlegung des

Kennet vñ springt er mitten vnter den  
hauffen/nicht der feind/sondern in die  
Kirchen/Vnd erhaschet etliche tapffere  
vnd geleerte Mennner / die zum teil  
aus grossen vermessenem hohmut irer  
Kunst/zum teil/das sie die göttliche  
Werck vermeinten nach der törichten  
Vernunfft Menschliches Verstands  
zumessen / vnd zu ergreifen. Dieselben  
hetzet er an/das sie sich vnterstan-  
den haben / den Artikel vom Nachtmal  
des WErn / vnverschampt zu  
verwirren / vnd mit vernunfftiger ge-  
schwindigkeit zuuerselchen.

Vnd ist wol ein wunder ding/Das  
der Satan alle sein thun vnd wesen/  
allezeit so weidlich auff die eusserste  
spitzen treiben vnd bringen kan. Denn  
im Bapstum hat er das Nachtmal so  
hoch getrieben / oder viel mehr ver-  
feret/dases jederman für ein lautern  
Abgott in der Mess gehalten/gegleu-  
bet vñ angebetet hat. Welchen grew-  
lichen

lichen Irrthumb nochmals etlichen  
 rechtschaffenen vnd bestendigen Le-  
 rern / ire Verleumbder / on allen grund  
 vnd schult fürwerffen. Vnd eben er-  
 beitet vnd drehet ers jtz mit hochge-  
 lerten Mennern vnd spitzigen Klüg-  
 lingen auff die andere spitzen / das /  
 was er dort durch jene zu hoche rha-  
 ben / nu durch diese gar nider vnd zu  
 boden werffe. Denn diese nemen dem  
 Nachtmal all seine gebürliche Gnad /  
 eigenschafft vnd rechten Kern / Vnd  
 werffen vns dagegen die leeren hülßen  
 vnd schalen für. Nicht anders / denn  
 wenn einer dem andern für Korn die  
 sprew / vnd für gelt eine leere Taschen  
 böte. Also berauben auch sie die liebe  
 Kirche nicht weniger ires tröstlichen  
 vnd allerheilsamsten Schatzes.

Derhalben wil vns auch von nö-  
 ten sein / wider solche wolgerüste vnd  
 hochgelerte Leute / Sonderlich die-  
 weil sie wollen der Augspurgischen  
 Confession verwanten gesehen vñ ge-  
 achtet

## Widerlegung des

achtet sein / Vnter welchem schein vnd  
Titel sie denn nicht kleinen schaden  
thun / die einfeltigen wol zu verwar-  
nen / Vnd wider ire spitzige vnd der ver-  
nunfft gar gemesse Irrthum / mit  
grund Gottes Worts / zu rüsten vnd  
zu stercken / Damit sie nicht durch sol-  
che vernünfftige behendigkeit vnd li-  
stigen schein der personen / vnd irer  
Argumenten / von der rechten Bahn  
abgefürt / in erschreckliche Irrthum  
fallen vnd geraten.

Dieweil aber der Handel vom  
Nachtmal von den Vnsern / vnd son-  
derlich von D. Luthero seligen / durch  
viel Schrifften / wol vnd gnugsam  
erkleret / vnd der Kirchen trewlich ist  
fürgehalten worden / Wöllen wir itz  
und kurtzlich die Lere von demselben /  
Wie sie von den Lerern in vnsern Kir-  
chen / durch Gottes gnadegeleret vnd  
gepflogen wird / widerholen / Vnd da-  
bey den Widersachern ire fürnemste  
Argumenta / Vnd was sie in iren  
Schrifften

Schriften wider vns surgeben / wie  
 derlegen. Denn wer sich wolt vnters  
 stehen / inen auff alle ire listige / behens  
 de vnd spitzige Wort zu antworten /  
 Der würde sein Arbeit nicht besser an  
 legen / denn der den Wind mit einem  
 Windnetz fahen vnd haschen wolte.

Vnd kurtzlich ist das die Summa  
 vnser Lere / wie sie sein einfeltig / wol  
 vnnd öffentlich begriffen ist / in der  
 Augspurgischen Confession / Apolo  
 gia / vnd den Schmalckaldischen Ara  
 tikeln / Das der Herr Christus im  
 Nachtmal seinen waren Leib vnd blut  
 reicht vnd mittheilet / denen / die es em  
 pfahen / Vnd dasselbig nicht in bedeu  
 tungs weise / Sondern warhafftig /  
 leiblich / eben den leib / deër am Creutz  
 für vnser Sünde gegeben hat / Niche  
 abwesend im Himel / sondern gegen  
 wertig auff Erden / Vnd das den wir  
 digen vnd vnwürdigen / Nicht im glau  
 ben geistlich / sondern mit dem Munde  
 de leib

## Widerlegung des

deleiblich/ zu empfangen / Vnd das er  
den Glaubigen dabey zu gleich schen-  
cket vnd mittheilet die vergebung der  
Sünde/ die er vns dadurch am Creutz  
erworben hat/ sampt aller seiner wol-  
that/ Wie sie im Euangelio vns ver-  
heissen werden.

Diese meinung mus man fest be-  
halten/ vnnnd sich von den Schwer-  
mern dauon nicht lassen abdringen/  
Sondern steiff wider sie erhalten vnd  
verteidigen. Denn es ziemet noch ge-  
büret keinem Christen vberall/ von den  
klaren ausdrücklichen worten Christi  
zu fallen / vnnnd dieselben auff andere  
Deutung vnd frembden Verstand zu  
ziehen/ Sol auch/ ob Gott wil / von  
vns nimmermehr geschehen. Nu haben  
aber die Wort Christi eigentlich das  
in sich/ das im Nachtmal / vnter oder  
mit dem Brot/ der ware vnd wesent-  
liche Leib gereicht vnnnd empfangen  
wird/ Welcher zum Weil des gantzen  
Menschlichen Geschlechtes / an das  
Creutz

Creutz gehenckt / vnd daran die aller bittersten Schertzten erlidten hat / Auch im Wein das ware vnd wesentliche Blut / das er zu vnser aller Erlösung am creutz für vns vergossen hat / Also / das es nicht allein im Glauben / Sondern auch mit dem Munde empfangen wird.

Diese gegenwertigkeit des Leibs vnd Bluts Christi aber glauben vnd bekennen wir also / Das wir mit nichts zulasen / Das solchs alles geschehe mit einiger verwandlung des brotes in Leib / oder des Weins in das Blut / Wie denn solche Papistische Transsubstantiation vnd gemanckter werck öffentlich verworffen wirt vom Apostel I. Cor. II. da er deutlich spricht von dem gesegneten brot / Der Mensch prüfe sich selbs / vnd als denn esse er von diesem Brot etc. Item / Wer vnrwürdig von diesem Brot isset etc.

Vnd

## Widerlegung des

Vnd wiewol vnser Widersacher  
allerley Kencke erdencken vnd herfür  
bringen/ mit denen sie vermeinen / die  
wort Christi zunerdrehen vnd zu den-  
ten / So sollen wir doch das ansehen  
Christi bey vns viel mehr gelten / vnd  
grösser sein lassen / Das wir an seinem  
Mund vnd worten fest halten vnd  
hangen / den das wir dauon vns / auff  
ir menschliche vnd vernünfftige vngewis-  
sige Trewme solten führen lassen / Da-  
mit sie Christo / beide seine Ehre vnd  
Warheit vernichtigen / vnd gantz vnd  
gar vngewis machen.

So wir aber den worten Christi  
im grund / vnd wie sie an jnen selbs  
sind / recht vnd fleissig wollen nachfor-  
schen / So begreiffen sie zwey stück  
in sich / Eines das Wesen / Das an-  
der den Brauch. Vnd dieweil die  
wort von diesen beiden / eigentlich vnd  
vnterschiedlich reden vnd leren / So  
müssen sie vnuermengelt vnd vnuers-  
mischet bleiben vnd gelassen werden.

Denn

Den  
quell  
mere  
nung  
net v

Nach  
Der  
seiner  
esset  
nam  
das  
nutz  
zeige  
Der  
euch  
thut

scher  
gene  
vnd  
het

Denn dieser zweier vermengung ist ein  
 quell/ vrsprung vñ vrsach aller schwer  
 merey vnd Irrthum / dadurch die ordz  
 nung vnd einsetzung zu rüttet / getren  
 net vnd verfinstert wird.

Das Wesen oder Materiale des  
 Nachtmals zeigen vns diese wort /  
 Der Herr nam das Brot / gab es  
 seinen Jüngern / vnd sprach / Nemet /  
 esset / das ist mein Leib. Item / Vnd er  
 nam den Kelch etc. Das ist mein blut /  
 das für euch vergossen wird etc. Den  
 nutz / frucht / vnd wozu es eingesetzt /  
 zeigt vns Christus mit diesen wortē /  
 Der für euch gegeben / Vnd das für  
 euch vergossen wird etc. Item / Das  
 thut zu meinem gedechtnis.

So bald wir vns nu diesen vnter  
 scheid / den vns Christus mit seinen ei  
 genen worten gemacht hat / nemen /  
 vnd vns dauon treiben lassen / So ste  
 het die Thür vnd eingang den Sophi  
 sten

sten zu allen Irrthumen offen. Denn wenn sie von dem wesen vnd substanz des Sacraments sagen sollen / So fangen sie arglistig an von desselbigen frucht vnd wirkung / mit grossem prechtigem schein zu schreien / Auff das sie also dem einfeltigen Leser eine Nasen machen / vnd betriegen mögen. Da wir aber fest vnd vnberweglich an der Einsetzung vnnnd worten Christi halten / vnd bey dieser Ordnung beharrlich bleiben / So können vns die schwärmer nimmermehr von dem rechten natürlichen Verstand dieser wort / mit irem getreumten deuten abführen / vnd eine falsche Deutung auffdringen.

Denn Christus / da er seine Jünger im anfang der Einsetzung / zum Nachtmal reitzen vñ locken wil / reicht er inen das Brot vnd Wein / vnd sagt ausdrücklich / Das er inen hiemit gebe seinen Leib vnnnd Blut / Wie das wörtlin 1076 / Das ist mein Leib / Das ist

ist m  
Dem  
auff  
hanc  
schw  
vñ de  
vñ zu  
seiner  
nicht  
lich  
daru  
gar v  
Blu  
  
vleis  
bey d  
teil b  
lich  
Ite  
hebb  
heil  
sie  
den  
  
ist

ist mein Blut etc. klar ausdrückt. Denn er zeuget vnd deutet hie nicht auff sich selbs/ noch auff seine gantze handlung / wie es die fantastische schwermer deuteln/ Sondern er redet vñ deutet auff das/ das er inen zu essen vñ zu trincken darreicht/ Welchs nach seinen selbs klaren vnd durren worten/ nicht allein war das sichtiglich eusserlich Brot vñnd Wein/ sondern auch darunter innerlich/ vnd der Vernunfft gar verborgener weise/ sein Leib vnd Blut.

Diebey ist auch sonderlich vnd vleissig zu mercken/ Das der Herr bey diesem austheilen vnd reichen/ jedes teil besonders/ vñ für sich vnterschiedlich gedencckt / Das ist mein Leib/ Item / Das ist mein Blut/ Damit hebt er auff/ vnd macht der Papiisten heilos geticht gar zu nicht / Damit sie fürgeben / das vnter einer jeden Gestalt besonders so viel sein

D ij

solt/

## Widerlegung des

solt / als vnter beiden semplich. Item  
er schlegt zu gleich auch darnider der  
Sacramentschwermer irrehum / wel-  
che diese wort schendlich / vbel / vnd  
gantz verkerter weise / auff eine geist-  
liche niessung vnd empfangunge des  
Nachtmals / ziehen vnd deuten. Denn  
diese zwifachtige anziehung der wort  
Christi / bestetiget deste gewisser die  
gegenwertigkeit des Leibs vnd bluts  
des D<sup>er</sup>rn. Darnach so eigenet sie  
auch den Leib vnterschiedlich zu dem  
Brot / vnd das Blut dem Wein. Wel-  
che vnterschiedliche Austeilung vnd  
zueigung des Leibs vnd Bluts mit  
nichten auff die geistliche Communi-  
on oder niessung sich reimen kan oder  
wil. Denn in der geistlichen Commu-  
nion wird beides in einem jeden stück  
empfangen.

Das beweiset auch eben das Relat-  
tiuum Quod & Qui (der vnd das) Als / Der  
für euch gegeben. Vnd / Das für euch  
ver-

verg  
nen  
vnd  
gürli  
Leib  
ders  
sich  
doch  
bede  
den  
das  
vñ in  
dass  
er h  
verg  
Sü  
lich  
uel/  
ein  
sich  
noc  
zu v  
hö



vergossen wird etc. Nemlich / Das er  
 jnen zu empfaben darreiche im Brot  
 vnd Wein / nicht einen bedeuteten fi-  
 gürlichen / Metonymischen geistlichen  
 Leib noch Blut / das ist / etwas an-  
 ders / darunter der Leib vnd Blut an  
 sich selbs warhafftig nicht sey / Aber  
 doch gleichwol seinen Leib vnd blut  
 bedeute / vnd darunter wolte verstan-  
 den oder bezeichent haben / Sondern  
 das jenige / so er jnen im Brot zu essen /  
 vñ im Wein zu trincken darbiete / Eben  
 dasselb sey der Leib vnd das Blut / den  
 er hernach für jre Sünde geben vnd  
 vergiessen werde / zu Vergebung der  
 Sünden.

Was ist aber das für ein vnbil-  
 licher / trotziger / vnd vermessener Fre-  
 uel / vnd erschrecklicher Grewel / Das  
 ein Mensch aus lauterm mutwillen  
 sich darff vnterstehen / des er kein fug  
 noch befelß hat / in Gottes sachen / die  
 zu vnser Gewissen / Weil vnd Trost ge-  
 hören / Christo seine eigene vnd so gar

D iij                      deuta

## Widerlegung des

deutliche wort vnd werck zu verkeren  
gar in einen andern Verstandt vnd  
werck bringen / vnd lauter deutung  
vnd eusserliche werck vnd zeichen dar  
raus machen / Vnd Christi wort vnd  
werck / Menschlichen Metaphoris vnd  
Metonymijs vnuerwerffen : Gleich  
als hette Christus nicht gewusst / was  
er thun / vnd wie er dasselb anstellen  
vnd mit was worten er es reden vnd  
befelhen solte.

Darnach leren vns auch die wort  
des D<sup>n</sup>Ern / Das für euch gegeben  
vnd für euch vergossen wird. Item  
Solchs thut zu meinem Gedechtnis /  
den rechten Brauch / vnd wazu man  
es empfahe sol / Als nemlich / Das  
durch dis Sacrament der Glaub im  
hertzen / als durch feste Gründe vnd  
Siegel der vergebung der Sündē be  
stetigt vnd gewis gemacht werde /  
Vnd das / die es im rechten Glauben  
empfahe / teilhafftig werden / vnd  
sind



sind aller gaben/ vnd des gantzen verdiensts vnd gehorsams Christi / vnd alles des/ das er damit verdienet / erworben vnd ausgerichtet hat.

Das aber dis der rechte feste/ beständige/ vnd warhafftiger Verstand sey der wort des D. Erri/ Das wölen wir auch mit andern Sprüchen Gottes Worts beweisen vñ dardun.

I.

**E**s ist eigentlich gewis / vñ vnleugbar / Das Christus anders nichts hat eingesetzt noch gestiftet / denn das er willens vnd bey sich gründlich beschlossen / vnd im zu ordenen fürgenomen hat / Darumb solman auch den Verstand seines willens vnd meinunge / aus den vnzerrenten vnd vñerrückten Worten seines Mundes / in aller zuuersicht nemen / Vnd / wie man sagt / den Stein nach dem Winckelmas / Aber das

D iij Wina

## Widerlegung des

Winkelmas nicht nach menschlichem gutdüncken setzen / lencken / oder richten.

### II.

**W**Dan vielen orten von einerley Sach vnd thun / einmütig vnd mit einerley Wort vnd weise bezeuget vnd geredt wird / Da sol man die einfeltige wort vñ meinung / an ir selbst / on frembden Verstand vnd deutung nemen / vnd fest behalten. Tu reden vnd zeugen die drey Euangelisten mit S. Paulo auff einerley weise vnd wort / vnd stimmen in allen gleich von dem Nachtmal. Darumb sol man bey iren Worten / vnd derselben einfeltigem Verstand / wie der in den Worten begriffen / vnd vns fürgehalten wird / fest beharren vnd bleiben.

Was der Euangelisten wort betrifft / Ist gewis vnd eigentlich einerley wort vnd meinung. Denn ob wol S. Lucas etwas wenig andere wort brauchet

branchet / da er sagt / Das ist der kelch /  
das newe Testament in meinem blut /  
Welchs die andern also geben / Das  
ist mein blut / des newen Testaments.  
So ist es doch an jm selbs in der war-  
heit einer meinung / Nemlich / das ei-  
gentlich vnd warhafftig im Nacht-  
mal empfangen werde das blut Chri-  
sti / Vnd damit das Testament vnd  
ewiger Bund der vergebung der Sün-  
den / welchen Gott durch seines So-  
nes tod vnd Blut gemacht hat / bestet-  
iget vnd versiegelt werde.

Über das / Was köndte doch je-  
mals herrlichers vnd klerlichers diese  
vnser meinung zu bezeugē / vom nachts-  
mal geredt werden / denn wie S. Pau-  
lus 1. Corin. 10. dauon leret? Als mit  
den Klugen rede ich / Richtet jr was  
ich sage / Der gesegnete Kelch / wel-  
chen wir segnen / ist der nicht die Ge-  
meinschaft oder niessung des Blutes

H v Christe

## Widerlegung des

Christi etc. An diesem ort sagt er sa  
deutlich vnd vernemlich / Das des  
Brots brechen sey der Leib / Vnd der  
Kelch des Bluts gemeinschaft vnd  
niessung. Es bekennen aber numals  
auch die Widersacher / Das das Grie-  
chisch wörtlin *κοινωνια* an dem ort die  
Niessung bedente. Derwegen kan im  
Abendmal des HErrn / nicht ein be-  
deutung / Figur oder zeichen des Leibs  
oder Bluts sein / Wie die alten vnd  
newen Zwinglianer / vnd Calvinus  
wehnen.

### III.

**W**eiter sagt S. Paul 1. Cor. 11.  
Welcher nu vnwirdig von die-  
sem Brot isset / oder von dem  
Kelch des HErrn trincket / Der ist  
schuldig an dem Leib vnd Blut des  
HErrn. Der kan aber eines dinges  
nicht schuldig gehalten noch gespro-  
chen werden / mit gutem Grund / Der  
nur

nur die Figur / das Gemelde oder  
 schatten desselbigen verachtet oder  
 misbrauchet / Vnd nicht mit der that  
 wirklich an demselbigen dinge sich  
 vergreiffet / das von jederman sol hoch  
 vnd yber alles heilig gehalten wer-  
 den. Da nu dem also ist (wie der Apo-  
 stel klerlich bezeuget) So mus je ei-  
 gendlich vnd warhafftig der Leib vñ  
 das Blut Christi im Nachtmal em-  
 pfangen werden. Denn so das nicht  
 were / Wie kündte jemand daran schul-  
 dig werden / Oder jm das Gericht  
 daran essen oder trincken? Ja es were  
 auch wol kein wirklicher vnd war-  
 hafftiger Misbrauch.

Diese wort S. Pauli verstehet  
 Cyprianus auch also / in der 5.  
 Predigt / de lapsu, am 221. blat / da er  
 spricht / Wenn die Götzendierer  
 stzt von des Teuffels opffern vnd  
 Altarn herlauffen / platzen vñnd  
 fallen sie den Leib des Herrn  
 im

## Widerlegung des

im Nachtmal an / mit Weulern / die  
noch nach den Götzenopffern stincken.  
Vnd S. Ambrosius / da er den Keiser  
Theodosium straffete / nach dem be-  
gangenen Mord an den Thessaloni-  
chern / hat on zweuel auff diese wort  
S. Pauli gesehen. Denn so spricht er /  
wie darffestu diese deine blutige hand  
ausreckē / vnd damit nach dem aller hei-  
ligsten Leib des D<sup>n</sup>Ern greiffen? Vnd  
wie wiltu das thewre Blut des D<sup>n</sup>Ern  
in deinen Mund nemen / Der du  
so gar vnfinnig vnd aus lauter des  
Teuffels eingeben / so viel vnschuldigs  
Bluts vergossen hast? Darumb heb  
dich jmer fern hinweg / vnd vnterstehe  
dich nicht / dein vorige gottlose Misse-  
that / mit noch grösserer Gottsleste-  
rung zu mehren vnd heuffen. Theo-  
doretus lib. 5. cap. 18.

### IIII.

**C**hristus spricht / Das ist  
mein Leib / der für euch gegeben  
wird.

wird. Das ist mein Blut / das für  
 euch vergossen wird / etc. Tu ist je ge-  
 wislich ja das Brot nicht für vns ge-  
 geben / Noch der Wein für vns ver-  
 gossen. Darumb kan vnd mus im  
 Nachtmal vns nicht allein das Brot  
 vnd Wein / Sondern auch der rechte  
 ware Leib vnd Blut gereicht werden /  
 Als die für vnser Sünde gegeben vñ  
 vergossen worden sind / Sonst müste  
 folgen / Das nicht der Leib Christi /  
 Sondern etwa ein Gespenst oder  
 Schatten am Creutz für vns gegeben  
 worden were. Es müsten auch mit  
 der weise / die lieben Propheten vnd  
 Aposteln allzeit mit frembden Vera-  
 stand vnd eitel Deutunge verstanden  
 werden / wie oft sie leren / Das wir  
 durch den Leib vnd das Blut des  
 Herrn erlöset sind / Als im Zach.  
 Sie werden wol gewar werden / wen  
 sie gestochen haben. Item am 9. Du  
 lessest durch das Blut deines Bundes  
 aus /

/die  
 ken.  
 eiser  
 a be-  
 oniz  
 wort  
 t er/  
 and  
 r hei  
 vnd  
 Die  
 r du  
 des  
 wigs  
 heb  
 tehe  
 risse  
 este  
 heo  
 Ist  
 eben  
 ird.



aus/deine Gefangene aus der Gru-  
ben / da kein Wasser in ist. Vnd S  
Petrus sagt / Wir sind erlöset durch  
das Blut des unschuldigen Lamb-  
lings.

## V.

**E**s ist ein grosser vnterscheid  
vnter dem essen vnd trincken  
des Leibs vnd Bluts Christi/  
wie es die Altueter gessen vnd getrun-  
cken haben / zunor vnd ehe denn er ge-  
boren ist / Vnd vnter dem empfangen  
des Sacraments / wie er es vor seinem  
Leiden gestiftet vnd eingesetzt hat.  
Denn sonst hette Christus vergeblich  
vnd one ursache dis aller heiligste  
Nachtmal eingesetzt / Vnd vns in dem  
selbigen seinen Leib vñ Blut / verheis-  
sen vnd dargegeben. Nu ist gewis-  
lich vnd ungezweimelt war / Das wir  
alle jres geistlichen essens / so wol als  
sie ( Die doch dis Nachtmal gar  
nicht

nicht gehabt haben) teilhafftig / vnd  
 desselben mit nichten ausgeschlossen  
 sind. Derhalben ist nötig im Nacht-  
 mal des D<sup>er</sup>rn / vber die geistliche  
 niessung seines Leibs vñ Bluts / Das  
 man eine Leibliche zugebe vnd bestetia-  
 ge. Darans den weiter folget / das die  
 Sacramentschwärmer / die wort des  
 Testaments Christi / mit jener Geis-  
 tlichen Speis schendlich vermengen /  
 Vnd damit dem Testament Christi /  
 seine gebürliche Ehre stelen vnd rau-  
 ben.

VI.

**I**n einem Testament pflaget  
 man keiner verblümeten wort  
 zu brauchen / Sondern der Tes-  
 tator / der es auffrichtet / lesst es mit  
 deutlichen vnd klaren worten verfas-  
 sen / Wie es den auch in den Keiserliche  
 Rechten versehen / Das man die Testa-  
 ment deutlich vnd eigentlich stellen  
 vnd machen solle. Das Abendmal ist  
 des Sons Gottes Testamēt. Darumb  
 ist

## Widerlegung des

ists gewis / das der Son Gottes in  
der Stiftung dieses seines Testa-  
ments / nicht figurate / Sondern pro-  
prie / Nicht mit verdeckten / Sondern  
mit hellen vnd durren Worten geredt  
vnd sein Testament eingesetzt hat.

### VII.

**A**lle Artickel des Glaubens wer-  
den von Gott seiner Kirchen / mit  
eigentlichen vnd Verstandigen  
Worten fürgetragen. Die Lere vom  
Nachtmal ist ein Artickel des Glaub-  
bens. Derhalben ist gar kein zweifel /  
Das die Lere vom Nachtmal der Kir-  
chen / auch mit eigentlichen vnd vn-  
verblümbten Worten sey fürgetragen  
worden.

### VIII.

**D**ie Sacrament des alten Tes-  
taments sind Bedeutunge /  
Schatten / vnd Gemelde ge-  
wesen des neuen Testaments. Dar-  
umb

umb was dort durch der Dehsen vnd  
 ander Thier blut ist bedeutet worden/  
 Das ist nu hie wircklich mit der that  
 in diesem / durch Christum warhafft-  
 tig erfüllet. Derhalbē kan das Nachtmal  
 nicht mit Grund allein für ein  
 schlecht Liebs vñ denckzeichen gehalten  
 werde/ oder für ein beutpfenning/  
 Den etwa ein guter Freund dem an-  
 dern seiner dabey zu gedencken / in ei-  
 ner Zech oder Gesellen Collation  
 schencket / Sondern für ein solch  
 Nachtmal / Darin Christu s sein Leib  
 vnd Blut austeilet. Dadurch er sich/  
 als mit einem beständigen Pfand / mit  
 seinen Auserwelten vnd der Kirchen  
 seines ewigen Gnadenbunds / den er  
 durch seinen Tod mit inen gemacht  
 hat / verpfendet vnd verpflichtet / Vnd  
 darinnen einem iglichen in sonderheit  
 seine gantze Wolthat verspricht.

IX.

**S** Anct Paulus zun Ebre. 9. da  
 Ser das Alte vnd Newe Testa-  
 ment

## Widerlegung des

ment mit einander vergleicht / zeucht  
aus dem andern Buch Mose am 24.  
Cap. diesen Spruch an / Das ist das  
Blut des Testaments / das Gott euch  
gebotten hat. Welcher Spruch wol  
zu mercken ist. Denn die Widersacher  
nemen den vrsprung dieses allerheilig-  
sten Sacraments / von gemeiner ge-  
sellschafft guter Freunde / Welche et-  
wa von einander scheiden / vnd zum ge-  
dechnis ein Valet geben / essen vnd  
trincken mit einander / Damit sie sich  
vnd andere vberreden / das dieses Sa-  
crament nicht anders / deñ ein schlecht  
Gedenckzeichen guter Freundschafft  
sey von Christo eingesetzt. Aber die  
Schrift zeigt deutlich an den vrs-  
prung dieses Sacraments / aus den  
Bündnissen des alten Testaments /  
Derhalb sie deñ auch derselbigen Na-  
tur vnd Eigenschafft / etlicher massen  
deuten vnd anzeigen.

Nu war der Brauch bey den Ma-  
ten /

ten/das/Wenn sie einen Bund wol-  
 ten machen oder wider renewen vñ be-  
 stetigen/ Das man ein Kind opfferte/  
 Danon nam man ein teil des Bluts/  
 opfferts vnd brachts allein für Gott/  
 Vnd das ander vberige vom Blut/  
 sprenget man vber das volck/so zu sol-  
 chem Bund gehöret / vnnnd bey dem  
 Opffer gegenwertig war. Wie nu zur  
 selbigē zeit/ zu des Bunds bestetigung  
 nicht etwas anders/dadurch das blut  
 solt bedentet sein/ Sondern das Blut  
 an im selber Gott geopffert / vnd auff  
 das Volck gesprengt ward / Also tei-  
 let in diesem Bund / vnser Bundherr  
 vnd Bundmacher / zu seiner Bunds  
 bestetigung / zwischen Im vnnnd sei-  
 ner Kirchen / auch nicht andere oder  
 frembde Zeichen aus / Sondern sei-  
 nen eigenen waren Leib / Den er zum  
 Weil des gantzen Menschlichen Ges-  
 schlechts geopffert / Vnd sein selbs ei-  
 gen Blut / Das er vns damit zu erlö-  
 sen am Creutz vergossen hat. Vnd wil

J 4 von

## Widerlegung des

von vns haben / das wir vns allzeit  
fest an dis sein Testament halten sol-  
len / vnd vnsern Glauben daran ster-  
cken vnd fest gründen.

Weiter / so sollen die wort / Das  
ist das Blut des Testaments / in irem  
eigenem rechten verstande / von dem  
Blut des gegenwertigen Bundopff-  
fers / klar außser / vnd one einige andere  
deutunge / Wie sie an sich selbs la-  
ten / vnd im werck des Opffers so bald  
augenscheinlich geschehen / verstan-  
den werden. Gleicher weis sol es mit  
des D<sup>er</sup>rn Nachtmal auch gehalten  
werde / Das man die einfeltigen wort  
des D<sup>er</sup>rn in irem rechten Verstand  
behalte / Vnd nicht gestatten / Das sie  
auff einen andern Verstand gedeutet  
vnd gezogen werden.

X.

**J**hannes sagt in seiner 1. Ep<sup>ist</sup>  
1. Capitel / am 5. Capit. Dieser ist /

der da kompt mit Wasser vnd Blut/  
 Ihesus Christus. Nicht mit Wasser  
 allein/ sondern mit Wasser vnd blut/  
 Vnd der Geist / der da zeuget / Das  
 Geist Warheit ist. Denn drey sind die  
 da zeugen auff Erden/ Der Geist/ vñ  
 das Wasser/ vnd das Blut/ Vnd die  
 drey sind beisamen. In diesen worten  
 redet der Apostel eigentlich von den  
 Sacramenten/die Christus eingesetzt  
 vnd gestiftet hat. Vnd wie er mit dem  
 wort(Wasser) wil die Tauffe verstan-  
 den haben/wie es alle Scribenten ein-  
 helliglich dafür halten / Also meinet  
 er auch (wie aus dem vorigen nicht zu  
 zweiueln ist) mit dem wort/ Blut/die  
 gantze Einsetzung dieses Testaments/  
 Vnd fasset alle beide Sacrament zusa-  
 men. Vnd ist gar ein liebliche weise zu  
 reden / das er spricht / Christus kome  
 mit Wasser vnd Blut/ Als wolt er sa-  
 gen / Christus ist selbs warhafftig in  
 I iij seinen

allzeit  
 en sol  
 n sterb  
 / Das  
 n jrem  
 n dem  
 dopf  
 andere  
 s lau  
 bald  
 rstan  
 es mit  
 halten  
 wort  
 rstand  
 Das sie  
 deutet  
 . Epl  
 r ist/  
 da



## Widerlegung des

seinen Sacramenten / Vnnd handlet  
gegenwertig darinnen mit einem jglic  
chen / Machtet einen Bund mit vns/  
verbindet vnd vereinigt sich so gar mit  
vns / das wir mit jm eines werden.

Darnach spricht er / Diese drey  
Wasser / Blut / vnd Geist / bleiben al  
hie auff Erden / Damit fasset er den  
heiligen Geist vnd die Sacrament zu  
samen / Wie S. Paulus zu seinem Ti  
to spricht / Cap. 3. Das vns in den Sa  
cramenten alle Wolthaten Christi /  
durch den Glauben / zu eigen geben  
werden / Ja es wird vns nicht allein  
warhafftig die Sünde darin verge  
ben / Sondern auch der heilige Geist  
selbs vnd reichlich in der Tauffe vber  
vns ausgegossen / Das er in vns wir  
cke / vnd einen newen Gehorsam an  
richte.

Weiter spricht er / Denn die drey  
sind / die da zeugen / das ist / die Tauff  
vnd Nachtmal des W. Ern sind Sa  
cramenta

eramenta / durch welche der heilige Geist zeuget von Christo / Das er vns durch seinen Gehorsam vnd Opffer / als durch eine Bezalung von der gewalt der Sünd vnd Tod erlöset / Vnd zum Erbe der ewigen Gerechtigkeit vnd Seligkeit widerbracht habe. Vñ eben dasselb zeuget auch der Herr Christus mit diesen seinē eigenen Worten im Nachtmal / Das er vns darumb sein Blut zu empfahe / gebe / Das es ein zeuge sey dieses seines ewigen Bunds / Den der Vater / durch dieses seines Sons Blut vergossen / mit vns / vnd seiner Kirchen gemacht vnd versprochen habe.

Für allen dingen aber ist wol vñ vleissig zu mercken / Nemlich / das er spricht / Das Blut zeuget etc. So es denn auff Erden zeuget / So mus vns widersprechlich folgen / Das es im Nachtmal warhafftig vñ wesentlich gegenwertig empfangen werde. Darumb kan auch dis Blut / das auff

J iij      erden

## Widerlegung des

erden zeuget / kein Schatten sein / als  
durch etwas anders bedeutet / Auch  
kan es nicht die vergebung der Sün-  
den sein / Noch die geistliche Gemein-  
schafft / Dadurch Christus durch sei-  
nen heiligen Geist in vns wonet / Vnd  
vns in zu eigenen gliedern auffnimpt /  
Sondern es mus das ware vnd wes-  
sentliche Blut selber sein / Das am  
Creutz vergossen ist / vnd doch nicht  
allein im Glauben / Sondern auch  
mit dem Munde / im Nachtmal emp-  
fangen wird.

Diesen schönen Spruch des Ap-  
ostels / sol man vleissig behalten.  
Denner kompt gar fein mit des Wör-  
ren Christi einsetzung vberlein / Vnd  
erklärer zu gleich S. Pauli wort. Denn  
da S. Paulus sagt / Dieser Kelch ist  
das newe Testament / in meinem blut /  
Das redet S. Johannes auff diese  
weise / Das Blut zeuget / oder ist ein  
Zeuge des newen Testaments / Das  
durch

Irth. der Zwinglianer. 61.

durch es betreffiget / volzogen / vnd  
der Bund / durch das Blut / Tod / vnd  
Opffer Christi mit vns gemacht / ver-  
sichert werde.

Vnd es lest sich ansehen / als zie-  
hen sich diese wort / nach den worten  
des Alten Testaments / Dis ist das  
Blut des Testaments / das Gott ge-  
boten hat. Denn wie das Testament /  
vnd der Bund / Den Gott mit seinem  
Volck ernewart / durch das Blut / weñ  
es Gott geopffert / vnd auff das Volck  
gesprenget war / bestetiget ward / Al-  
so wird auch jtz auff erden im Nach-  
mal / der Bund / Den Gott durch das  
theure Pfand des Leibs vnd Bluts  
Christi / mit vns hat auffgerichtet /  
vnter vns einem jeden bestetiget vnd  
versichert.

Darumb wollen wir auff der ein-  
feltigen Meinung der wort Christi  
fest beruhen vnd bleiben / Vnd mit den  
subtilen scheinlichen Deutungen / Die

I v da aus

## Widerlegung des

da aus der Vernunft erwachsen/  
nichts zu schaffen haben / inen keinen  
Glauben geben noch beifallen. Denn  
sie treten vñ weichen von dem Grund  
der wort Christi / Vnd verstellen vnd  
vermenteln all jr ding / in eitel Figu-  
ren vnd Schatten / vnd frembde Deu-  
tungen.

**Widerlegung**  
der Gegenrede der Widersä-  
cher / Die sie zu wider dem Grund  
des Wortes Gottes / vnd Aug-  
spurgischen Confession / in  
iren Büchern für  
bringen.

Wie

**S**

Irwol wir in der Con-  
 firmation vñ gründ-  
 lichen beweifung des  
 waren grundes vom  
 Nachtmal / zu gleich  
 viel vnrichtigkeit der  
 Widersacher irrthum  
 angezeigt / vnd mit einbracht haben/  
 Dieweil wir aber fürnemlich sollen  
 den einfeltigen lieben Christen rathe-  
 So sollen wir billich vmb irer / vñ  
 aller der willen / so die Augspurgische  
 Confession mit vns bekennen / auch  
 der alten vnd newen Zwinglianer ge-  
 genrede widerlegen / Damit wir mit  
 gutem waren Grunde / den einfelti-  
 gen weisen vnd vrsach geben / Wie sie  
 sich für iren listigen vnd vernünfftigen  
 Irrthumen fürsehen / vnd dieselben  
 fliehen sollen.

## I.

**C**hristus ist gen Himmelfahrt  
 vnd sitzet nu mehr zur Rechten  
 des

## Widerlegung des

des Vaters / an einem gewissen vnnnd  
besondern orte. Darumb istes vnnnüg  
lich / das sein Leib vnnnd Blut / war-  
hafftig vnd wesentlich künde im Sa-  
crament empfangen werden. Darauf  
antworten wir / Die Auffart Christi  
ist nicht eine solche verenderung des  
Orts / Wie wir Menschen / wenn wir  
wandern vnd reisen / den ort da wir jetzt  
sind / bald endern / Vnd hernach an  
dem orte sind / da wir hin verreisen /  
Oder das Christus auff solche weise  
gen Himel gefaren / solte nu mehr  
sein Kirchen verlassen / vnd nicht mehr  
wesentlich bey jr sein / Sondern es ist  
die herrliche Offenbarung / darinnen  
Christus die göttliche Macht / die er  
von ewigkeit mit dem ewigen Vater  
gleich gehabt / Nu aber in der angeno-  
menen gestalt eines Knechts / in der  
menschliche Natur bekleidet / die auch  
aller Welt darinnen verborgen gewes-  
sen / in dem Geheimnis hat volbracht  
vnd ausgericht.

Auch

Auch heisst die rechte hand Gottes / nicht wie in Menschen reden / ein bestimmter vnd abgemessener Ort / Wie wir von zeitlichen dingen reden vnd zu sagen pflegen / Der sitzt dem Könige an der rechten seiten / Sondern wie Gott kan an keinem ort oder stedt gefasset / noch beschlossen werden / Also erfüllet seine Rechte alles / vnd ist an allen Orten gegenwertig / Wie solchs Isaias beweiset / am 66. da er spricht / Der Himmel ist mein Stuel / Vnd die Erde ist mein Fusschemel. Vnd Jere. 23. Bin ich nicht der Gott / der Himmel vnd Erden erfüllet? spricht der HERR.

Vnd ist die weise also zu reden (Er sitzet zur rechten Hand Gottes) genommen aus gemeiner gewonheit / wie wir teglich pflegē in gemeinem brauch zu reden / Damit dem einfeltigen mandeste Klerer zu weisen / vnd verstehen zu geben / die gleiche allgemeine Herrlichkeit

## Widerlegung des

ligkeit des sons mit dem Vater. Aber dieselbe Maiestet vñ allmechtige Herr-  
ligkeit / hindert oder numpet dem Leib  
vnd Blut nichts / Das sie nicht zu-  
gleich auch künden vnuerhindert war-  
hafftig im Nachtmal sein / Sondern  
sie bestetiget dieselben viel mehr. Denn  
wenn die Menschheit Christi zur Rech-  
ten Gottes / mit der göttlichen Herr-  
ligkeit in vnzerrenlicher Gemein-  
schafft vnd persönlicher Vereinigung  
sitzet / Was ist es denn jmer für ein vn-  
sinnigkeit / darumb sie die leibliche ge-  
genwertigkeit vom Nachtmal wollen  
ausschliessen.

Darumb was Zwinglius / vnd  
Calvinus / mit jrem Anhang hiebey  
fürgeben / Als seien diese dinge gantz  
vñ gar vnmüglich / Dawider sol man  
jnen diese Antwort geben / Das Chris-  
tus / was er geredt vnd zusagt / seiner  
allmechtigen macht / vnd eigenen wil-  
len nach / gar wol vnd mit Wahrheit  
halten vnd beweisen kan.

Die

Dieweil denn in der Einsetzung  
 des Nachtmals ist verheissen/ vnd mit  
 ausgedruckten Worten allen verspro-  
 chen wird / Das er men hiemit seinen  
 waren Leib vnd Blut bis zum ende  
 der Welt / mittheile / So sol auch nie-  
 mand an derselben Verheissung Chris-  
 ti/ ichtes zweineln. Vnd lieber / Was  
 solte doch dem hieran etwas vnmüg-  
 lich sein zu können / Der seine Men-  
 scheit wider aller Natur möglichkeit/  
 oder Verstand von einer vnuersehten  
 Jungfrawen / an sich heilig vnd one  
 Sünde genommen hat. Vnd hat diesel-  
 be angenommene Natur mit der gött-  
 lichen Derrligkeit so wunderbarlich vnd  
 vnausforschlich persönlich vereinig-  
 get / Ja er ist auch in derselben Verei-  
 nigung gestorben/ vnd in die Helle ge-  
 faren / Vnd hat sie aus dem Tod vnd  
 Hellen widerumb erweckt / vñ in das  
 ewig leben vber alle Dimel zur Rechs-  
 ten Gottes gebracht vñd versetzt.  
 Da auch nu mehr Im nicht allein  
 nach

## Widerlegung des

nach der Menschheit ein geringe Kleinheit /  
Sondern alle Macht gegeben ist / in  
Himmel vnd Erden / zu wonen in aller  
glaubigen Hertzen / als das Heubt  
vber den gantzen Leib / vnd alle Glieder  
der / vnd Bein von vnsern beinen / Vnd  
dasselb nicht auff eine bestimpte zeit /  
Sondern bis zu erfüllung aller zeit.

## II.

**W**eiter geben die Widersacher  
für / In Artikeln des Glaubens  
vnd Christlicher lere / wo  
die wort nach irem einfeltigen Laut /  
den Buchstaben nach zu hart lauten /  
Mus man einen förmlichen vñ gleich  
niessigen Verstand oder deutung dar  
innen sichen. Nu aber geben die wort  
des Nachtmals von des Leibs vnd  
Bluts Christi gegenwertigkeit / einen  
seer harten / vnd der Vernunfft vnge  
reimeten Verstand. Derwegen mus  
man solche vngeschickte Misuerstand  
zu vermeiden / die wort an irem selbs  
Laut

Laut  
glei  
dar  
wo  
sich  
umb  
nich  
Sin  
Gla  
auch  
vnd  
rück  
vmb  
bey  
Der  
das  
der  
such  
ding  
eigen  
gute  
getr  
lich



Laut fallen lassen / Vnd einen andern  
gleichmessigen verstand vnd Meinung  
darüber suchen.

Antwort. Wenn die einfeltigen  
wort / wie sie an sich selbs lauten / für  
sich selbs recht sind / Vnd es nur dar-  
umb zu thun ist / das es die Vernunfft  
nicht mag erreichen oder ergreifen /  
Sind aber wider keinen Artickel des  
Glaubens / vnd werden in der schrift  
auch an andern mehr orten gebraucht  
vnd widerholet / Sol man sie vnner-  
rücket vñ vnuerkeret fest behalten / Vnd  
vmb der nerrischen Vernunfft willen /  
bey Leib keinen frembden oder andern  
Verstand noch deutung suchen. Ober  
das / so sol alle Auslegung aus grund  
der Schrift / vnd aus den Orten ge-  
sucht vnd genomen werden / Da die  
dinge / dauon man erklerung bedarff /  
eigentlich vnd wol gehandelt / vnd mit  
gutem grund auff einerley meinung  
getrieben werden. Nu kompt je eigent-  
lich aller Missuerstand vom Nacht-

**K** mal /

## Widerlegung des

mal / aus lauter furwitz vnnnd Klügeln  
der Vernunfft / die sich vnterstehet zu  
forschen / Vnnnd weil sie es nicht errei-  
chen noch ergreifen mag / erdenckt sie  
andere Deutunge. Nu aber sind die  
wort wider keinen Artikel des Glau-  
bens / So haben sie vber das vier star-  
cker vnd gefaster Zengen / die es mit  
dergleichen vnd einerley worten wi-  
derholen. Darumb sol man in Keinen  
Weg / von der Euangelisten worten  
vom Nachtmal weichen.

Vnd ist wol ein Wunder / das die  
Sacramentschwermer sich an den  
worten des Nachtmals so hart stoß-  
sen / Dieweil sie doch sonst one das in  
diesem Handel / nicht geringere / vnd  
doch der Natur viel vnbegreiflichere  
dinge zulassen / Als das Christus mit  
seinem natürlichen Leib / durch ver-  
schlossene thür ingehet / Damit vber  
sich in die Höhe / vnd vber die Himel  
feret / vñ zur Rechten des Vaters sitzet /

So

So doch jedermenniglich / auch sie  
selbs bekennen / Es sey kein ort auffer  
oder vber dem Dimel. Item / Das  
kein Creatur mit Gott gleicher Ehr  
vnd macht zuergleichen ist.

Derhalben / Wie oft sie vns fürs  
werffen / Das der Leib Christi nicht  
könde im Brot verborgen empfan-  
gen werden / Nichts weniger wöllen  
wir jnen dieses / das sie selbs billichen  
müssen / wider entgegen halten. Vnd  
da sie sich als denn mit der allmechti-  
gen Macht Christi verteidigen wol-  
ten / Beruffen wir vns hinwider alle-  
zeit eben in diesem auch auff dieselben.

III.

**I**oha. 6. spricht Christus / Das  
Fleisch tang zu nichten / Der  
Geist ist / der da lebendig macht.  
Darumb mus im Nachemal allein  
sein das geistlich empfaben / Welchs  
gibt allein den Geist / vnd das Leben /  
Dasselb

A ij

Dasselb

## Widerlegung des

Dasselb aber kan das Sacramentisch  
vnd leiblich empfahen nicht geben.

Antwort. Diesen Spruch ziehen  
die Widersacher mit gewalt zum  
Nachtmal / So er sich doch gar nicht  
dahin reimet / Wie solchs der Handel  
an jm selbs leichtlich ausweist. Denn  
dazumal war das Nachtmal noch  
nicht eingesetzt. Zu dem ist am selben  
ort / das des **W**Ern Christi fürnem-  
ster Handel von dem geistlichen essen  
seines Leidens vnd Tods / Das durch  
den Glauben geschehen mus / Vnd  
nicht aus dem Sacrament herkömpt  
etc.

Was ist aber das für ein vnuer-  
schempter mutwillen / Das man dem  
**W**Ern Christo seine eigentliche rech-  
te meinunge / menschlicher vernunfft  
nach / aus lauterm fürwitz verkeret.  
Ober das / das diese wort gar nicht von  
Christi Leib / oder Fleisch / Sondern  
deutlich von vnser's Fleisches vnuer-  
mögen

mügen vnd blindheit reden / Das es die Geheimnis vnd Lere Christi zuergreifen vnd fassen / viel zu stumpff / vnd geschickt / ja gar ertödtet ist / Es werde denn zuuor anderswo her / Nemlich / durch den heiligen Geist erleuchtet / vnd zu Christi Erkenntnis gebracht. Denn so offtmals in der Schrift des fleischs wider den Geist gedacht wird / So wird allzeit damit bedeutet vnser fleisches verderben vnd vnrichtige vnordnung / dadurch wir getrieben werden zu allerley bösem fürsatz vnd Sünden / Es sey denn / das wir durch den heiligen Geist ernewet / Gott widerumb zu rechtem Gehorsam gebracht werden / als Rom. 8. So ir nach dem Fleisch werdet leben / So müsst ir sterben. Gal. 5. Das Fleisch gelüftet wider den Geist / vnd den Geist wider das Fleisch.

R iij Von

## Widerlegung des

### III.

**I**n denen dingen / die einander  
gleich sind / helt man auch ei-  
nerley. Wie oft nu im alten  
Testament Sprüche fürfallen / die ei-  
nen vngereimten verstand geben / So  
pfllegt man sie mit einer geschickten  
Auslegung zu deuten. Als / Das  
Lamb ist die Ostern. Item / Die Be-  
schneidung ist ein Bündnis etc. Dar-  
umb Missuerstand zu vermeiden in  
den worten / Das ist mein Leib etc.  
Mus man sie mit einer vernemlichen  
vnd begreifflichen Meinung ausle-  
gen.

Antwort. Die mus man wissen /  
Das ein grosser vnterscheid ist / vnter  
dem Volck Gottes im alten Testa-  
ment / vnd dem Volck im newen Te-  
stament. Denn jenen ward alle hand-  
lung der göttlichen Geheimnis ver-  
borgener weise in Schatten / Figuren  
oder Bildnissen / vnd Zeichen fürge-  
halten

halten / Welche hernach von Christo  
 ausgewickelt / Klar / vnnnd eigentlich /  
 vnd in irem selbs wesen sind geoffen-  
 baret vnd erzeiget. Darumb spricht  
 S. Paulus in der 2. Cor. 3. Das die  
 Herrligkeit des newen Testaments /  
 viel herrlicher vnd grösser sey / den des  
 alten Testaments / Vnd findet sich der-  
 wegen eben das Widerspiel allhie /  
 Nemlich / das / was im alten Testa-  
 ment ist vnter Figuren vnd Zeichen /  
 verdeckter meinung / dem Volck für  
 gehalten von dem künfftigen Chri-  
 sto / Das dasselb vns itzund wesent-  
 lich vnd leiblich / im newen Testament  
 wird geschenckt vnd gegeben. So sei-  
 let es auch noch weit / So man an ei-  
 nem Ort / oder andern / wenig mehr  
 Exempeln andere Deutung suchen  
 mus / Das es drum an allen Orten  
 durch aus / frey sein vnnnd gelten solt /  
 vnangesehen / Ob sie gleich an andern  
 viel Orten für sich selbs wolgegrün-  
 det vnd fest gefasset weren.

K. iij

Das

# Widerlegung des

## V.

**D**as Manna wird in der schrift  
ein Sacrament vnd geistliche  
Speise genennet Darumb em-  
pfehet man im Nachtmal auch allein  
einen geistlichen Leib vnd Blut des  
Hern.

Antwort. Wiewol es war ist/  
Das Manna auch ein Sacrament ge-  
nennet wird / So geschicht es doch  
nicht in dem Brauch / Art / vnd Ver-  
stand / wie man die Tauffe vnd Nachtmal  
ein Sacrament heisst. Denn es ist  
mit keiner Verheissung von der Gna-  
den / Weil vnd vergebung der Sünden  
gefasst. Darumb sol vnd kan es auch  
dem Nachtmal nicht verglichen wer-  
den. Zu dem so ist es gewis / Das das  
Manna dem Volck fürnemlich als zu  
einer leiblichen Speise gegeben wor-  
den ist / Vnd nicht das mer etwas geist-  
licher Wolthat dadurch solte wider-  
faren.

Es

Es streiten aber die Widersacher hefftig/ Das Manna werde eine geistliche Speise genent/ Darumb mus es für ein Sacrament gehalten/vnd darunter gezelet werden. Darauff antworten wir jnen aus Ambrosij Worten. Darumb wird Manna ein geistliche Speis genent/ Dieweiles nicht leiblicher oder natürlicher / Sondern wunderbarer weise / durch Gott von Himel heraber geschaffen vnd gegeben ist.

VI.

**S**ON einerley sol man einerley halten. Aber dieweil inn der Tauffe der Leib vñ Blut Christi / nicht empfangen wird. Darumb kan es auch nicht im Nachtmal empfangen werden. Denn diese Sacrament sind ja in gleicher vnd einerley würdigkeit vnd Heiligkeit / Vnd durch einen Christum zu einerley Nutz vnd Ursach geordnet vnd eingesetzt.

R v Antz

Es



## Widerlegung des

Antwort. Wiewol diese beide Sacrament einen Stifter vnd Einzsetzer haben/ Auch von einerley Nutz vnd frucht zeugen / Sintemal sie beide Zeichen sind der Gnaden Gottes gegen vns / vnd der vergebung der sünden/ So sind sie doch in dem eufferlichen sichtigen Zeichen oder mittel/ auch in der Action vnd handlung gar nicht gleich. Den im Nachtmal wird gesagt/ Das ist mein Leib / Das ist mein Blut. Item / Das Brot das wir brechen/ ist die Gemeinschaft des Leibes Christi. Aber mit der Tauffe hat es weit ein ander meinung vnd gestalt.

Das sie vns aber den Spruch S. Pauli fürwerffen / Wie viel ewer getaufft sind/ die haben Christum angezogen. Derauff antworten wir / Das S. Paulus mit denselben worten gar nicht redet von der niessung des Leibs Christi / Sondern von seinem Verdienst

dienst vnd Wolthaten / Wie man derselben müge vnd könne genieffen vnd teilhafftig werde / Wie er auch spricht Rom. 6. Wird sind in den Tod Christi getaufft. Nu reden aber diese Wort / Das ist mein Leib / eigentlich nicht vom Verdienst / Noch wie man desselben mus teilhafftig werden / Sondern von dem darbieten / vnd reichen feins waren Leibs / Welcher am creutz in die aller bittersten Schmeertzen vnd Tod gegeben ist / Das es also weit ein andere Meinung hat zwischen dem Nachtmal vnd der Tauff / Darumb kan das kindisch fürgeben nicht bestehen / Das / weil in der Tauffe der Leib vnd Blut Christi nicht sey / Darumb mus er auch im Nachtmal nicht sein.

VII.

**D**ie Sacrament sind geistliche Hende. Darumb sollen auch die wort (Das ist mein Leib) im

## Widerlegung des

im Nachtmal geistlich verstanden werden.

Antwort. Man sol in den hohen vnd göttlichen Sachen/die vnser Seelen seligkeit belangen/ nicht mit vngewissen vnd schweiffenden reden gawekeln/ oder ein Schertzgespött daraus machen. Denn man weis wol / das das wort Geist/vnd Geistlich wird etwa gebraucht / Damit zu vnterscheiden die leiblichen vnd eusserlichen Creaturen/von den vn sichtbarn / Als das heisst man geistliche Naturen / Gott/ Engel / Teufel / Seel ꝛc. Weiter heisst auch das geistlich / Das wol an sich Leiblich ist/ Jedoch hat es seine innerliche vnd heimliche deutung vnd verstand/Als das Manna / oder Himelbrot/vnd dergleichen viel im alten Testament. Endlich heisst man auch das alles Geistlich/ was zu vnser Religion vnd Seelen seligkeit gehöret/vnd von Gott zum geistlichen Nutz verordenet vnd gestellet ist/als Mittel vnd werckzeug/

zeug/ Durch welche der heilige Geist  
in vns wircket / Vnnd dadurch vnser  
Heil schafft / vnd fördert / zu Ster-  
kung vnd gründlicher bereitung vns-  
ers Glaubens.

Nach dem wir nu angezeigt ha-  
ben/die fürnemlichen bedeutung die-  
ses worts (Geistlich) So sollen wir nu  
acht geben / Das die Sacramentirer  
pflegen die Sacrament / vnd sonder-  
lich das Nachtmal des HErrn/geist-  
liche Dinge zu nennen/nach dem ver-  
stande im ersten ort vermeldet/Das sie  
sind etliche Figuren vnd fürbild allein  
der Vernunfft vnd menschlichen Ge-  
dancken vnterworffen ꝛc. Aber Sa-  
crament heissen eigentlich geistliche  
Dinge/angesehen die wirklichen vnd  
endlichen Ursache/Wie sie denn in die-  
ser letzten Bedeutung genommen wer-  
den/Also das sie von Gott / nicht aus  
natürlichen Ursachen entspringen /  
Auch iren geistlichen Brauch haben/  
vnd nicht leiblichen.

Es

Widerlegung des  
VIII.

**E**st die art vnd eigenschafft  
aller Sacrament/das sie etwas  
anders bedeuten. Denn daher  
heissen sie auch Geheimnis. Darumb  
wird auch der Leib vnd Blut im Sa-  
crament des Nachtmals nur bedeu-  
tet/vnd nicht wesentlich gereicht oder  
empfangen.

Antwort. Wir wissen auch/  
Gott lob/ seer wol / Das der Sacra-  
ment eigenschafft ist/ Das sie vns der  
heimlichen Gnaden/werck/ vnd wol-  
thaten vnsers lieben Gottes erinnern  
vnd ermanen/ Vñ seine werende Leute  
seligkeit vnd Freundlichkeit den Glei-  
bigen in das Dertz einbilden vnd ein-  
drücken. Darumb folget aber nicht/  
Das der ware Leib vnd Blut nicht im  
Nachtmal gereicht vnd empfangen  
werde/ Sondern das folget daraus/  
Dieweil die Sacrament etwas an-  
ders bedeuten/ Darumb ist auch das  
Sacra

Sacrament des Nachtmals ein Gnad  
denzeichen/ Dadurch wir des Todes  
Christi erinnert werden / Vnd ist ein  
Zeugnis seiner hertzlichen Liebe/ das  
mit er sein Kirchen so inniglich lieb  
hat.

Derhalben bestehet in diesem Ar  
tikel der grund vnser Lere/ den wir bis  
her in diesen Kirchen mit einmütigem  
Consens/ vnd einerley Bekentnis ge  
lert vnd verfochten/ Auch durch Gota  
tes Gnade/ mit der hellen Schrifft er  
halten haben / Vnd weiter erhalten  
wollen/ nemlich/ Das im Nachtmal  
der Leib vnd Blut Christi warhaff  
tig / vnd leiblich oder wesentlich ge  
reicht vñ ausgeteilet wird/ beide Wir  
digen vnd Unwürdigen / Vnd das das  
zu/ das vns dadurch die wolthat Chri  
sti deste füglicher vnd eigentlicher mit  
vnd zugeteilt/ vnd als mit einem Sie  
gel / auff vnser Dertzen versiegelt  
werde/ Auff das der Glaube in den  
Glaubigen von tag zu tag / gemehret  
vnd gestercket werde. Aus

## Widerlegung des

Aus dieser kurtzen vnd einfeltigen  
Erklärung der Wort vnd Einsetzung  
Christi/ Auch aus kurtzer vnd gründ-  
licher Widerlegung des Irrthums  
Zwingly/ Welche wir aus D. Lutheri  
vnd ander gewaltigen Schrifte kurtz-  
lich zusamen gezogen haben/ Können  
alle geschwinde vnnnd listige Schrif-  
ten Caluini/ liederlich vnd leichtlich  
widerlegt werden. Vnd ist das allzeit  
vnser Racht/ Das man sich halte/ vnd  
vnnerruckt fest bleibe bey der einfelti-  
gen vnnnd eigentlichen Meinung der  
wort Christi/ Auch für allen dingen  
dahin erbeite/ Das man dieselben rein  
vnd vnuerfelscht behalte/ denn das  
man sich mit grosser vnnnd sorglicher  
mühe/ mit den geschwinden vnd spi-  
tzigen Widersachern inn vnnütze ge-  
zencke einlasse/ Sonderlich weil es au-  
genscheinlich vn am tage ist/ Das die  
Lere vom Nachtmal/ wie sie in vnsern  
Kirchen geleret/ zur zeit Lutheri/ vnd  
noch fest/ vnd von allen Widersachern  
vnnumb-

enumbgestossen/noch heutiges tages  
bestanden vnd den Sieg behalten hat.

**W**iso haben wir bis anher gewal-  
tige vnd herrliche Zeugnis vnd  
Argument aus Gottes wort er-  
zelet/ Vnd zweineln nicht / Es sey das  
mit die Lere von der Gegenwertigkeit  
des Leibs vñ bluts Christi im Abend-  
mal gnugsam bestetiget. Wir haben  
auch alle fürnemste Gegenwürff der  
Sacramentirer/ also klar vnd deutlich  
widerleget/ Das wirs gentslich dafür  
halten / Es sollen alle Liebhaber der  
Warheit damit zu frieden sein. Das  
wir aber alhie/ alle ire listige vnd sub-  
tile Spitzfündigkeiten vnd Sophiste-  
rey nicht scherffer angegriffen / achten  
wir auch one not sein. Denn man an-  
ders nichts thete/ denn als wenn einer  
die Wasserwogen oder Wellen des  
Meers zelen wolte.

Derhalben so ist noch hinderstel-  
lig/ Das wir auch kurtzlich anzeigen/  
L
wie

## Widerlegung des

wie dieser Irrthum beide in der Augspurgischen Confession / vnd in der Apologia / Auch in den Schmalkaldischen Artikeln / vnd letztlich in der ganzen Lehre vnser Kirchen / für vnd für bestendiglich verdamnet sey.

Dem erstlich saget die Augspurgische Confession / Das vns im aller heiligsten Nachtmal des W<sup>ER</sup>rn / wahrhaftig der Leib Christi gegeben werde / Damit sie wegnimpt vnd aufhebt / alle ire figürliche / bedeutliche / ertichte / vnd phantastische messung des Leibes Christi.

Zum andern sagt die Apologia / Das auch wesentlich des W<sup>ER</sup>rn leib vns gereicht wird. Welches wort viel deutlicher strafft vnd verdamnet / alle ire ertichte / vernünfftige / figürliche vnd bedeutliche Metonymische messung vnd empfangung des Leibs vnd Bluts des W<sup>ER</sup>rn. Das ist aber wol zu mercken / das die Apologia saget / Solches

Solches sey der Latiniſchen vñ Griechiſchen Kirchen Lere allezeit geweſen / Vnd das ſie ſolchs beweise vnd beſtetige / So füret ſie auch ein den alten Lerer Cyrillum / Der ſolche gegenwertigkeit des waren Leibs vnd bluts Chriſti bezeuget.

Zum dritten / So verdammen vñ verfluchen viel Klerer vñnd hefftiger eben dieſen irrthum / auch die Schmal. Kaldiſchen Artikel.

**S**erſcheinet nu klerer / denn die liebe helle Sonne / Das die obzerzeleten Bücher vnſer Chriſtlichen Lere / Dazu alle vnſere Kirchen dieſen Irrthum allzeit verdamnet vñ widerleget haben. Derhalben ſo ſollen wir in denſelbigen Fuſſtapffen der Warheit / durch Gottes hülffe / auch beſtendiglich verharren vñ bleiben / Vñnd dieſen Irrthum von gantzem Hertzen fliehen vñ verdamnen.

R ij Widers

Widerlegung der

VI.

Widerlegung  
der Irrthum im Artikel  
vom freien Willen/ vnd des  
Menschen Krefften.

**B**

isher haben wir die  
fürnemsten Schwer  
mereien vnd grewel  
che irrthum/ Die sich  
zu vnsern zeiten / wis  
der das göttlich Wes  
sen/ vnd heilige Pres  
digampt/ erhaben/ mit grund der heil  
ligen Schrift widerlegt / Folget nu  
das wir auch mit dergleichen Grund  
der heiligen Schrift für vns nemen/  
die Patronen vnd Vertreter des freien  
Willens / welchen etliche widerumb  
zu erheben sich zum höchsten bemü  
hen/

hen/Welche doch nicht für die gering-  
sten verwanten der Augspurgischen  
Confession wollen gesehen sein. Dar-  
umb es auch hoch von nöten/das wir  
die einfeltigen von diesem Artikel/wi-  
der jr scheinlichs vnd der Vernunfft  
gemesses fürbringen/recht vnterrich-  
ten.

Vnd das fürnemlich darumb/  
Auff das die Einfeltigen von dem  
hohmütigen vermessenen trotz vnd vn-  
beständigem vertrauen des heilosen  
Fleischs/zum rechten vñ gründlichen  
Erkenntnis ires eigenen Jamers / vnd  
der verderbten Natur vnuermügen ge-  
bracht / Vnd das die vberschwenck-  
liche herrligkeit der Barmhertzigkeit  
Gottes in des Menschen Erneuerung  
deste bekentlicher / Vnd endlich auch  
Gott seine gebürliche Ehre für solche  
Werck seiner Barmhertzigkeit / mit  
höchster danckbarkeit gegeben werde.

Dieser Irrthum aber / Der die  
E iij      krafft

## Widerlegung der

Krafft Menschlichs Vermügens so hoch erhebet vnd rhümet / entstehet eigentlich aus vnwissenheit vnd vnuerstand der Erbsünde / vnd verderben des Bildes Gottes / Vnd denn auch aus vertrauen vnd vermessenner Vermutung / so wir haben auff vnser eigene Frödigkeit vnd gerechtigkeit / Vnd aus den scheinenden vnd gleichsamen leren der Philosophia. Denn wir wollen doch schlechter ding / auch etwas dabey vermügen / thun / vnd aufrichten / Wir wollen je gesehen sein / Darumb geschicht vns weh / vnd erwegen vns seer schwerlich / das wir die ehre der Gerechtigkeit Gott allein lassen sollen. Dazu vns denn vnser torheit / eigen dünckel / vnd vber teuflische Vermessenheit hefftig treibet. Dieser stoltz / wie er vns den von natur ist angeborē / thut dem Teufel ein weit Thor auff / die Gottlosen in vnzelich viel Irrthum vnd falsche meinung zu füren vñ zubezaubern. So sind iher zeit

Sophi.

Sophisten gewest / die sich menscha  
liche Gerechtigkeit vnd freiheit hoch  
auff zu nutzen / Weil solchs jederman  
gefellig / mit schreiben geübet / vnd  
brauchen haben lassen.

Darumb wollen wir ire Irrthum  
ordentlich nach einander erzelen. Vnd  
dieweil sie jtz mit newen Ferblin artig  
geschminckt / Vnd in jr alten Stand  
vnd wesen sich vnter stehen zubringen /  
Müssen wir sie auch deste fleissiger wi  
derlegen. Vnd das können wir so viel  
deste leichter thun / Weil wir die gant  
ze Schrifft auff vnserm teil zum vor  
teil / zu einem beständigen Grund vnd  
beistand haben / Zu dem / das die Ver  
teidiger des freien Willens allbereit  
langst von dem heiligen Man Gottes  
Luthero / sind aus dem Felde geschla  
gen / vnd mit all irer Kunst / gantz vnd  
gar erlegt.

## Irrthum wider diesen

### Artikel.

L iij

Die

# Widerlegung der

## I.

**D**ie erste Opinion ist deren / die da tichten / Das nach dem fall / auch zuvor vnd ehe der Mensch ernewet wird / die natürliche Krefte so vermüglich seien / Das / da sie sich selbst angreifen / Können von inen selbst das Gesetz Gottes halten / Vnd das selbe mit volkommenem Gehorsam erfüllen.

Dieser Irrthum / Den Pelagius erstlich hat herfür bracht / ist von den Sophisten vnd Schultheologē weiter getrieben worden / Vnnd ist vorlangst von der alten vnd reinen Kirchen einmütig verworffen / vnd dermassen hinweg geschlagen / Das auch noch hentigs tages die Papisten sein nicht mehr gadencken noch dauon mucken dürffen. Denn es kan inen solcher tölpischer grober vnuerstand mit einem einzelnen wörtlin darnider gestossen werden / Als das S. Paulus Ro. 8.

aus

aus etlichen Psalmen genommen hat.  
 Denn daselbst handelt er eben auch  
 vom Vermögen des Menschen / Vnd  
 vberweist in nicht allein einer schlech-  
 ten vnuermügligkeit / Sondern bez-  
 schuldiget vns alle in einem hauffen/  
 Das wir gar vntüchtig vnd zu nichts  
 tüglich sind / Sondern gantz vnd gar  
 von Gott abgewand / vnd vnter der  
 Macht der Sünden vnd des Teufels  
 gefangen ligen.

II.

**D**er ander Zrthum ist etwas  
 ansehnlicher / vnd der Vera-  
 nunfft gemesser / nemlich / Das  
 der Mensch durch den Fall Ade sey  
 zwar verderbet / vnd erbermlich aus  
 seinem herrlichen vnd volkommenen  
 Stand geworffen / Also das er von  
 Natur der Sünden anhengig vnd zu-  
 geneigt sey / doch seien seine natürliche  
 Krefte dadurch so gantz vñ gar nicht  
 verrückt noch verderbt / Das er nicht

L v

solt

## Widerlegung der

solt durch hülff vnd beistand der gnad  
ermuntert / aus eigener Freiheit / in der  
Bekering des Menschen etwas kön-  
nen oder vermügen. Daher eigenen  
sie dem freien Willen zu / Das er sol-  
che Gnade hab in seiner Willkür / Mü-  
ge sie annemen / vnd jr folgen / oder sie  
verwerffen. Erkennen dennoch die ver-  
nunfft vnd Willen des Menschen / zu  
der Bekeringe vnd newen geburt zu  
Gott / als ein Miterbeiter / Gehülff-  
fen / vnd Beförderer / Der auch neben  
dem Wort vnd Geist Gottes / etwas  
dabey zu schaffen vnd auszurichten  
vermüge.

Vnd vber diesem Stück erhebt  
sich fürnemlich der Streit zwischen  
vns vnd den Idiaphoristen / Was sie  
gleich für mancherley Fragen in einan-  
der mengen / vnd vns damit verwi-  
ckeln vnd irrig machen wollen.

Dieweil aber mit dieser Gottlo-  
sen Opinion / die Bekering des Men-  
schen

sehen / zum teil Gott / vnnnd zum teil  
 menschlichem Vermügen vnd Kress-  
 ten wird zugemessen / Zu dem es also  
 Gottes Wirkung vnd Kressft / so viel  
 entzeucht vnnnd fast darnider schlegt /  
 Vnd vber das zu dieser zeit / die gros-  
 sen Doctgelarten vnnnd fürnemsten  
 Theologen zu Patronen hat / Ist von  
 nöten / Das wir sie auch deste fleissig-  
 ger widerlegen / vnd klerlich dARTHUN /  
 Das wir bis anher mit bestendiger ei-  
 nigkeit in der Kirchen gelert haben /  
 Das des Menschen natur durch den  
 fall ADE / nicht allein geschwecht wor-  
 den ist / Sondern von Gott in allen  
 Kressften vnnnd vermügen / gantz vnnnd  
 gar abgewendt / vnd ein feindschafft  
 gegen Gott trage / vnter die gewalt  
 der Sünden vnd des Teufels gesteckt /  
 Also / das sie nicht allein hab lust / be-  
 gird vnd neigung zu sündigen / Son-  
 dern der Sünden gantz zu eigen vnter-  
 worffen sey. Denn ob wol der Will  
 des Menschen / nicht ist durch den  
 Fall /



## Widerlegung der

Fall Aneweggenommen/so hat er doch den freien Willen zu einem gefangenen Willen/Vnd den guten/zu einem bösen verderbten Willen gemacht/Demnach es auch dem Menschen für der Widergeburt vnmöglich ist/Erstlich aus eigenen natürlichen Kressften/ den eröffenten vnnnd fürgepredigten willen Gottes zuuerstehen/oder anzunehmen/Oder aber aus seines eigenen freien Willens vermügen/sich selbst zu Gott bekeren/vnd etwas guts wollen oder volbringen.

**I** Darumb leret Gottes Wort/ Das zum ersten alle Menschen/in vnd aus irer Natur gantz vnd gar tod/vn-  
tüchtig / vnd von Gott abgewendet sind/Als er im 1. Buch Mosi Cap. 6. vnd 8. sagt/ Das alles tichten vnnnd trachten des Menschlichen Hertzens nur jemerdar böse ist. Psal. 51. An dir alleine hab ich gesündigt. Joh. 3. Alles was

was aus dem Fleisch geborn ist / das  
ist Fleisch. Item / Es werde denn je  
mands newgeborn etc.

II. Zum andern leret die Schrift /  
Das aller Menschen hertzen seien von  
Natur steinern / Vnd solchs redet sie  
nicht allein von etlichen wenigen /  
Sondern zeuget solchs von aller Men  
schen natur. Was wird aber das für  
ein schöne treffliche fürbereitung wer  
den / die ein solch verstockt vnd verher  
tets hertz von sich selbs fürnimpt / ehe  
vnd zuor es durch die wunderliche  
Bekering erweichet wird. Jere. 24.  
Ich wil jnen ein Hertz geben / das sie  
mich kennen sollen / das ich der Herr  
sey. Diemit verheisset Gott / das er  
seinem volck Israel aus grosser gnad /  
wölle ein solch Hertz geben / Das sie  
in erkennen mügen / Vnd bezeuget /  
Das des Menschen Krefte in geist  
lichen Sachen / weiter vnd mehr nicht  
vermüß

## Widerlegung der

vermögen / denn so weit sie von Gott  
erleuchtet werden. Jerem. 31. Ich will  
mein Gesetz in jr Hertz geben / vnd in  
jren Sinn schreiben. Jere. 32. Ich will  
jnen meine Furcht ins Hertz geben /  
das sie nicht von mir weichen. Mit  
diesen wortē zeuget der Prophet auch/  
Das das alleine Gottes selbs eigene  
werck seien / jemand ein new Hertz zu  
schaffen / vnd aus einem steinern ein  
fleischlichs Hertz machen / die hertzen  
bekeren / vnd zum rechten Erkenntnis  
erleuchten / Wie auch Ezech. am 11.  
vnd 36.

III. Zum dritten leret Christus  
auch eben das / da er spricht / Wer es  
von meinem Vater höret / der kompt  
zu mir. Item / Niemand kompt zu  
mir / es sey denn / das in der Vater  
ziehe. Das ist so viel gesagt / Niemand  
kan Christum recht erkennen / er werde  
denn

Zurth. vom freien willen. 80

denn zuuor durch den heiligen Geist  
innerlich erleuchtet.

III. Zum vierdten / beweiset die  
S. Paulus vber die massen gewaltig  
2. Corinth. 1. 2. 3. Da er von diesem  
Dandel disputirt / vnd alle Menschen  
vberweist jrer Torheit vnd eiteler vn-  
uermügligkeit / Vnd beschleusst es  
mit diesen Worten / Der natürlich  
Mensch aber vernimpt nichts vom  
Geist Gottes. Darumb ist es eine  
grosse vermessene Torheit / Das man  
dem Menschen so viel Liechts vnd vol-  
kommenes Verstandes wil zueigenen /  
Das er aus eigē krefften damit könne  
zu Gott vnd dem Geheimnis seines  
Reichs durchdringen / So doch der  
Apostel mit klaren Worten sagt / Das  
Gott dieser Welt Weisheit habe gar  
zur Torheit gemacht. Dergleichen  
thut er auch in seinem Gebet / Ephe. 1.  
Der GOTT vnser Herr Ihesu  
Christi

## Widerlegung der

Christi / der Vater der Herrlichkeit /  
gebe euch den Geist der Weisheit vnd  
der Offenbarung / zu seines selbst Er-  
kenntnis. Damit zeuget er eben das /  
Das alle Weisheit vnd Offenbarung  
werde von Gott gegeben / Darumb  
wer im selbst viel hohes Erkenntnis vñ  
Verstands zumisset / Der ist so viel des-  
te blinder / Das er seine Blindheit  
nicht erkennet noch betrachtet.

V. Wie wir nu in solchem finsternis  
vñser Vernunfft vnd innerlichen Kress-  
ten / so gar nichts tügen noch vermü-  
gen / ichts guts zu dencken / als von  
vns selbst / Also weit feilet es vns auch  
am Willen / Das wir im gehorsam  
gegen Gott vermöchten etwas tüg-  
lichs vnd guts / durch den verfinstert-  
ten vnd verkehrten Willen / vns fur zu-  
nemen vnd zuerwelen / Wie denn S.  
Paulus klar sagt / Das wir nicht al-  
lein das vermügen des Willens in vns  
nicht

nicht haben / Sondern es mus vns  
 alles/was auch zum Willen gehöret/  
 Gott gehorsam zu werden/ von Gott  
 selbs gegeben / vnd in vns gewircket  
 werden. Gott istz (sagt er Phil. 2.) der  
 in euch wircket/ beide das wöllen / vnd  
 das thun / nach seinem wolgefallen.  
 Die sagt S. Paulus/ Das nicht Gott  
 allein vnserm willen helffe vnd förde-  
 re / Sondern er wircke vnd gebe es  
 beides / wöllen vnd thun / Aber diese  
 weise Klüglinge lassen Gott nur die  
 hülffe / als einem Beistand / Vnd in  
 dem sie den Menschen mit seinem wil-  
 len/ Gott zu einem Helffertnecht oder  
 Miterbeiter zugeben / Vnd vns so wol  
 als Gott / ein teil der Bekerung zuei-  
 genen/ So geringern vnd mindern sie  
 Gott sein gebürliche Ehre / Vnd eige-  
 nen vns zu / das doch allein Gottes  
 eigen ist.

Dieher gehöret auch der Spruch  
 Jerem. 31. Vnd ich wil machen/ Das  
 sie in

M

sie in

## Widerlegung der

sie in meinen Geboten wandeln sollen.  
Item dieser Spruch Christi Joha. 15.  
Denn one mich köndt jr nichts thun.  
Vnd 2. Corinth. 3. Ein solch vertrawen  
haben wir durch Christum zu Gott  
nicht das wir tüchtig sind / von vns  
selbs etwas zu dencken / als von vns  
selbs / Sondern das wir etwas tü-  
gen / ist von Gott / Welcher vns hat  
tüchtig gemacht. Diber gehören auch  
die schönen Gebet Davids / Psal. 119.  
vnd 119. Gib mir verstand zu lernen  
deine Befelch. Item / Leite mich in de-  
nen Wegen. So wir aber etwas von  
Gott bitten / So bekennen wir ja frey  
Das wir dasselb nicht haben noch  
vermögen / Vnd eben in dem vns Gott  
solches alles zusagt vnd verheisset /  
erinnert er vns vnfers Mangels vnd  
vnuermögens.

Es solten vns auch billich von  
solcher

solcher nerrischen vermessenheit eigener krafft abzustehen erinnern/die vber herrlichen Namen des heiligen Geistes/ vnd die werck seines Ampts vnd Eigenschafft/damit er teglich wirket in der Kirchen. Denn warumb wird Er anders gerühmet der Geist der heiligung vnd Wahrheit/denn das man allein durch sein leiten vnd leren/zum rechten Erkenntnis Christi/vnd zu dem Geheimnis Gottes vnd seiner Wahrheit gebracht wird?

Endlich können wir auch solchs gnugsam erhalten/durch viel schöne Zeugnis Augustini. Denn er zeuget an vielen orten/ Das die Gnad Gottes also in vns wirket vñ schaffe/ Das aus vnserm vnwilligen ein williger Will werde. Item/ Es bemühen sich viel Leute/ Das sie dahinder kometen möchten/ Was doch in vnserm eigenen willen gutes sey/ aus vns/ vnd nicht aus Got/ aber ich kan es nirgend finden. Vnd an einem andern ort sagt

M ij er/

## Widerlegung der

er/ Er halt nichts vom freien Willen/  
Dieweil er von allen bösen lüsten vnd  
süchtigen Begirden/ so gar gebunden  
vnd gefangen sey. Item / Die Natur  
kan keine Freiheit haben/ die aus vn-  
trewem Betrug selbs willig in vnge-  
horsam felt. Item / der Mensch hat  
durch misbrauch seines freien Willens  
beide sich vnd seines willens frei-  
heit verderbet vnd verlorn. Item / Die  
vnbedachten Leute mercken nicht/ das  
vnter dem namen des freien Willens/  
die freiheit oder befreiung begriffen  
ist. So wir aber der Sünden knecht  
vnd gefangen sind/ Was rühmen wir  
vns denn viel vnseres freien Willens?  
Denn des gefangener ich bin / Des  
Knecht vnd leibeigner bin ich auch.  
Vnd an einem andern ort spottet er  
auch des Namens / Es ist (sagt er) ein  
freier Will / Aber nicht ein befreiter  
Will / Vnd ist wol frey vnd los von  
aller gerechtigkeit / Aber der Sünden  
knecht vnd eigen.

Da

Da wir nu aus diesen vnd dergleichen Zeugnissen / so greifflich vberwunden sind / Sollen wir auch billich diese vermessene Opinion fallen lassen / Vnd vns viel mehr zum rechten Erlöser halten. Den so die allein recht frey sind / Welche der Son frey macht / Joha. 8. So müssen je die andern vnbefreyheiten noch der Sünd gefangene sein vnd bleiben.

Man sol auch sonderlich fleissig meiden vnd fliehen die spitzigen Lere deren / die da fürgeben / Das des menschlichen Vernunft vnd Will in der Bekämpfung oder Ernewerung sey ein Synergion / das ist / ein vrsach / die mit vñ neben vnserm **DEUM** Gott zugleich handele vnd wireke. Denn diese meinung nimpt Gott seine Ehre / vnd (wie S. Augustinus sagt) stürtzet ire Vertreter / ja macht sie mit solchem misuenertrawen irer freyheit je lenger je vngewisser. Wir sind aber nicht dawider / Das der Mensch nach der Wi-

M iij ders

## Widerlegung der

bergeburt / durch den heiligen Geist/  
mit einem newen Liecht erleuchtet /  
auch einen newen guten Willen bekomme /  
Vnd also eine heilige Wohnung  
vnd Werckstad des heiligen Geistes  
werde / Vnd sehe an in einem newen  
Gehorsam / für Gott zu wandeln /  
Vn als denn heisst er ein Miterbeiter Gottes  
vnd Synergos.

Nachdem S. Paulus mit diesem  
Titel zieret die Bleibigen / vnd sagt/  
Wir sind geschaffen in Christo Ihesu  
zu guten Wercken / Zu welchen uns  
Gott zuuor bereitet hat / Das wir  
darinnen wandeln sollen. Vnd Christus  
wil Mat. 5. Das wir vnser Liecht  
sollen leuchten lassen / Das jederman  
vnser gute Werck sehe / Vnd vnserm  
Vater im Himel darüber preise.

Aus dieser vnserer Widerlegung  
kan niemand einigen behelff finden/  
seine Faulheit damit zuentschuldigen.  
Denn

Denn wir halten es gantzlich dafür/  
das man in diesem Artikel zu beiden  
teilen/ sich wol vnd fleissig mus für-  
sehen/ Das man nicht auff einer sei-  
ten den rechten fleis from zu werden  
darnider schlahe/ Vnd auff der andern  
vnser vernügen vermessenlich sich  
vber Gott erhebe / vnd ime seine Ehre  
raube.

III.

**D** Er dritte Zrrthum ist derer /  
Die da hefftig streiten/ Als sol-  
te der Mensch in der Erneue-  
rung alhie in diesem Leben / so bald  
gantz volkomen werden / Vnd dem-  
nach ferner/ one wandel oder mangel/  
das verlorne Bild Gottes / vnnnd er-  
schaffene Gerechtigkeit / gantz vnnnd  
gar bekommen.

Wider diese Schwermerey mus  
man wissen / Das wir der massen so  
volkomen / nach der Erlösung / die-  
weil wir in diesem Fleisch sind/ nicht  
M iij werz

## Widerlegung der

werden / Das in vns gantz vnd gar  
keine schwachheit vberig bleibe / Auch  
nicht also ernewert werdē / Das nicht  
viel grober stück des alten Adams  
vns anhengig bleiben vnd ankleben/  
Auch nimmermehr also rein newge-  
born / Das wir von der alten Ge-  
burt nichts vberig behalten / Sondern  
wir tragen on vnterlas / das vberige  
vnser alten fleisches mit vns / dieweil  
wir in dieses fleisches kercker vnd ge-  
fengnis in diesem leben wallen. Das  
her entstehen noch teglich so viel Jas-  
mers vnd vbermechtiges kempffen/  
Die den Fromen vnd Heiligen / die  
zeit ires lebens / nicht wenig zu schaf-  
fen machen 2. Cor. 3. Wir werden ver-  
kleret in das Bild des HErrn von tag  
ge zu tage.

Darumb mügen sich die Papi-  
sten vnd schwenckfeldischen wol droh-  
len / Die doch so leichtfertig rhümen/  
Es sey nichts leichters einem newge-  
bornen

bornen Menschen/denn Gott den voll-  
kommenen Gehorsam leisten. Item/  
Das Gott nichts vnmüglichs dem  
Menschen geboten habe. Item die  
Pöndristen/welche das vberige der  
Ersünde so gar für geringe vñ nichts  
werth halten/Das sie die wesentliche  
Gerechtigkeit dem Meer/vnd die hin-  
derstellige Sünde/einem kleinen sewr  
fünclein/vergleichen.

Weil denn auch diese Lere vom  
Artikel des freien Willens / in vnser  
Augspurgischen Confession / darauff  
erfolgten Apologia / vñnd Schmal-  
kaldischen Artikeln / klerlich vnd vn-  
terschiedlich an tag gegeben vnd aus-  
geführt wird/Wöllen wir vns/vmb  
der kurtze willen/dahin ge-  
zogen haben.

M v Widers

**Widerlegung**  
der Irrthum Osiandri  
vnd Stanckari / im Artikel  
von der Rechtsfertigung.



Sist der leidige Sathan sampt der Verzunfft des menschen / vnter allen andern Artikeln der Christlichen Lere / keinem feinder / denn diesem / Der da leret / Das vns die Gerechtigkeit / durch das Verdienst Christi / aus lauter Gnad vnd Barmhertzigkeit werde geschencket vnd zugerechnet / Das er vns / als vnser Erbfeind / vnser Weilvnnnd Seligkeit nicht gönnen kan.  
Denn

Denn er weis seer wol / dieweil dieser Artikel rein vnnnd vnuerfelscht bestet / Das er vns mit seinen manichselzigen Anfechtungen / nachstellen vnd versuchen / Als von vnser Vnwardigkeit / Item / von der Verfehlung / vnd dergleichen Griffen / nichts kan anhaben noch abgewinnen / Die Vernunft aber kan sich darumb mit im nicht vertragen / vmb des angeborenen Dohmuts / Wolgefallen vnnnd Vertrauen willen / Das sie an irer selbs Wirdigkeit / Frömdkeit vnd Gerechtigkeit hat / Vnd darnach / das sie noch etwas vom Gesetz Gottes verstehen wil / Welcher Irrthum zum teil auch aus dem verdeckten Angesicht oder Gesetz Mose herkompt / Damit sie denn vermeinet / aus iren eigen Kressften / das ewig Leben zu verdienen.

Daher kompt auch / Das allezeit die Deuchler die Gerechtigkeit des eigenen Verdiensts so trotzig vnd steiff

G  
ri  
l

Ca  
Ver  
chen  
rn Ar  
tlich  
fein  
/ Der  
gkeit  
s lau  
wer  
Das  
Neil  
kan.  
Denn

## Widerlegung der Irrth.

steiff zuverteidigen sich vnterstanden haben / Vnd zwar haben sich nicht allein die Deuchler / die außser der Kirchen vnter den Heiden sind / als die von einigem Wort Gottes / allein der blossen Vernunfft gefolget / solches Trotzes vnterfangen / Sondern auch ir viel / Die in der eusserlichen sichtigen vnnnd scheinlichen Gemeinschaft der Christlichen Kirchen / des Worts Hörer vnd Lerer gewesen sind. Solche sind vor zeiten bey den Jüden gewesen / Die den Götzendienst vnd alleley Opfferwerck / wider der Propheten zeugnis / vom rechten Opffer des Weilands Messie ertichtet / vnnnd mit hauffen getrieben haben / Item / die Phariseer / Die zu Johannis des Teufers vnd Christi zeiten / ire eusserliche Frömigkeit auff's aller hefftigst führen / wider die rechte Lere von vergeltung der Sünden. Item die falschen Apostel / Die die Beschneidung vnd Werck des Gesetzes / nicht weniger auff's

auffs geschwindest trieben / wider S.  
 Pauli Lere / vom Glauben vnd barm-  
 hertzigkeit / durch Christum vns er-  
 worben / vnd aus Gnaden geschenckt.  
 Diese vnd dergleichen / die weil sie von  
 der Erbsünde vñ schaden der verderb-  
 ten Natur / noch des Gesetzes Gottes  
 scherff / hohheit / Vnd wie es von vns  
 einen volkommenen Gehorsam erfod-  
 dert / nichts verstanden / Haben sie die  
 Gerechtigkeit auff jr selbs eigene kreff-  
 te vnd verdienst gestellet. Vnd mit dies-  
 sem schein vnter des Gesetzes namen /  
 die guten Werck hoch erhaben / Vnd  
 damit das Euangelium vom Glau-  
 ben an Christum / vnd von seinem ver-  
 dienst vnd Gerechtigkeit / verworffen  
 vnd verdamnet.

Vnd ist die grewliche schedliche  
 Sucht solcher vermessenheit nach der  
 Apostel zeit / je lenger je gemeiner wor-  
 den / Bis so lang es der Papszt zu sei-  
 ner ertichten Religion / als den Neubt  
 grund ergriffen / Vñ damit die gantze  
 Welt

## Widerlegung der Irrth.

Welt/durch hülff seiner starcken Don-  
neraxt / der Excommunication ge-  
bracht hat / Warlich mit gefahr vnd  
ewigem verderben vnzelich vieler See-  
len.

Vnd wiewol nicht wenig / auch  
mitten vnter dem Papsthum / durch  
die heilige göttliche Schrift der Pro-  
pheten vnnnd Apostel erlenchtet / sich  
offtmals gar ernstlich dawider gesetzt  
haben / So sind sie doch jmer einer  
nach dem andern / durch des Papsts  
Tyranney/ als vnter der regirung der  
höchsten Macht aller finsternis / er-  
bermlich vnterdrückt worden. Denn  
also hat die schendliche vndanckbar-  
keit der Gottlosen Welt müssen beza-  
len/ Bis so lang er in diesen letzten zeis-  
ten / vnser Elend vnd Jamer nach sei-  
ner Barmhertzigkeit wider hat ange-  
sehen/ Vnd Lutherum / als einen son-  
derlichen Werckzeug des heiligen Gei-  
stes / erwecket hat / Durch welchen er  
diese erschreckliche Ketzerey endeckt/  
vnd

vnd jederman des Papssts Grewel  
 kunt gemacht hat/ Auch dabey wider  
 herfür ans Liecht der gantzen Welt  
 predigen lassen/das reine Euangelium  
 von der heilsamen Gerechtigkeit Chri  
 sti/ Vnd dadurch die verfürte Kirchen  
 von des Papssts grawsamer Tyran  
 ney vnd Seelen mord erlediget/ Auch  
 zu rechter Freud/ Glauben/hoffnung  
 vnd gebet bracht.

Aber es war dem Teufel gar nicht  
 gelegen/dazu still zu schweigen vnd  
 feiren/Vnd der Kirchen diese jr Freud  
 vnd wolhart vnangefochten zu lassen.  
 Darumb bricht er mitten in hauffen  
 hinein/Vnd erwischt aus der wolzu  
 gerichtten Kirchen etliche hochmü  
 tige vnd ehrensüchtige Köpffe/ Die  
 hetzet er an den lieben Artikel von  
 der Rechtfertigung/ Das sie densel  
 ben mit gleissenden schönen Ferblin  
 austrichen/ verstellten vnd schmü  
 ckten. Vnter welche sind Osiander vñ  
 Stanckarus nicht die wenigsten. Den  
 diese

## Widerlegung der Irrth.

diese beide / als Lutheri / vnd der rechten Kirchen Schüler vnd glieder / treten herfür / vnnnd machen sich recht starck an diesen Artikel. Darumb sie auch einen erbermlichen Schiffbruch erlitten / Vnd dasselbe nicht one grose zerrüttung der Kirchen.

¶ Denn nach dem Luthers aus Prophetischer vnd Apostolischer schrift / den rechten vnd heilsamen weg vnser Erlösung vnd Rechtfertigung trewlich gezeiget vnd fein geleret hat / Das vnserere Gerechtigkeit vnd Erlösung / sey ein Werck der gantzen Person Christi / Also / das beide seine göttliche vnd menschliche Naturen / in einer Person / vns zuerlösen vnd zu rechtfertigen / zu gleich vnzertrennet / im Tod vnd Sieggerbeitet haben / Da erheben sich Diestander vnd Stanckarus / vnd stürmen hefftig vnter sich selbs auff einander vber dieser Gerechtigkeit / Bis so lang sie beide an der rechten Bahn vñ warheit

heit / sich schendlich versteinen vnd bes  
 seit abtretten / Vnd nemen der Person  
 Christi das Werck vnser Gerechtig  
 keit / Vnd messens den einzelnen Natu  
 ren Christi zu / Also / das sie beide der  
 Mittelstrassen feilen / vnd auff zwo euf  
 ferste Spitzen geraten / vnd darauff  
 bestecken bleiben .

**S**iander feret weit zu hoch /  
 vnd eignet vnser Rechtfertis  
 gung allein der Gottheit Chri  
 sti zu / durch seine Inwohnung vnd wir  
 ckung / Vnd darüber hat er nu die *im  
 putatiuam Iustitiam* / Welche in vergebung  
 der Sünden stehet / vnd vns aus Gna  
 den zugerechnet wird / Welche auch  
 S. Paulus / vnd vnser Kirchen fleis  
 sig treiben / verworffen / Oder ja ges  
 wis verachtet / vnd mit füßen getret  
 ten. Das denn aus folgenden seinen  
 Sprüchen kunt vnd offenbar ist. Den  
 iin der 73. Proposition seiner Dispu  
 tation von der Rechtfertigung / saget  
 N. er also

## Widerlegung der Irrth.

er also / vnd spricht / Das kein Eis so  
kalt sey / als derer Lere ist / die da leren  
Das wir vmb vergebung der Sünde  
willen / gerecht geschetzt werden. Item  
in seiner Bekentnis / Die Heuchler  
(spricht er) leren / das vnser Gerechtig-  
keit nichts anders sey / denn das vns  
Gott für gerecht helt / Ob wir gleich  
böse Buben sind / Vnd das vnser Be-  
rechtigkeit auffer vns / vnnnd nicht in  
vns sey. Item in der Widerlegung der  
Schrift Philippi / Gott wil kein an-  
dere Gerechtigkeit / nimpt auch kein  
andere an / denn seine eigene vnnnd  
wesentliche Gerechtigkeit. Item / er  
verneinet auch im selbigen buch / Das  
wir durch einige Schrift beweisen  
können / Das die vergebung der Sün-  
de / vnser Gerechtigkeit sey. Item / er  
spricht weiter / Das Christi wesent-  
liche Gerechtigkeit / vnser Gerechtig-  
keit sey / vnd nicht vergebung der Sün-  
den. Vnd diese erzelete vnd dergleichen  
Sprüche sind hin vnd wider in seinen  
Leren zu finden. Aber

Aber er ist seines irrthums auch mit diesen zweien gründlichen Ursachen wol zu vberwinden / Die erste ist / Das er sich setzet wider den Brauch / Nutz / vnd Ampt der Menschwerdung Christi. Denn da vns Christus hette solten oder wöllen gerecht machen / allein durch seine blossse göttliche Natur / Wozu vnnnd warumb were er Mensch worden? Die andere ist auch stracks wider die Art vnd Natur vnser Gerechtigkeit / welche Gott durch sein Gesetz / von vns ernstlich erfodert / Denn zu solcher gehört ein gantze erfüllung vnd vollkomener Behorsam / das Gesetze zu erfüllen / mit thun vnd leiden / von wegen des gerechten zorns Gottes vber die Sünde. Nu kan das göttliche Wesen nicht leiden oder sterben. Darumb so richtet aus / vnd erlanget vnser Gerechtigkeit nicht allein die Gottheit Christi / Sondern Christus hat müssen ein rechter natürlicher Mensch werden / Vnd also

N ij die



## Widerlegung der Irrth.

die gnatzte Person / die Sünde vñnd  
zorn Gottes / durch sein Blut vñnd tod  
versünen.

Ob nu wol die Gottheit Christi  
vnserere Gerechtigkeit zu erwerben von  
nöten ist / Was die Macht vñnd den  
Sieg anlangt / Jedoch kan sie dieselbe  
ohne die Menschheit / Die da drüber lei-  
den vñnd sterben mus nach Gottes wil-  
len / nicht erfüllen. Denn Gott hat  
seinen Zorn / wider vnserere sünde nicht  
wöllen versünen lassen / durch lauter  
gewaltsame Abthung des Gesetzes /  
vñnd vnser Sünde / Sondern es hat  
müssen geschehen durch demütiges  
Leiden vñnd sterben / Damit der Ge-  
rechtigkeit seines Gesetzes / vñnd seinem  
zorn oder Rach wider die sünde gnug  
geschehe / Wie Christus sagt / Matth.  
am 5. Ich bin nicht komen das Gesetz  
auffzuheben / sondern zu erfüllen. Vñnd  
das sey kürtzlich von Osandri Irr-  
thum wider diesen Artikel gesagt.

Dom

Vom Irthum Stanckari.

**W**ennu Osiander allzu hoch gehalten ist / So thut Stanckarus gerad das widerspiel / Lest sich zu gar weit hinunter / Vnd sagt / Das Christus vnser Gerechtigkeit allein durch vnd in der menschlichen Natur erworben vnd erhalten habe. Nu ist es wol war / Das die menschliche Natur in Christo gantz vnnnd durchaus rein vnnnd Heilig ist / Wie der Engel sagt / Das heilige / das von dir wird geborn werden etc. Jedoch were sie viel zu schwach gewesen / aus jr selbs vnser Gerechtigkeit zu erlangen. Den sie hette den grimmigen zorn Gottes wider die Sünde nicht mögen ertragen / Auch nicht mit irem Verdienst vnd bezalung vergnügen / Noch den vbermessigen Gewalt vnd macht vnser Feind ausstehen / Als da sind der

N ij      Tod /

## Widerlegung der Irrth.

Tod/die Dell/vnd der Teufel/Wo sie nicht durch die wunderbarliche vereinigung der göttlichen allmechtigen Natur in einer Person vereinigt / im Leiden vnd Kampff were gesterckt/vñ erhalten worden / Vnd also auch der Verdienst vnd bezalung Christi / deste wichtiger vñ Gott,angeneimer worden were. Solchs bezeugen hin vnd wider in der Schrift seine Klage vom leiden vñ die erbermlichen seufftzen / Da er vmb hülff vnd rettung schreiet / Als im 22. Psal. Mein Gott / Mein Gott / wie hastu mich so gar verlassen etc. Item / Meine Krefte sind vertrocknet / wie ein Echerben etc. Psal. 69. Gott hilff mir / Denn das Wasser gehet mir bis an die Seele etc.

Also sehen wir / Das es die hohe vnd vnuermeidliche not erfoddert / Das die göttliche Natur in Christo / seiner Menschlichen Natur zu hülff komen

komē ist/ Dieselbige gesterckt/ gerettet  
 vnd zur Herrligkeit vnd vnsterblichkeit  
 wider erhaben / Da sie vnter Gottes  
 grimmigem vnd vntreglichem zorn so  
 jemerlich im blutigen Schweis ge-  
 zappelt/ Auch in Tod vnd Dell gesun-  
 cken ist/ Das beweiset auch S. Petrus  
 Act. 2. Den hat Gott (das ist die gött-  
 liche Macht/ die der son mit dem Va-  
 ter vnd heiligem Geist hat) auffgewe-  
 cket/ vnd auffgelöset die Schmerzen  
 des Todes. Solcher göttlicher Macht  
 rühmet sich auch Christus selbs/ Erst-  
 lich Esa. 63. Denn ich sahe mich omb/  
 vnd da war kein Helfer / Vnd ich  
 war im schrecken / vnd niemand ent-  
 hielt mich/ Sondern mein Arm mu-  
 ste mir helffen / Vnd mein zorn ent-  
 hielt mich. Vnd Johan. 10. Darumb  
 liebet mich mein vater/ Das ich mein  
 Lebē lasse/ Auff das ichs wider neme/



## Widerlegung der Irrth.

Niemand nimpt es von mir / Sondern ich lasse es von mir selbst / Ich hab es macht zu lassen / vnd hab es macht wider zu nemen. Diese herrliche Macht / im sterben / aus eigener Krafft im selbst das Leben zugeben / Kan niemand / denn nur allein Gott / Darumb mus die göttliche Herrlichkeit im sterben vnd Tod / von Christo nicht abgetrennet gewesen sein.

Demnach werden wir durch Christum gerecht / Aber nicht allein durch seine göttliche allmechtige Herrlichkeit / Die an jr selbst vns viel zu hoch / vnd zum Opffer vnd Leiden nicht bequem oder geschickt / Noch auch nicht allein durch seine blosser menschliche Natur / die viel zu schwach dazu ist / Vnd zur gleichen bezahlung der Sünde der gantzen Welt zu wenig / Sondern durch den unzertrenlichen gantzen Christum waren Gottes vnd Marie Son / wie solches zeuget der Spruch  
Isai.

Son-  
/ Ich  
ab es  
errli-  
gener  
eben/  
Gott/  
rrlig-  
risto  
Chri-  
durch  
rrlig-  
och/  
ot be-  
nicht  
liche  
u ist/  
ünde  
ndern  
ntzen  
Marie  
bruch  
Isai.

Isaie. 7. Siehe / ein Jungfraw ist  
schwanger / vnd wird einen Son ge-  
berer / Den wird sie heissen Imma-  
nuel / das ist / Gott mit vns. Item/  
Iere. 23. Dauids gewechs. Item/  
Vnd Jehoua der HERR vnser Ge-  
rechtigkeit etc. Isa. 43. Ja mir hastu  
erbeit gemacht in deinen Sünden / Vñ  
hast mir mühe gemacht mit deinen  
missethaten.

Darumb sagt Ireneus am 185.  
blat / Gleich wie Christus Mensch  
war / Auff das er künde versucht wer-  
den / Also war er auch das wesentliche  
Wort / Auff das er widerumb herr-  
lich würde. Vnd Virgilius spricht /  
Es müß ein solches Opffer sein / Wel-  
chs also gemessiget vnd gemittelt we-  
re / zwischen Gott vnd den Menschen /  
Das es die dinge / als Gott vñ mensch  
künde ausstehen / Nemlich / Das es  
an dem / da er Mensch war / künde  
N v sterben

## Widerlegung der Irth.

sterben/ Vnd an dem/ da er Gott war/  
den Tod vberwünde.

Derhalben wil es sich in keinen  
Weg leiden/ kan auch nicht sein/ Das  
man nach Dsiandri meinung wolte  
sagen/ Christus macht vns gerecht per  
*communicationem idiomatum*/ nach der gemein  
schafft der eigenschafften vnd Naturan  
ren in Christo/ Wie man sonst von sol  
chen Eigenschafften in Christo/ vn  
terschiedlich redet/ Als das er ist ein  
Schepffer Himels vnnnd der Erden/  
Ewig/ Item/ Leidet/ stirbt/ isset/ trin  
cket etc. Sondern er macht vns ge  
recht in beiden Naturen / vereinigt  
vnd vnzertrennet / Realiter / Wie er in  
einer Person / ein gantzer warer Chri  
stus ist/ Also das beide Naturen bei  
samen zu gleich mit einander solches  
ausrichten / Die eine / mit geboren  
werden vnd leiden / Die andere / mit  
Krefftiger vnnnd mechtiger Vberwin  
dung des Leidens/ Darumb sagt S.  
Paul. Phil. 2. Das/ ob wol Christus  
sey in

sey in göttlicher Gestalt gewesen / hab  
 ers für keinen Raub gehalten / Gott  
 gleich sein / Sondern hab sich sein selbs  
 geeuffert / vñ Knechts gestalt angeno-  
 men / Vnd gleich wie ein ander mensch  
 worden / vnd an geberden als ein  
 Mensch erfunden / Vnd hab sich da-  
 mit genidriget / vnd bis zum Tod ge-  
 horsam worden / Ja zum Tod am  
 Kreuz.

Vnd Johannes der Teuffer spricht  
 Das das Lemblin Gottes / nicht  
 Gott selbs / neme der Welt Sünde hin-  
 weg. Vnd also leret S. Paulus Rom.  
 5. Wir werden gerecht / Nicht durch  
 die bloffe Gewalt vnd krafft der gött-  
 lichen Herrligkeit Christi / Sondern  
 durch sein demütigen Gehorsam /  
 Denn so spricht er / Denn gleich wie  
 durch eines Menschen Vngehorsam /  
 viel Sünder worden sind / Also  
 auch



## Widerlegung der Irrth.

auch durch eines Gehorsam werden  
viel Gerechten. Item Acto. 20. Gott  
hat seine gemeine durch sein eigen blut  
erlöset. Item 1. Johan. 1. Das Blut  
Christi reiniget vns von allen vnsern  
Sünden.

Dieraus ist klar / das weder D<sup>r</sup>  
lander noch Stanckarus recht hal-  
ten von der gerechtigkeit / die wir durch  
Christum haben / Sondern irren betra-  
de zu weit vom Ziel / Dieweil sie die  
selben in den Naturen vnd eigenschafft  
ten Christi zertrenlich suchen vnd for-  
suchen. Darumb sollen alle Gottsuch-  
tige mit höchstem fleis / den Christum  
mit seiner gerechtigkeit / damit er vns  
gerecht macht / fest vnd vnzertrenlich  
behalten / Vnd inen denselben nicht  
lassen nemen / Wie vns die heilige  
Schrift / vnnnd vnser lieber Kinder  
Glaub leret vnd zenget.

Vnd nach dem nicht eine geringe  
Sorge die Kirche Gottes drucket vnd  
plaget /

Osiandri vnd Stanckari. 95

plaget / von wegen des Osiandrischen  
Irrthums / So wil auch dieses / als  
für notwendig zu erinnern vnd anzu-  
zeigen sein / Das dieser Irrthum nicht  
allein seer ferne von Gottes wort sey  
(wie denn droben angezeiget) Son-  
dern auch von der Augspurgischen  
Confession / Apologia / vnd Schmal-  
kaldischen Artikeln / Welchs denn da-  
her kunt vnd offenbar ist / Das nichts  
in vnser Augspurgischen Confession /  
Apologia / vnnnd Schmalkaldischen  
Artikeln / von der wesentlichen Be-  
rechtigung / Die vns solte rechtfer-  
tigen / irgend an einem ort gedacht /  
Sondern allein fleissig getrieben wird  
die Zurechnung des Verdiensts  
Christi / vnd vergebung der sün-  
den / für vnserere Berech-  
tigung.

Wider

Widerlegung der Proposi.

VIII.

Widerlegung  
der Proposition D. Ma-  
ioris / Das gute Werck sol-  
ten nötig sein zur Sel-  
igkeit.

**D**ector Maiors / auch  
desselbigen Anhenger  
vnd Mituerwanten  
irrtum / gehöret dar-  
umb zu Osiandri vnd  
Stanckari irrtumē /  
Dieweil er in einem  
Artikel mit men arbeitet / den Artikel  
von vnser Justification vnd Rechtfertig-  
ung (das ist / Wie man für Gott  
From / Gerecht / vnd Selig werden  
sol) zu schwächen vnd zu verwirren.  
Doch

Doch thut er solchs gar auff ein ander  
 meinung vnd weise. Denn jene nemen  
 ire falsche meinung *a causa efficiente* / Das  
 ist / Sie eignen vnserere Rechtfertigung  
 Christo zu / Aber nach vnterscheid vnd  
 zertrennung oder eigenschafften vnd  
 Naturen / nicht dem gantzen vnzertren  
 lichen Christo. Aber das lesst vns D.  
 Maior zu / vnd leret auch / das vns der  
 gantze vnzertreliche Christus gerecht  
 mache. Er hat aber einen besondern  
 Rancz vnd griff erdacht / mit der ver  
 felschung der *causa formali et materiali*. Denn  
 vnserere *causa formalis* oder *materialis* ist an  
 ders nichts / denn die gantze erfällung  
 vnd der vollkomene Behorsam des Ge  
 setzes / Welche Christus allein für vns  
 gethan hat. Dieser gantze Christus  
 mit aller dieser seiner Gerechtigkeit  
 wird vnd ist vnser / durch den Glauben  
 vnd macht vns dadurch gerecht vnd  
 Erben der ewigen Seligkeit / Als hetz  
 ten wir es selbs gethan vnnnd verdie  
 net.

Ob

G  
 N  
 auch  
 enger  
 anten  
 t dar  
 i vnd  
 amē/  
 inem  
 rtikel  
 fertis  
 Gott  
 erden  
 rren.  
 Doch



## Widerlegung der Propost.

Ob vns nu Maior wol dis alles  
auch nachgibt / So verfelschet ers  
doch hin vnd wider mit seiner ertich-  
ten vnd spitzigen Glosen / Vnd verdre-  
hets mit sonderlicher Behendigkeit /  
Auff das er diese sein Proposition für  
recht vnd gut künd auff dem platz er-  
halten / Als solten gute Werck zur se-  
ligkeit nötig sein / Wiewol er zuvor  
also nicht geleret / Sondern hat diese  
Art zu reden zur INTERIMS zeit von  
den Papisten / Interimisten vnd Ad-  
aphoristen genomen / Darumb wöl-  
len wir die fürnemsten Irrthum aus  
seinen Schrifften kurtzlich anziehen  
vnd widerlegen.

### I.

**E**rstlich lesst er sich öffentlich hö-  
ren / Das er diese wort vnd Pro-  
positiones wölle erhalten vnd  
verteidigen / Als im Buch / so Anno  
51. wider Amsdorff ausgangen ist /  
Vnd

Vnd in der Predigt von S. Pauli Bekehrung.

1. Gute Werck sind nötig zur Seligkeit.

2. Niemand wird one gute Werck selig.

3. Es ist vnmöglich / Das ein mensch one gute Werck könde selig werden.

Diese Propositiones vermentelt vnnnd verblümet er mit meisterlichen Glöslin / Deren wol etliche einen guten Schein haben / Etliche aber sind öffentlich vnrecht vnd falsch. Vnd mit diesen Blossen vermeint er die falschen mit den leidlichen hindurch zu bringen vnnnd erhalten. Den leidlichen streicht er dis Ferblin an. Ja / sagt er / Das ich lere / Gute werck sind nötig zur Seligkeit / Das meine vnd eredi ich nicht vom Verdienst / als solten gute Werck die Seligkeit erwerben oder

D

vera

## Widerlegung der Proposi.

verdienen / Sondern ich wil es von dem effectu vnd fruchten verstanden haben / Welche je aus not folgen vnd geschehen müssen / von denen / die durch den Glauben gerecht vnd selig worden sind .

Vnd berufft sich Maior auff diesen Behelff vnd Glöslin an vielen orten / seine Unschuld vnd beständigkeit wider seine Ankläger damit zu erhalten / als die im felschlich grosse schuld geben / Das er mit dem Papisischen Sawerteig / schendlich vbel beschmeisset / vnnnd vergiffet sey. Er kan sich aber in der Warheit mit diesem geslickten Behelff / mit Grund vnd gutem Gewissen nimermehr bewaren. Denn ob wol die gemelte seine Glosse vnd erklerung von im also gemeinet / Vnd auch also für recht vnd gut künde angenommen werden / Jedoch diervill er sie brauchet vnd treibet / der Papissten gottlose vnnnd offentliche falsche Irrthum damit zu schmücken vnd zu bestetigen

bestetigen / Vnd vnterstehet sich / one  
 einige not vnd vrsach / diese falsche Pro  
 position / mit einem schein der warheit  
 vnd leidlicher glossen zu beweisen /  
 Wird er sich doch damit nicht weis  
 brennen / noch der auffgelegten bea  
 schuldigung / Als hette er nie mit den  
 Interims Schindlen gebulet noch ge  
 heuchelt / frey machen.

Vnd das es war sey / So stimm  
 met seine Glosa vnd die Proposition  
 weit nicht mit einander. Denn die  
 Glosa schleusst das *Meritum* oder Ver  
 dienst gantz vnd gar aus / Als nicht nö  
 tigt / Die Proposition aber wil der  
 werck verdienst eingeschlossen / vnd in  
 allweg als nötig dabey habe. Nu gibte  
 je das der gemein brauch aller Sprach  
 chen vnd tegliche erfahrung / das alles /  
 was zu eines andern Weil zu erhalten  
 von nöten ist / Das dasselb nicht allem  
 mus verstanden werden / *de causa sine qua  
 non* (Welche doch allhie weder platz  
 noch raum hat) Als on die es nicht bez  
 stehen

## Widerlegung der Propost.

stehen könde / Sondern es wird für  
nemlich verstanden / *de causa efficiente, instrumentali, formali & materiali* / Als dadurch  
dasselb seinen anfang / mittel vnd ende  
hat / Als zu einem Baum gehören / der  
Meister / die Beil / Holtz / vnd der  
gleichen.

Das man aber sagen wolt / Gute  
Früchte sind nötig zu einem guten  
Baum / Das ist auch nach der Ver-  
nunfft in keiner sprach gebreuchlich /  
So leidets auch die Erfahrung vnd  
Ordnung der Natur nicht / Ja es fin-  
det sich eben das Widerspiel / Nem-  
lich / Gute Früchte zu bringen / da ge-  
höret ein guter Baum zu / Also kan  
man auch mit gutem Grund sagen /  
Zu guten Wercken gehöret vnd ist nö-  
tig die Seligkeit vnd Gerechtigkeit.  
Denn / wie S. Joha. sagt / Wer recht  
thut / der ist gerecht. Das kan aber  
hinwider nicht bestehen / noch recht  
mit grund gesagt werden / Gute werck  
sind nötig zur Seligkeit. Denn diese

verkeren

verkeren die natürliche Ordnung/ Vnd  
 setzen gute Früchte für vnd ehe dem  
 Baum/ Vnd gute Werck ehe man ses  
 lig wird / Vnd gerechte Werck oder  
 recht thun / ehe man gerecht worden  
 ist / Vnd ziehen also das Werck dem  
 Meister für.

Darumb ist dieser Irrthum Ma  
 ioris einer ernstest Einrede vnd Wider  
 sprechung wol werd / Sonderlich / die  
 weil er so ein meisterlich Glöslin dazu  
 ertichtet / vnd herfür bringet / Damit  
 vnter einem schönen schein / der Papis  
 sten irrige / vnbeständige / zweifelhaff  
 tige vnd halbmündige Proposition /  
 hemisch vnd mit so gefehrlicher weis  
 se zu reden / zu schmücken vnd verz  
 decken. Denn so es sollte gelten / Das  
 es nur ein Kunst vnd jederman solt frey  
 stehen / mit geferbten Glöslin die Irr  
 thum zu schmücken / So köndten eben  
 so leicht Porphyrii / Arii / vnd anderer  
 Ketzer vnnnd Schwermer greiffliche  
 vnd lesterliche Irrthum / Die sie ha

D iij ben

## Widerlegung der Proposi.

ben fürgeben / mit dergleichen spitzz  
fündigen Glosen auch verstrichen vnd  
entschuldiget werden.

### II.

**W**An pfleget zu sagen / Es sey  
nichts fruchtbares denn Irr  
thum. Denn ein Irrthum ge  
biret vnd henffet jmer den andern / Sie  
machen aber gemeiniglich iren Weis  
ter so vnruhig vnd vergessen / Das  
er sich jmer je weiter vnd mehr in Irr  
thum versencket vnd vertieffet / Also  
gehet es / leider / D. Maiorn auch / Den  
nach dem er sich einmal dazu bringen  
vnd bereden hat lassen / Das er dieser  
schlipfferigen / vngewissen vnd Papi  
stischen Proposition von notwendig  
keit guter Werck zur Seligkeit hat an  
genommen / Feret er fort / vnd geret  
dennoch endlich / durch gewaltigen  
Irrthum / dahin / Das er nichts we  
nigers / denn wie die Papisten selbst  
sich vernisset zuverteidigen / das gar  
offent

offentlich vnrecht ist/ Vnd stößet eben  
damit selbs seine vorgemelte Glosa  
widerumb / da er sagt / Gute Werck  
seien zur Seligkeit nötig / Aber nicht  
meritorie / Das ist / die Seligkeit da  
durch zuuerdienen / Vnd verwirret sich  
mit öffentlichen / auch an jm selbs wi  
derwertigen reden.

Den der folgende Irrthum /  
Welchen er aus den drey oberzelten  
Propositionibus / Als ein tödlichs  
schedlichs Giff genommen hat / strei  
tet öffentlich wider den rechtẽ brauch  
vnd eigenschafft des Glaubens vnd  
zurechnung des Verdiensts Christi /  
Von welchen doch die heilige Christ  
liche Kirch / aus der heiligen Schrift  
vnd Augspurgischen Confession mit  
einer meinung bestendig also beken  
net / Nemblich / Das das Verdienst  
Christi / allein durch den Glauben an  
genommen / gefasset / ergriffen / vnd ei  
nes jeden selb eigen werde. Maior aber

D iij sag

## Widerlegung der Proposi.

sagt klar / vnnnd mit ausgedruckten  
offentlichen worten in seiner Disposi-  
tion / vber die Epistel zun Römern /  
Cap. 10. Das solche zueigung oder  
erlangung nicht allein durch den glau-  
ben / Sondern auch durch die Con-  
fession vnd das bekennen geschehe.

Was köndte doch jmer vngeschick-  
ters vnnnd schedlichers ertichtet wer-  
den? Denn wie würde sich das rei-  
men / Wenn man einem armen Bett-  
ler etwas köstliches schenckte vnd dar-  
reicht / Er aber / so bald er mit den han-  
den zugriffe / Auch zugleich die Zun-  
gen heraus stretchete / vnd wolte damit  
auch zugreifen / Da sie doch dazu  
nicht geschaffen / noch etwas zu fass-  
sen vnd zu begreifen tüglich ist? Also  
flicket Maior noch viel vnbescheidener  
den Glauben / vnd das Bekennen / als  
für einerley dinge / Das verdienst Chri-  
sti damit zu gleich ergreifen / zusam-  
men / So sie doch gar weit zu vnters-  
cheiden sind. Denn

Denn der Glaub/Welchen Gott  
 allein in vns wircket vnd schaffet / vnd  
 durch den heiligen Geist in vns anzün  
 det / ist fürnemlich des armē Bettiers  
 hand / Damit wir den gescheneckten  
 Heiland Christum im Wort anneh  
 men vnd ergreifen / Wie vnzelielich viel  
 Sprüche in der Schrift beweisen /  
 Matth. am letzten / Wer da glaubt  
 vnd getaufft wird / der wird selig. Item  
 Isa. 53. Vnd durch sein Erkentnis /  
 wird Er / mein Knecht / der gerechte /  
 viel gerecht machen. Jere. 5. **HERR**  
 deine Augen sehen nach dem glauben.  
 Abac. 2. Der Gerechte wird seines  
 Glaubens leben. Rom. 3. So halten  
 wir es nu / das der Mensch gerecht  
 werde / on des Gesetzes werck / allein  
 durch den Glauben etc. Das Bekenn  
 nen aber ist nur ein Frucht des Glauben  
 s / Dadurch wir von Gott kein heil  
 empfahen / Sondern wir bekennen  
 D v dadurch

## Widerlegung der Proposti.

dadurch / das heil / so wir zuuor durch  
den Glauben empfangen haben / to  
ben vnd rühmen mit solchem Bekent  
nis vnsern lieben Gott / Wie im 116.  
Psalm. Ich glaub / darumb rede ich  
etc.

Vnd zwar D. Maior wird durch  
die helle Wahrheit selbs gedrungen /  
vnd dahin vberzeuget / Das er an seer  
viel orten in seinen Büchern bekennet /  
Das allein der Glaub gerecht mache /  
Vnd das die Wolthat Christi allein  
durch den Glauben empfangen vnd  
angenommen werden. Wie bald aber  
vergift er sein selbs / Vnd slicket an den  
Glauben / auch das Bekennen / Vnd  
eignet jm mit dem Glauben zugleich  
zu / das empfangen der Wolthat Chri  
sti / Damit gibt er vrsach / mancher  
ley Mittel mehr zu erdencken / Da  
durch solche Wolthat solten angeno  
men werden / Deren denn das schöne  
Bapstum vol vol ist. Denn das brau  
chet auch dazu die Messe / Wallfarten /  
der

der todten Heiligen anruffen / vnd der  
selben Fürbitt etc.

## III.

**I**m dritten / Nach dem er die  
Application des verdiensts Chri  
sti / dem Bekenntnis so wol / als  
dem Glauben hat zu geschantzet /  
Macht er sich trotzig herfür / vñ macht  
ein gros Geschrey vnd viel rühmens /  
vom Nutz vñnd Notwendigkeit der  
guten Werck / Auff das der Papisten  
pochen vñnd vermessens trotzen auff  
gute Werck / ja nicht dahinden blei  
be / Dne zweifel denselben damit zu  
hofiren / Vnd andere trewe Prediger  
damit verdecktig zu machen / Als le  
rete niemand / denn er allein / von gu  
ten Wercken. Vnd nach dem er die gu  
ten Werck also wil hoch erheben / wie  
der der heiligen Schrift Regel / bewei  
set er ein zwifaches Papistisches stücke /  
Das eine / Das er leret / Sie seien ein  
nötig stück vnser Seligkeit für Gott.

Das

## Widerlegung der Proposi.

Das ander / Das sie seien *causareptina* /  
das ist / Das die Seligkeit durch gute  
Werck erhalten werde.

Das erste Stück ist zu finden in  
seiner Definition vber das 10. Capit.  
zun Römern / Daselbst spricht er also /  
*Iustitia est uerbum de Filio Dei incar-*  
*nato & crucifixo habere in corde, in eo*  
*lætari, acquiescere, id ore profiteri &*  
*propagare, & propter hoc uerbum om-*  
*nia extrema, etiam mortem sustinere &*  
*patri, &c.* Das ist / Das ist die Gerech-  
tigkeit / das jemand das Wort von  
dem son Gottes / das er Mensch wor-  
den vnd gecreuziget ist / im Hertzen  
hat / daran alle seine freude hat / das  
Gewissen darin zu frieden stellet / das  
selb mit dem mund bekennet / weit aus-  
breitet / vnd vmb des worts willen alle  
eufferste Not / auch den Tod selbs  
bestendig leidet etc.

In dieser Definition verrückt er  
der

der Gerechtigkeit Deubtgrund / Vnd  
 vermendet vnser Werck / vnd die  
 Werck Christi vnternander / Wiewol  
 verdunckelter weise / Als die zusamen  
 mit einander eine gantze vollkomene  
 Gerechtigkeit machen solten / So sie  
 doch weiter / denn Himel vnd Erden /  
 von einander zu vnterscheiden sind /  
 Ja sie sind in solcher weise vnd erticht  
 tem fürgeben / gantz vnd gar wider  
 einander / Können vnd mögen / ja müß  
 sen auch *in foro Articulo iustitie* / Das ist / im  
 Artikel von vnser rechtfertigung nicht  
 beisamen gefast stehen.

Denn es mus in dem Artikel ala  
 lein herrschen vnd regiren / dieser Ge  
 horsam Christi / Welcher darinnen  
 vnser Gerechtigkeit auch eigen vera  
 dienst im wenigsten neben sich nicht  
 dulden vnd leiden mag / Wie Christus  
 selbs zeuget / Joha. 16. Vmb der Ge  
 rechtigkeit willen / Denn ich gehe zum  
 Vater / Mit welchem Spruch Chri  
 sti gantz

## Widerlegung der Proposti.

sti gantzlich vber ein stimmet / Der  
Spruch Pauli zum Galat. So aus  
den Wercken die Gerechtigkeit ist / So  
ist Christus vergeblich gestorben /  
Vnd eben das wil auch das hingehen  
zum Vater / das das sterben vnd leiden  
wil. Item Isai. am 51. Hebt eure  
augen auff gen Himmel / vnd schawet  
vnten auff Erden / Denn der Himmel  
wird wie ein Rauch vergehen / Vnd  
die Erde / wie ein Kleid veralten / Vnd  
die auff Erden wonen / werden dahin  
sterben / wie Das. Aber mein Heil  
bleibet ewiglich / Vnd meine Gerech-  
tigkeit wird nicht auffhören. Vnd am  
45. Ich schwere bey Mir selbst / Vnd  
ein wort der Gerechtigkeit gehet aus  
meinem Munde / da sol es bey blei-  
ben / Nemlich / Mir sollen sich alle  
Knie beugen / vnd alle Zungen schwe-  
ren / vnd sagen / Im **HERREN** ha-  
be ich

be ich Gerechtigkeit vund Stercke /  
Solche werden auch zu Im komen  
etc.

In diesen vnd dergleichen Sprü-  
chen gebent der Son Gottes / Das  
man seinen Behorsam in einem rech-  
ten festen Glauben annemen / Vnd  
sich damit wider das Gericht vñ zorn  
Gottes trösten vnd auffhalten sol/  
Als dadurch wir recht warhafftig vñ  
volkomen / from vnd gerecht sind für  
Gott / Vnd aber vnser Menschliche  
Werck in keinen weg darunter mit ein-  
mengen. Denn sonst verleyret man  
den Christum gar mit einander. Dar-  
umb treibet solche Lere der heilig A-  
postel S. Paulus so hefftig *per Antithesin*  
fürnemlich zun Römern vnd Gala-  
tern / So wir gerecht werden durch vn-  
sere Werck / So ist Christus vergeb-  
lich gestorben. Item Gal. 3. Alle die  
vnter den Wercken des Gesetzes sind /  
die sind

## Widerlegung der Proposi

die sind vnter dem Fluch. Item/ Wir  
werden aus Gnaden selig/ Vnd nicht  
aus wercken / Auff das sich niemand  
rühme / Denn sonst were es kein rech-  
te Gnade etc.

Es kan auch gar nicht sein / Das  
sich vnser glaub solt auff zweierley vn-  
terschiedliche gründe zu gleich halte/  
Nemlich auff vnser / Vnd denn auch  
auff Christi Werck vnnnd Verdienst/  
Denn mit der weise würde er vngewis  
vnd vnbestendig / Vnd endlich das Ge-  
wissen im zweifel verstocken / Dar-  
umb sagt S. Paul. Rom. 3. Derhalb-  
ben mus die Gerechtigkeit durch den  
Glauben komen / Auff das sie sey aus  
Gnaden / Vnd die Verheissung fest  
bleibe allem Samen.

I. Daraus folget / Das D. Mar-  
ior den hohen Rhum / welchen er den  
guten Wercken gibt / nicht in seiner ge-  
bürlich

bürlichen art / Sondern felschlich vnd  
 gotloser weise zulegt / Dieweil er sie in  
 der Rechtfertigung mit dem verdienst  
 Christi vergleichet vnd vermendet.  
 Denn mit dieser weise / nimpt er den  
 Rhum vnser Rechtfertigung vnd  
 Weils (der doch allein dem Gehorsam  
 Christi gebüret) vnd gibt in auch vn-  
 sern Wercken / Vnd trennet also vnser  
 Glaubens vertrauen vnd zuuersicht /  
 Weiset ein teil auff Christum. / Das  
 ander auff vnser Werck. Wer köndte  
 solche Lere nicht für lauter Papistisch  
 vnd Abgöttisch halten vnd achtens

II. Das ander Stück vnd rhum /  
 den er den guten wercken zumisset / ist  
 nichts weniger gottlos vnd vnrecht /  
 in dem / das er den guten Wercken die  
 krafft zueigent / Das wir dadurch das  
 empfangene Weil erhalten könden /  
 Wie solchs zu finden ist in seiner Pred  
 igt von der Bekerung S. Pauli B. 3.  
 So doch die erhaltung vnser Weils /  
 P eben

## Widerlegung der Proposi.

eben so wol/ als die Gerechtigkeit alle  
lein Christi eigen Werck ist. Denn wie  
Er vns allein durch sein Verdienst/  
Welchs wir mit dem Glauben ergreif  
fen/ gerecht vnd selig macht / Also er  
helt Er vns auch in derselben Gerech  
tigkeit vnd Seligkeit wider des Fleis  
ches vnd Satans versuchung / durch  
den heiligen Geist / Stercket vnsern  
Glauben/ Gebet/ vnd newen Gehors  
sam/ Wie diese sprüche klerlich zeugen  
Phil. 1. Der in euch hat angefangen  
das gute Werck / Der wurd auch  
vollfuren bis anden tag Ihesu Chri  
sti. Item 1. Pet. 1. Die jr durch Gote  
tes macht/ durch den Glauben bewar  
ret werdet zur Seligkeit.

Wo auch der Son Gottes nicht  
mit dem Vater vnd heiligem Geist/  
seine wonung in vns machete / Vnd  
als ein vnüberwindlich Weib/ vns  
seine schwache Glieder teglich vnd  
vnter

vnterlas stercket / Vnd dem wütendem  
 Teufel wehrete / So were es allen  
 Menschen vnmüglich / die empfangene  
 Gnade des ewigen Lebens zu er-  
 halten / Wie Isai. am 40. sagt / Der  
 HERR der ewige Gott / der die ende  
 der Erden geschaffen hat / wird nicht  
 müd noch matt / Sein Verstand ist  
 vnausforschlich / Er gibt dem Müden  
 krafft / vnd sterckung dem vnuermü-  
 genden / Die knaben werden müde  
 vnd matt / vnd die Jüngling fallen /  
 Aber die auff den HERN harren /  
 kriegen newe krafft / Das sie ausfa-  
 ren mit Flügeln / wie Adler / Das sie  
 lauffen vnd nicht matt werden / Das  
 sie wandeln / vnd nicht müde wer-  
 den.

Zu der erhaltung aber der Ses-  
 sigkeit gehört zu gleich die Vergebung  
 der Sünden / vnd die Verjüngung

P ij mit

## Widerlegung der Proposi.

mit Gott / Denn also bleiben vnd bestehen wir endlich in Christo / Wenn an vns keine Verdammis mehr vbrig ist / Oder weñ vns vnser Sünde nach gelassen vnd abgethan werden / vmb Christus willen / Der vns on vnterlas für dem Vater versünet / verbitt vnd vertritt. Denn also spricht David / **HERR / HERR /** Wenn du Sünde zurechnest / Wer kan für dir bestehen? Dieweil aber der **HERR** vns die Sünde nicht zurechnet / So können wir für dem Angesicht des Allmechtigen Gottes / gleich wie für einem verzerenden Feuer / vnter dem Schatten des Mittlers bedeckt stehen vnd bleiben.

Darumb irret Maior hiemit auch gar schwerlich / Das er vnsern guten Wercken / die macht vnser Heil zu erhalten / zumisset / Denn damit füret er die einfeltigen Christen vom Gebet vnd anruffen / vmb die stetige vnd vnablessige

ablessige Vergebung der Sünden/  
 Auch vmb Krafft vnd stercke des Glau-  
 bens / vnd erhaltung vnsers Heils/  
 Vnd gibt inen ursach auff ire trotzige  
 Vermessenheit vnnnd eigen Vertrawen  
 irer Werck vnd Gaben sich zuuerlas-  
 sen/Dawider sagt S. Paulus 2. Cor. 1.  
 Wir sollen vnser vertrawen nicht auff  
 vns setzen/sondern auff Gott /der die  
 Todten erwecket etc.

Aus diesen erzelten gar groben  
 vnd schenslichen Irrthumen ist wol  
 zu sehen / Das Maior diesen Grund  
 des Artikels vnserer Rechtfertigung  
 verrueckt / Vnnnd damit den Papisten  
 wehr vnd waffen wider vns darreicht  
 vnd zuschantzt/Dieweil er nu ire wort  
 vnd rede herfür auff den platz brin-  
 get/vnd dieselben mit besondern glösz-  
 lin schmückt vnd verkleidet/Damit er  
 das Verdienst Christi / Das allein  
 durch den Glauben ergriffen wird/  
 auch dem Bekennen zueigent. Vnnnd

P ij

hernach

## Widerlegung der Proposi.

hernach in der Definition/die Gerechtig-  
keit vnd vnser Tugend vnd Werk  
vermenget. Damit stielet er Christo  
seine gebürliche Ehre / Vnd stürtzet  
die Gewissen in ein schendliche Phari-  
säische / heuchlische vnd Papistische  
Vermessenheit / Daraus sie endlich  
müssen / wie Cain / in ewige verzwei-  
telung fallen.

Vnd wiewol er solche grewliche  
Irrthum herfür bringt vnd verteidigen  
wil / So wil er nichts desto weniger  
/ keines Abfalls bezichtiget sein /  
Sondern rhümet vnd trotzet vber sei-  
ner Beständigkeit / Wil kein Wasser  
betrübt haben / Gibt für / Wie steiff  
er allzeit die fleischliche Freiheit vnd  
jre Sicherheit zu sündigen gestrafft  
habe / Vnd jederman from zu werden /  
vnd zu guten Wercken vermanet hab.  
Er wil aber vnter des nicht bedencken  
Was vntreglichen schaden er mit die-  
sem schönen Schein hab angerichtet /  
In dem er vns den Artikel von der  
Rechte

Rechtfertigung damit verfälschet /  
 Aus dem Euangelio ein Gesetzere  
 macht / Christo dem Herrn seine  
 Ehre stielet / Der Papisten vermesse-  
 nen Rhum der Werck damit besteti-  
 get / Den vnwürdigen armen bestürtz-  
 ten Gewissen allen Trost abschneidet /  
 vnd zu endlichem verzweueln verur-  
 sacht.

Dieser Schade ist grösser / denn  
 die fleischliche Sicherheit selbs / Wel-  
 che doch auch an irem ort vnterschied-  
 lich gar ernstlich gestrafft wird / von  
 allen Christlichen Predigern des E-  
 uangelij. Vnd was künde stercker wi-  
 der die Sicherheit geredt werden / denn  
 wie in der vnsern Schrifften vnd Pres-  
 digten mit höchstem ernst getrieben  
 wird / Als wenn sie sagen / Welcher in  
 keinem rechten fürsatz stehet from zu  
 werden / Vnd besteißet sich nicht vom  
 bösen abzulassen / vnd guts zu thun /  
 Vnd beharret in aller seiner bösen lust-  
 seuch vnd freiem Lauff / wider sein  
 Gewis-

## Widerlegung der Proposti

Gewissen / Der ist geistlich todt / hat den Glauben / da er einigen gehabt / verloren / Den heiligen Geist betrübt / Wird vom Teufel selbs getrieben / Dñ wird schuldig zeitlicher vnnnd ewiger Straffe etc. Welchen diese vntregliche vnd geschwinde Donnerschlege nicht schrecken von seinem fleischlichen freien Lauff abzustehen / Vnd sich in einen neuen Gehorsam / vnd neues Leben zu begeben / Der wird durch D. Maioris Papistische Proposition / zu ernewerung vñ besserung nimermehr gebracht werden.

Nicht aber allein streitet dieser Irrthum mit Gottes Wort / Wie den bis anher gnugsam erwiesen ist / Sondern auch von vnsern Kirchen die ganze zeit her des herwider brachten Evangelij / Fürnemlich aber des 36. jars Vnd hernach / da der selbige von etlichen / nemlich aus dem Papstum wider auff die bahn gebracht / verdampft vnd verworffen ist / Ober das / so verdampt

dampft auch diesen Irrthum offentlich die Augspurgische Confession vñ Apologia / in dem sie viel saget / Wie wir aus Gnaden von Gott angenommen / vñ für gerecht von jm gehalten werden / Dazu von guten Wercken / vñ dieselbige Stücke alle mit hohem fleis handelt / Auff das damit vnser widerfacher möchten gewonnen werden / Aber dieser Proposition / so den Mönchen vñ Widersachern seer lieb vñ angenehme ist / gedenckt sie nirgend.

## IX.

# Widerlegung der Abdiaphoristen.

p v

Es

## Widerlegung der



**L** S foddert der All-  
mechtig Gott vnter  
andern viel schönen  
Gottesdiensten / da-  
mit er wil geehret sein  
keine mehr noch heff-  
tiger / denn ein rein/  
gegründ / frey vnd öffentlich Bekent-  
nis des heiligen Euangelij. Es mus  
aber solch Bekentnis nicht falsch / tück-  
ckisch noch vngewis sein. Da man  
mit Gott vnd den Feinden verdeckte  
Wendel füret / Vñ wie man sagt / Den  
Mantel nach dem Winde hengeret / son-  
derlich zu der zeit / Wenn die Tyrannen  
sich vnterstehen die reine Lere entwe-  
der durch hemische / tückische verfelsch-  
ung zu hinder schleichen / oder mit  
öffentlicher Gewalt zu vberfallen vnd  
auszutilgen / Als denn wird die öffent-  
liche Bekentnis am meisten erfoda-  
dert / Auff das Gott öffentlich da-  
durch bekant vñnd geehret / Auch die  
liebe Kirche danon gestercket vnd ge-  
bessert

bessert werde / Wie das bezeugen die  
 schönen Spruch Christi / Matth. 10.  
 Wer mich für den menschen bekennet /  
 den wil ich widerumb auch bekennen  
 für meinem himlischen Vater. Item  
 Mar. 8. Wer sich meiner schemet etc.  
 Vnd zun Ebreern 13. So lasset vns nu  
 Opffern / durch in das Lobeopffer  
 Gott allezeit / das ist / Die frucht der  
 Lippen / die seinen Namen bekennen.  
 Vnd Matt. 21. Da foddert er das Be-  
 kenntnis mit diesem ernst / so man wol-  
 te stum werden / das auch ehe die steine  
 reden müsten / So ist auch in der War-  
 heit kein schendlicher Laster / das je-  
 mals ein Christ thun oder begehen  
 kan / denn so er in der Bewerunge das  
 Bekentnis seines Glaubens / entwe-  
 der fallen lesst / oder aber hemisch ver-  
 helet / vnd mit falschen Gerblin verblü-  
 met / Oder mit den Feinden gottlose  
 vnbes

## Widerlegung der

vnbeständige versünung vñ Kretzsch-  
merey / mit gefahr der Wahrheit / er-  
tichtet vnd fürmumpt.

Weil aber das Bekentnis allezeit  
seer gefehrlich ist / Vnd kan nicht ge-  
schehen / on grosse vnd merckliche Ge-  
fahr / Zu dem / so trachten wir alle na-  
türlicherweis / nach guter Ruhe vnd  
Sicherheit / Vnd wolt jederman gern  
fried haben / Darumb / wenn sich ein  
Wetter erhebt / Das eine verfolgung  
zubefahren ist / So faren die weltweis-  
sen Klügling zu / fürchten irer Daut  
vnd Güter viel mehr / denn das die  
Kirche vnd Wahrheit vnuerferet erhal-  
ten werde. Erdencken demnach aller-  
ley Kencke / Wie sie es in Religions sã-  
chen also machen / Das sie gleichwol  
inen derwegen niemand zu Feinden  
machen / Vnd lassen inen selbs diese  
Weisheit vnd behendigkeit vber die  
masse wolgefallen / Wenn sie in den  
Sachen / Die an inen selbs Mittel-  
ding sind / sich mit den Feinden kñd-  
ten ver?

ten vertragen/ vnd vergleichen / Ja sie  
schwüren drauff/ das dis hincken vnd  
wancken / der Kirchen Christi keine  
gefahr noch schaden bringe.

Dis hat sich trefflich fein vnd  
augenscheinlich gefunden vnd bewei-  
set zur zeit / Da sich das Augspurgisch  
Edict / das man das Interim heisst/  
von den öffentlichen Feinden des E-  
uangelij geschmidet / Vnd öffentlich  
zu mercklichem vntergang der Kir-  
chen / Vnd wider auffrichtung des  
Grewels des Papstums / jederman  
auffgedrungen ward / mit seer ge-  
schwindem dreyen vnd hefftigem ge-  
bieten / Daselbs haben sich trefflich  
viel mit solchem dreyen / von der be-  
stendigkeit zu bekennen/ scheinlich las-  
sen abschrecken/ allerley gefahr zuer-  
meiden / Vnd sind dem elenden geflick-  
ten Götzen zu fusse gefallen.

Anderere / die zuuor die fürnem-  
sten vnd dapffersten waren / Vnd bey  
jeder

## Widerlegung der

Jederman das grösste ansehen hatten/  
Auch mit grossen Gaben für andern  
Leuten begnadet / traffen die mittel  
Straffe/Woltens nicht gar verwerf-  
fen / vnd doch nicht durch aus an-  
men/Vnd vermeineten/ Das were der  
sicherste vnd nechste Weg / Das man  
viel lieber solte etliche leidliche Cere-  
monias vnd verenderung annemen/  
Vnd sich mit den Widersachern/ wie  
man auch köndte oder möchte / ver-  
gliche/denn das man den Feind / der  
on das im harnisch vnd zum hefftig-  
sten erzürnet war / noch herter solt für  
den Kopff stopffen / erzürnen / vnd zu  
mehrer bitterkeit verursachen / Vnd  
mit solcher störrischer hertigkeit vnd  
halsstarrigkeit die Kirchen gar ver-  
wüsten/Vnd alle weltliche Regiment/  
zugleich in einen hauffen werffen.

Mit diesem Donnerschlag haben  
sie mechtig viel Leute abgeschreckt.  
Denn sie nutzten es hoch auff/ Da  
man

man also halstarrig vnd trotzig wür-  
de fortfaren/ Vnd den zornigen Fein-  
den so gar/ auch in den leidlichen Ce-  
remonien/ nichts wolte weichen/ So  
müſte hieraus nichts anders erfolgen  
noch zu gewarten ſein/ denn ein gewiſſe  
ſe zerſtörung / verwüſten vnd endliche  
verfolgunge aller Schulen/ Kirchen/  
Gelerten / Pfarrherrn/ Weib vnd Kin-  
der/ Vñ letztlich würde gantz Deuſch  
land/ vnter das grewlich vnd vntreg-  
lich Diſpaniſch Joch getrieben vñnd  
gebracht werden.

Derwegen zu vermeiden alle dieſe  
ſe grauwſame vnd vntregliche Gefehr-  
ligkeit / Damit doch der Kirchen et-  
wa ein kleine Ruhe vnd Fried erhal-  
ten würde / Auch der ſo hart erzürn-  
te Feind etwas geſtillet / Müſte man  
ſich ehe gütlich vnd viel lieber in eine  
leidliche Dienſtbarkeit in Religions  
ſachen einlaſſen/ denn mit einem vnbe-  
ſonnenen Euer vñ trotz neue Lermen  
anrichten vnd erregen/ Vnd damit vn-  
zelich

## Widerlegung der

zeliſch viel Leute in höchſte Gefahr  
opffern vñnd bringen / Damit doch  
auch der Religion wenig geholffen/  
Sondern dieſelbe viel mehr zu grund  
verloren/würde.

Darumb lieff man ſo offft zu Rath/  
hielt viel Verſamlunge / Betrübten  
vñnd erſchreckten die beſtendigen / be-  
rathſchlagt es alles tieff / macht man  
cherley newe Reformationes / Deren  
auch etliche in Druck kómen ſind /  
Welche / dieweil ſie groſſer Fürſten  
Titel / vñnd der hohen Preceptorn Na-  
men / ein groſſes anſehen etlicher Leute  
füreten / Daben ſie viel einfeltige  
Chriſten verurſacht / Das ſie inen bei-  
fall / vñnd ſich inen anhengig gemacht.  
Vñnd damit der betrübten Kirchen /  
nicht geringen ſchaden gethan vñnd zu  
gefügt.

Dieſe ſchedliche vñnd Abgöttiſche  
Zulerey vñnd gottloſe Vergleichung/  
mit den öffentlichen Feinden der war-  
heit / Vñnd das Philoſopische vñnd der  
Weltz

Weltweisen witzige Gericht / beide  
 Gott / vnd die Tyrannen damit zu be-  
 triegen / Eben dasselb straffen / vnd  
 sechten wir an / Als offft wir der Adia-  
 phoristerey gedencken / Wie denn auch  
 alle frome Christen diesem Irrthum  
 widerstehen vnd widersprechen sollen.  
 Vnd solte auch die gantze Welt dru-  
 ber krachen vnd erzürnt werden / bis  
 so lang durch öffentliche vnd einhelli-  
 ge zeugnis aller der / die mit ernst vnd  
 Wahrheit die vnuerrückte Augspurgi-  
 sche Confession bekennen / Diese sched-  
 liche Irrthum verwerffen / Vnd wi-  
 der weg gereumet werden. Darumb  
 werden wir durch wichtige Gründe  
 vnd vrsachen / aus Gottes Wort ge-  
 nommen / Wie derselben etliche hernach  
 erzelet vnnnd angezeigt werden / dazu  
 bewegt vnnnd gedrungen / Das wir  
 solch Adiaphoristische Wendel / Cor-  
 ruptelen vnnnd fürnemen / widerlegen  
 vnd verdamnen.

D.

Zum

## Widerlegung der

**I**m ersten. Es mus die einfeltige Kirche wol gefasset / vnd stetig vnterricht werden / von den stücken in der Religion / die da disputirlich sind / Damit jederman guten vnterscheid zu machen wisse / zwischen den Ratschlegen / die aus göttlicher Schrift bey leben D. Luthers seligen / ehe vnd zuvor die Interimistische Tyranny die Kirchen vberfallen hat / aus Gottes Wort / der Kirchen treuen Pflegern sind fürgehalten worden / vnd zwischen den lauter Adiaphoristischen handlungen / Die sich hernach / da es wolt vbel zugehen / begeben haben.

Nu war dazumal / ehe sich der Krieg anfieng / dis jedermeniglich beständige / einhellige meinung / Man kündte vnd solte / im wenigsten auch / gar keine verenderung in den Ceremonien fürnemen noch anfahen / den feinden des Euangelij / vnd den Papisten zugefallen / Es were denn / Das man  
im

im Fundament vnd grund der Deubt  
 artikel/zunor mit jnen wol eins wordē  
 were/ Das die reine Lere / vnd rechter  
 brauch der Sacrament durchaus ver-  
 gleichen/ vnnnd allenthalben angeno-  
 men were.

Vnd war dis die beweisung vnd  
 ursach solcher meinunge/ Das S. Jo-  
 hannes in seiner 2. Epistel klar sagt /  
 So jemand zu euch komet/ vnd brin-  
 get diese Lere nicht / den nemet nicht  
 zu haus / Vnd grüsset in auch nicht.  
 Denn wer in grüsset / der macht sich  
 theilhaftig seiner bösen Werck. Vnd 2.  
 Corinth. 6. Ziehet nicht am frembden  
 Joch / mit den Vngleubigen. Denn  
 was hat die Gerechtigkeit für genies/  
 mit der Vngerechtigkeit? Was hat  
 das Liecht für gemeinschaft mit der  
 Finsternis? Wie stumpt Christus vnd  
 Bestial? Oder was für ein teil hat

D ij der

## Widerlegung der

der Gleubige mit dem Vngleubigen  
Was hat der Tempel Gottes für ein  
gleiche mit den Götzen? Psal. 1. Wel-  
dem Man/ der nicht wandelt im rath  
der Gottlosen/ noch tritt auff den weg  
der Sünder/ noch sitzt auff dem Stuhl  
der spötter etc. Psal. 26. Ich sitze nicht  
bey den eiteln Leuten/ Vnd habe nicht  
gemeinschaft mit den falsche/ Ich ha-  
se die gemeinschaft der boshaftigen  
Vnd sitze nicht bey den Gottlosen.  
Dierbey wird auch angezogen der  
Spruch in der Offenbarung Johans  
nis/ Da verboten wird/ Das niemand  
des Thiers Malzeichen an sich nemen  
solle. Welchs verbent das menschliche  
Bulen/ mit den Feinden des Euange-  
lij/ Vnd das vntrewer absondern von  
der rechten beständigen Kirchen.

**V**m andern. Es ward auch mit  
einhelliger meinung/ einmütig-  
lich gelert/ Das die Ceremonien  
in zei-

in zeiten / Da man das Bekenntnis  
von vns erfodert / als den nicht mehr  
Mittel ding sein köndten / Darumb  
müſte vnd kündte man auch im wenig-  
ſten nicht weichen. Den ſonſten wür-  
de durch ſolch wancken vnd weichen /  
die öffentliche Bekenntnis verdunckelt  
vnd der Kirchen Freiheit durch des  
Herrn Chriſti Blut erworben / ge-  
ringert / Zu dem das man auch keinen  
kleinen Eingang / wie gering er auch  
ſcheinet / ſolte verachten / Sintemal  
jmer ſobald eine newerung der andern  
folget.

Vnd dieſes zubefetigen / wurd  
angezogen / vnd eingefürt Marci Aea-  
thuſij Spruch / aus der Hiſtoria The-  
odoreti / der da ſpricht / Wer zur Ab-  
götterey nur einen einigen heller ſtew-  
ert / Der hat ſo viel gethan / Als wenn  
er all ſein vermügen dargereicht vnd  
dazu geholffen hette. Item / das Ex-  
empel Danielis / vnd Eleazars / Die  
da beide bezeugen / Das in dieſen ge-

D iij

ringen

## Widerlegung der

ringen vnanschenlichen dingen / offte  
die höchste macht gelegen ist. Denn es  
war ja eigentlichen an sich selbs ein  
vnnötig vnd gantz Mittel ding / das  
Daniel die Fenster in seinem gemach  
auffsperrret / zur zeit seines Gebets / Ni  
hette das Gebet eben so wol künden  
mit gutem Gewissen thun / bey ver  
schlossenen Fenstern / Aber ehe Daniel  
wolte andern vrsach geben / Das sie  
gedechten / Er hette sein Gebet aus  
zwang vnd furcht des verbots des  
Gottlosen Königs vnterwegen gelas  
sen / Oder aber heimlich gethan / Ehe  
sperrret er die Fenster auffss weitest auff  
Liesse sich auch ehe darüber vnter die  
Lewen in die Gruben werffen / Ehe  
vnd denn er mit einem schein wider  
das ander Gebot sich einiger furcht  
des Königes halben / im damit zu  
heucheln / oder gehorchen / wolte mer  
cken lassen. Eben der gleichen wolte  
Eleazar sich lieber seine Feinde erwür  
gen lassen / denn das er dafür allein sol  
te gehal

te gehalten werden / Das er hette das von Gott verboten Schweinen fleisch den Feinden zu gefallen gessen / Die weil er mercket / das Antiochi Diener nicht allein suchten / Das er für seine Person solt wider das Verbot göttlichs Gesetzes / Verbotene Speise essen / Sondern wolten / Das durch dis sein vbertretten / das Volck solte dencken / Er were vom gantzen Gesetz gewichen vnd abgefallen / Vnd hette Gott also verlegnet / Were gantz vnd gar ein Heide worden.

**V**m dritten. Bey leben des seligen Mans Gottes / D. Luthers da alle sach noch rhusam vnd wol stunde / ward dieses für einen festen Grund gehalten / Man müste sich wider die halstarrigen Widersacher steiff setzen / vnd sich der Exempel der Christlichen Freiheit gebrauchen / vnd halten / Dasselbige zu beweisen / setzt man diese Sprüch / 1. Corinth. 7.

Quij

Ir seid

## Widerlegung der

Ir seid thewer erkauft / werdet nicht  
der Menschen Knechte. Item Gal. 5.  
So bestehet nu in der Freiheit / damit  
vns Christus befreiet hat / Vnd lasset  
euch nicht widerumb in das knechtliche  
Joch fangen. Gal. 4. Nu jr aber  
Gott erkand habt / Ja viel mehr von  
Gott erkand seid / Wie wendet jr euch  
denn widerumb zu den schwachen vnd  
dürfftigen Sazungen / Welchen jr  
von newes an dienen woltet etc. Colo.  
2. Gehet das euch niemand beraube  
durch die Philosophia vnd lose Ver-  
fürunge / nach der Menschen sazu-  
gen / vnd nach der Welt Sazungen /  
Vnd nicht nach Christo. Item / So  
lasset euch nu niemand Gewissen ma-  
chen vber Speis oder vber Franck /  
oder vber bestimpten Fiertagen etc.  
Item / So jr denn nu abgestorben  
seid

seid mit Christo / den Satzungen der Welt / Was lasset jr euch den fangen mit Satzungen / als lebt jr noch in der Welt / die da sagen / Du solt das nicht angreifen etc. Vnd ist Menschen gebot vnd Vere / Welche haben einen Schein der Weisheit / durch selbs erwelte Geistlichkeit vnd Demut etc.

**V**im vierdten. Zu dieser Regel / wurden auch Exempel angezo- gen / Die Apostel vbertretten der phariseer Satzungen / Matth. 12. vnd 15. Gal. 2. Es ward auch Titus nicht gezwungen / sich zubeschneiden / der mit mir war / ob er wol ein Griech war. Denn da etliche falsche Brüder sich mit eingedrungen / vnd neben eingeschlichen waren / zu verkundschafsen vnser Freiheit / die wir haben in Christo Ihesu / das sie vns gefangen  
 N o                      nemen



## Widerlegung der

nemen/ Wichen wir denselbigen nicht  
eine stunde / vnterthan zu sein / Auff  
das die Warheit des Euangelij bey  
euch bestünde. Vnd im selben Capitel/  
Da er des Apostels Petri wancken /  
beide an Lere / vnd im brauch Christ-  
licher Freiheit / mit hefftigen worten  
straffet / Ich hab Petro vnter Augen  
widerstanden etc. Item / Aber da ich  
sah / das sie nicht richtig wandelten /  
nach der Warheit des Euangelij /  
sprach ich zu Petro offentlich etc.

**Z**um fünfften. Es ward auch die  
Lere vom Ergernis zu meiden /  
fleissig getrieben / Wehe dem  
Menschen / durch welchen Ergernis  
Kompt. Es ward auch fleissig gewie-  
sen / Das vnnötige vnd vnzeitige Ver-  
änderung der Ceremonien ein Quell  
vnd Ursprung ist aller Ergernis.

Vnd

Vnd sie sagten frey / Das die Lere  
 vnnnd Kirchen / nichts schendlichers  
 würde verstellen / vnd schmehen / denn  
 so man die alten vnd mit gutem grund  
 vnnnd zeitigem Rath / verworffenen  
 Lappen / solte widerumb herfür zie-  
 hen / Vnd auff die reine vnd gesauber-  
 te Lere pletzen vnd flicken / Vnnnd die  
 wol angerichten Kirchen mit dem al-  
 ten sudelwerck der Papistischen Cere-  
 monien / widerumb beschmeissen vnd  
 verstellen. Vnd diese Vermanung wi-  
 derholten sie offte / Man solte sich ja  
 wol fürssehen / Das man der Einfelt-  
 tigen vnd Schwachen / fleissig verscho-  
 net / Vnd nicht mit widerauffrichtung  
 der alten Ceremonien / sie vngewis  
 machet / Das sie dencken müsten / Als  
 were die vorige heilsame Reinigung  
 der Lere vnd Ceremonien nicht war-  
 hafftig aus Gott / Sondern nur aus  
 Menschlichem Trotz vnnnd Vermes-  
 senheit / auch Kühheit / fürgenomen  
 vnnnd angeschaffet / Ja (sagten sie)  
 solches

## Widerlegung der

Solches vnzeitiges wider auffrichten  
der Ceremonien / Die denn lauter den  
Feinden zu gefallen geschehe / were an  
ir selbs ein schendlicher Abfall vñnd  
widerruff / von der gantzen Lere. Nu  
wil aber der Apostel nicht allein ha-  
ben / Das man sich des vbels enthal-  
ten / Vñnd dasselbe fliehen vñnd meiden  
solle / Sondern er wil auch / Das man  
sich hüten vñnd fürsehen solle für allem  
bösen schein / 1. Theff. 5.

**Q** Vm sechsten. Auch müste man  
fleissig achtung drauff haben /  
Wenn die Feinde etwas von vns  
in diesen Sachen fodderten / Mit was  
fürsatz vñnd meinung sie dasselbe thea-  
ten. Denn gleich wie der Teufel gar  
nicht zu frieden ist mit der ersten Wun-  
den vñnd Beschädigung / Sondern er  
beitet vñnd brewet jmer ein Vnglück  
vñnd Vbel aus dem andern / Also wür-  
den gewislich die Feinde des Euang-  
gelij auch mit der Verenderung der  
Ceremonien

Ceremonien / nicht gesettiget noch bes  
gnüget werden / Sondern würden eis  
gentlich mit diesem Kleinen / geringen  
vnd vnansehnlichen Eingang / fort  
drücken / Auch die Lere zuuerrücken  
vnd zuuerfelschen.

Derwegen berubeten sie alle we  
ge beschlieslichen darauff / Das / wie  
offt die Papisten sich würden vnter  
stehen / vns die Ceremonien auffzu  
dringen / vnd listig beizubringen / vn  
ter einem schein / Einigkeit mit vns zu  
treffen / vnd zu machen / So solten wir  
vns als den ja wol vnd fleissig fürsehē  
Sintemal sie gewislich vnter diesem  
heuchlischen / Sophistischem fürge  
ben / etwas verdeckts vnd mehrers im  
willen hetten.

**D**ieses alles hat man mit wol  
bedachtem Rathschlag / Da  
Lutherus noch lebete / Vnd al  
lenthalben guter Fried war / Auch  
das vngewor Interim noch nicht ge  
schmidet /

## Widerlegung der

schmidet / besonders vnd öffentlich in einmütigen Consens mit vnerschrockenem Hertzen / vnd mit ronden duren Worten auff's aller bestendigst gehandelt / Auch dasselbige also ans Liecht vnd in Druck bracht / Auch in den Büchern / darinnen der gantze Deubtgrund Christlicher Religion zusammen gezogen ist / Als da gehandelt wird von den Ceremonien in der Kirchen / Vom Ergernis / Von der Christlichen Freiheit / vnd desgleichen etc. Vnd war damals jederman dazu wol behertzet.

Nach dem aber die Verfolgung sich sehen ließe / Vnd nu mit gewalt einbrechen wolte / Da siele man von der vorigen Lere / Bedencken vnd rath schlegē ab / Ließe es alles / so zuuor aus gutem grund göttliches Worts wol geleret vnd berathschlagt war / schendlich fallen / Sucht vnd erdacht newe / scheinliche / vnd zur selbigen zeit angeneme Wege vnd Kenccke /

aus

aus Gottes Wort / sondern aus lauter  
 Philosophischer / weltlicher / vnd  
 vernünfftiger Witz genommen / Vnd  
 dieselben zu bekräftigen / würden viel  
 trewer Lerer / auch vmb eines Cor-  
 rocks willen veriaht vnd vertrieben /  
 Weil sie mit Gottes wort beharrlich /  
 diesen newen Handlungen sich wie-  
 dersetzen.

Man lies es auch / bey diesen ge-  
 schwinden Rathschlegen nicht bleibē /  
 Sondern dieweil die fürnemsten The-  
 ologen / auch darein willigten / vnd  
 Ja dazu sagten / Erfolget so bald eine  
 neue Kirchenordnung / Die ward an  
 allen orten mit Befelß angeschafft /  
 verkündigt / Vnd darinnen wurden  
 nicht allein geringe vnd leidlige Ce-  
 remonien / Wie sie denn inen zum  
 glimpff / diese gottlose Vergleichung  
 pflegen zu entschuldigen / Das es nur  
 vmb einen Chorrock zu thun seie / Son-  
 dern der gantze helle Hauff der Pa-  
 pistischen Ceremonien / vnd schend-  
 liche

## Widerlegung der

liche Verfelschung / wider anzuschaffen ernstlich geboten.

In diesen Geboten / funden sich auch feuberlich / das Bulen vnd rath schlagen / mit den offentlichen feinden des Euangelij / Vnd denn offentliche Zeichen / dabey man wol spüren vnd mercken kundte / Das durch diese geringe Linderung / ein voller vnd freier Eingang / den Feinden eingereumet / Vnd das mit diesem wancken vnd nachhengen gesucht wurde / Wie man auch in wichtigen stücken / mit dem vngehewren Antichristo / möchte einig vnd gar vertragen werden.

Auch wurden allenthalben vmb getragen / Vnd den einfeltigen Pfarrherrn fürgehalten etliche Briene / vermanungen vnd bedenccken / vnd etliche öffentliche Schrifften / vnter der Gelehrten Namen / Darinnen eben dergleichen geracht ward / Das die pfarrherr sich wider diese Dienfbarkeit /  
vmb

vmb Friede willen / in solchen Ver-  
gleichungen in den nichtigen vnd euf-  
serlichen Mitteldingen / nicht solten  
hefftig / noch halstarrig widersetzen.

Da lobet man vber die mas die  
jeningen / Die solche weltliche Anschle-  
ge billichten vnd anrichten / Als für  
friedliebende / verstendige / vñ glimpff-  
liche feine Menner. Welche aber das  
Widerspiel theten / Die würden als  
haderhafftige / freneliche / trutzige  
Stürmer vnd Polterköpff / abgesetzt /  
vnd inen das Küethor gewiesen.

Vnd das in diesem schweren Dana-  
del das ergste ist / So ward kein grund  
des fürnemens aus Gottes Wort ge-  
zeigt noch gewiesen / Sondern damit  
man gleichwol den Einfeltigen ein  
Schein der sachen machet / So nutzt  
man inen die Befehrligkeit / so sonst  
erfolgen möchte / hoch auff / Dielt  
inen für / der grossen Theologen anse-  
hen / Vnd das die Fürnemsten allente-  
halbem

R

halbem

## Widerlegung der

halben es mit jnen in gleicher Mei-  
nung billichen / vnnnd hielten. Dazu  
wurden den Einfeltigen die Augen  
mit geschwinden listen gehalten / Das  
sie des Zulens vnd vergleichens mit  
den offenen Feinden / nichts vnd für  
gering achten / schlugens in Wind /  
Vnd liessen es also gehen vnd gesche-  
hen / Vñ hette jederman das im maul /  
Man müste eine feine Ordnung ma-  
chen vnd anrichten in der Kirchen / Vñ  
es nicht alles so gar hinwerffen / was  
die Alten vorlengst mit so grosser An-  
dacht gestiffet hetten / Gleich als we-  
ren unsere Kirchen / für der zeit / in et-  
ner eiteln Barbarey / on alle Ordes-  
nung gewesen / Vnd darumb nicht /  
one wichtige Ursachen / verfolget wor-  
den.

Vnter des wer bey der reinen an-  
gerichten Wahrheit gedacht zu behar-  
ren / mit vnwanckendem beständigem  
Bekentnis / vnangesehen / wie viel sie  
bey der Kirchen erlitten vñ ausgericht  
hätten

hätten / Die wurden weder getröstet  
noch geschützt / Sondern dieweiles  
alles dahin gerichtet / das man den  
Feinden alles zu wolgefallen wolte  
hofiren / wurden sie auff's eusserste bes  
trübt vnd geplagt.

Wenn sie aber von jemand irer vor  
rigen Rede vnd Bedencken erinnert  
wurden / Dadurch sie die Fürsten vnd  
Oberkeit / viel anders vnterricht het  
ten / Das köndten sie doch gar in gut  
nicht auffnehmen / Derhalben erdacht  
ten sie nicht allein newe Ferblin / Das  
mit sie sich möchten behelffen / Vnd  
gaben für / Man müste die vmbstende  
der zeit betrachten / Vnd auff die künff  
tige Gefehrlichkeit acht geben / Vnd  
was sonst erfolgen möchte / So wes  
ren die Feinde listig / vnd vns viel zu  
mechtig etc. Sondern alle die jnen das  
wehreten vnd widerrieten / Die zogen  
sie durch die Wechel / mit vntreglich  
em schenden vnd schmehen / Vnd rich  
teten sie auff's feindlichst schendlich  
vbel aus.

K ij

Das

## Widerlegung der

Das alles ist eigentlich nach er-  
öffnung des Interims so bald erfol-  
get/ vnd also ergangen/ Vnd ist das  
wol zu erbarmen/ das man noch heu-  
tigs tages fortferet/ vnd allerley men-  
schliche verblümte Kencck erdencet/  
Das grosse Vnrecht zu schmücken/  
ferben/ verteidigen vnd entschuldig-  
gen/ Gleich als hette mans gar seer  
wol getroffen vnd ausgericht/ Vnd  
das das aller beste vnd rechte Meister-  
stück in diesem gantzen Abfall ist/ So  
werffen sie die schuld alle des gewirres  
Vnrhu/ Dadders/ vnd Ergernis/ der  
lieben Kirchen/ gantz vñ gar auff die/  
Welche in jr gottlose newe Wendel  
nicht haben willigen/ noch dieselben  
annemen wollen/ Sondern haben sich  
viel mehr mit Schrifften/ starckem  
Einer/ vñ aus Gottes wort bestendig/  
dawider gewehret/ vnd auffgehalten.

**A**ber können nu alle verstend-  
ige/ rechtschaffene vnd guther-  
tzige

tzige Christen / wol abnehmen / Was  
 vns verursache / diese Adiaphoristis-  
 sche heuchelische Durerey / nicht aus  
 gefassem Neid / oder mutwillen / Son-  
 dern aus hochwichtigen vnd vn-  
 vermeidlichen Ursachen / zu widerles-  
 gen vnd anzusechten. Aber vber das  
 wollen wir nochetliche andere vrsach-  
 en erzelen / Durch welche solche gott-  
 lose Vergleichung mit dem Antichrist  
 deutlich verlegt werden.

## I.

**N**ad erstlich / Stehet der aus-  
 drücklich klare Befehl Christi  
 da ( mit welchem stimmē auch  
 die heilsamen Bedencken / zur zeit Lus-  
 theri des Mans Gottes gemacht / da-  
 von jtz gesagt ) Der vns alle gemein-  
 schafft mit den frenelichen vnd halstar-  
 rigen Feinden verbent / Vnd erfodert  
 dagegen von vns auff's ernstlichst fes-  
 ste bestendigkeit in der Ansechtung vñ  
 gefahr / Das Euangelium frey offent-  
 lich

## Widerlegung der

lich vnd vnerschrocken zu bekennen / on  
einiges wancken oder mucken / Matt.  
10. Marci 8. vnd 2. Corinth. 6. Ziehet  
nicht am gottlosen Joeh etc.

## II.

**Z**um andern / Vber das / so wis-  
sen alle frome hertzen / Das man  
für allen dingen / die lieben nach  
komen / hie von am meisten bedencen  
mus. Als die es am aller meisten an-  
trifft / vnd vmb die es fürnemlich zu  
thun ist. Denn da man so gar dazu  
wolte stillschweigen / Würde der treff-  
lichen vnd ansehenlichen Leute sched-  
liches Exempel / zur Regel vnd nach-  
folge werden / Wie denn gemeinig-  
lich pflegt zu geschehen / Das wenn  
zur nachkomender zeit sich eine Verfol-  
gung würde erheben / So möchten  
sie ja so wol in eine solche leichtfertige  
vnd liederliche vnbeständigkeit gera-  
ten / des heiligen Euangelij Wahrheit  
zuuerleugnen / vnter dem schein / Es  
weren

were[n] doch nur Mittel vnd vnnöthige  
ding/ Die des streits vnd der Gefahr  
nicht werth were[n]. Derhalben könd-  
te man wol / one verletzung[e] der Ge-  
wissen/ sich mit den Feinden vnd auch  
Weltweisen vergleichen vnd einlassen.

## III.

**U**m dritten. Man mus auch  
den trotzig[en] vnd offentlichen  
Feinden / Die sich vmb des Ad-  
iaphoristischen heuchelischen Zu-  
falls halben / eines gewissen Siegs  
vermessen/ Vnd auffrichtung irer Ab-  
götterey verhoffen / widerumb frey  
offentlich in das Gesicht treten/ Vnd  
sie sehen lassen/ Das jm Gott noch  
einen heiligen Samen vnd Gottselige  
hertzen vberig bewaret vnd erhalten  
hat/ Die ire Bnie für dem teuflischen  
Baal nicht gebeuget/ noch des Thiers  
Malzeichen angenommen haben.

X iij

Auff

## Widerlegung der

**V**ff das aber solchem grossen Unglück der Irrthum vnnnd Ergernis eigentlich möchte abgeholfen werden / Vnd aus der Kirchen Gottes gestossen / So ist nötig / Das man der folgenden Regel vnd Condition mit vleis warneme.

### I.

**E**rstlich / Das die obersten Meister dieser Bedencken / Durch welche die Kirche also verwirret vnnnd betrübt worden ist / erinnert werden / Desto fleissiger zu trachten / Wie doch solchen Wunden möchte geholfen vnd heilsame Ertzney geschafft werden / Das sie doch endlich diese inwendige schedliche Gezenck zwischen jnen vñ vns / durch jr Hincken vnd wancken verursacht / hinzulegen vnd abzuschaffen / nicht so beiffige / zenckische / verbitterte vnd argwönige Wertzzen / wider vns behielten. Denn sie achten es jtz dafür / Dieweil wirs erstlich

erstlich mit inen nicht gehalten / Vnd  
 jetzt dazu nicht stillschweigen / Darz  
 umb stehe all vnser thun dahin / Sie  
 nur zu vnterdrücken / vnd vmbzubrin-  
 gen. Derhalben möchten wir wol lei-  
 den / das sie auffrichtig / one argwon  
 die Sachen für die hand nemen / vnd  
 sehen / wie doch dieselben zwischen  
 Vns / zu einer heilsamen warhafftigen  
 vnnnd beständigen Einigkeit möchten  
 gebracht werden / zur ehre Gottes / vñ  
 der Kirchen Wolfart. Vnd das künd-  
 te auff keine bessere weise geschehen /  
 denn wenn sie ire Schwachheit frey  
 öffentlich bekenneten / Vnd die sched-  
 lichen Verfelschung / Vergleichung /  
 vnd Adiaphoristische Dencheley mit  
 den Feinden / Dadurch sie der Kirchen  
 Christi mercklichen schaden gethan  
 haben / Durch eine öffentliche Wider-  
 legung frey selbs verwürfften vnd ver-  
 damneten.

Denn mit diesem irem halstarriz-  
 gen vnd Sophistischen verteidigen /

K v

Nuch

## Widerlegung der

Nuch mit verdammung derer / so bey  
rechter Lere selbs bestendig / Vnd an  
dern / das sie auch dabey bleiben / rie  
ten vnd vermaneten / machen sie des  
Zancks nicht allein noch teglich mehr  
Sondern bringen sich in Gottes zorn/  
vnd zu endlichem verderblichen scha  
den / Wie Isai. am 5. sagt / Wehe de  
nen / die böses gut / vnd gutes bö  
s heissen etc.

## II.

Im andern / so mus man auch  
für allen dingen / das fleissig ver  
tomen / Das das Euangelium  
vnd menschliche Weisheit / alle weg  
wol vnterscheiden bleiben / Vnd nicht  
vermenget werden / Wie eben zu jenem  
mal geschehen ist. Denn wo das E  
uangelium das frey bestendig Bekent  
nis erfoddert / für Keiser / Königen  
vnd Fürsten / Da sucht im menschliche  
Weisheit allewege heimische vnters  
schleiff

schleiff vnd allerley behelff / wie sie sich on öffentlich bekennen möchte / für Gefahr bewaren vnd auswircken / Welchs denn nicht ein geringes Laster / Sondern eine öffentliche Feindschafft ist des Crentzes Christi / Gal. 6.

## III.

**U**im dritten / Auch mus der Kirchen jr Freiheit als das Deubtsstück / vnd die Summa der ganzen Christlichen Lere vnbenomen / vnd alle zeit fürbehalten / Vnd die einzeltigen wol vnterrichtet werden / das alle Kirchensatzung / vom Pappst ertichtet / Wenn sie der meinung fürgenomen oder getrieben werden / Als seien sie nötige vnnnd nützliche ding / Das man sie erger denn Schlangen vnd schedliche Giffit meiden vnd fliehen mus / Sonderlich / wo die Feinde das Euangelium verfolgen.

Zum

## Widerlegung der

### III.

**V**Im vierdten. Vnd wie offft sichs  
begibt/ Das man mit den Wi-  
dersachern handeln mus / Das  
man ire hemische / tückische vnd fals-  
sche Verwenunge/ Damit sie viel plau-  
derns treiben/ von bestendigem Fried/  
einigkeit/ freundschaft/ vñ dergleich-  
en/ gantz vnd gar fallen lasse/ Vnd  
jnen hierinnen gar nichts trawe/ Sich  
auch Kriegs vnd gefehrlichkeit halben  
an ir dreyen gar nichts kere/ Auff das  
man nicht / in dem man auff ir fried-  
lich vertrusten ruhe sucht/ die reine Le-  
re in gefahr vnd Verfelschung bringe  
oder stercke / Vndd sich dadurch der  
Dienstbarkeit der Papistischen Tyran-  
ney vnterwerffe.

### V.

**E**ndlich. Diervail Gott nicht als  
lein ein offentlich frey Bekent-  
nis von vns foddert/ Sondern  
wil

wil auch haben / Das man alle Irrthum verdamnen vnd verwerffen solle / Vnd die Adiaphoristerey voller irrtum ist / Vnd nicht allein von der Augspurgischen Confession / Sondern auch gantzlich von allen Christlichen Bekentnis abgetreten vnd abgewichen / Also / das es anders nichts ist / denn als eine lauter Verleugnung / aus furcht der Verfolgung / für die hand genommen / So mus sie auch / vmb der ehre Gottes vnd der Kirchen Weil willen / öffentlich gestrafft / vnd aus der Kirchen weggeworffen / Vnd die fromen / für dergleichen Krenerey gewarnet werden.

Denn alle die jenigen / Die dazu stillschweigen / oder mit listigen geschwinden Ferblin dieselben verblümen / Die machen sich frembder Sünden teilhaftig / Verkleinern die Augspurgische Confession / Die zur zeit der höchsten Verfolgung / den Feinden entgegen ist gesetzt / Vnd machen aus  
 vnsern

Widerlegung der  
vnserm Christenthum / ein lauter La-  
picurisch / sicher Leben / Vnd versen-  
cken die jenigen / so sich mit der Baby-  
lonischen Zulerey verunreinigt ha-  
ben / in schreckliche Unbusfertigkeit.

**B**is diesen vnd dergleichen wich-  
tigen Ursachen / sind wir getrie-  
ben vnd bewegt worden / Vns  
wider die Adiaphoristerey zu legen /  
Vnd vns von derselben Verteidigern  
abzusehern / Bis so lang sie durch  
beständiges vnd öffentliches Wider-  
legen verdampt / Vnd aus der Kirchen  
Christi veriaht vnd ausgerottet wir-  
det.

Wir wolten aber nichts liebers/  
Begern es auch / vnd wünschens von  
gantzem Hertzen / Das die anfeng-  
lich die Adiaphoristerey herfürbracht  
vnd erstliche geraten haben / Vnd da-  
mit durch jr Ansehen vnd treiben / das  
einfeltige Volck Gottes betrübt vnd  
zu sündigen verursacht / oder wie die  
Schrift

Schrift redet/haben Israel sündigen gemacht/ire Irrthum ernstlich erkennen/ Vnd zu gleich von irem schmehen vnd vnbilllichem lestern/ Auch von der Verfolgung wider die gottseligen Leute/ so für der Verfelschung vnd vergleichung wol vnd Christlichen gewarnet haben/ abliessen vnd auffhörtten/ Vnd dafür mit einmütigen zengnis vnd arbeit / des D<sup>n</sup> Ern Christi Kirchen von dieser vñ andern erschrecklichen Irrthumen hülffen erledigen. Denn auff diese einige weis / kündten diese inheimische Gezenck auffgehaben/vnd der Widersacher mitwillige Gewalt gedempfft vnd abgeholfen werden / Auch der Kirchen wider zu irem rechten vorigen Stand geholfen/ Vnd der beständige/ allgemeyne Fried vnd ruhe herwider bracht vnd angeschafft werden.

Gemeiner

Gemeiner Beschluß des ganken

**Gemeiner Be-**  
schluß des ganken Wercks/  
durch die Theologen gestellt.

**D**IESEN erzelten  
vñ widerlegten Sec-  
ten erscheinet Kler-  
lich / Wie gewaltig  
vñnd geschwinde der  
leidige Satan sich  
vnterwinde / das hel-  
le Liecht des seligmachenden Euan-  
gely auszuleschen / Welchs der trewe  
vñd gütige Gott / aus vnansprech-  
licher Liebe gegen vns / auff die ver-  
damliche Finsternis des Papstums  
hat angezündet / Damit er vns gegen  
dem herrlichen grossen tage seines  
Sons bereitete / Vñd sonst auch in die-  
sen erschrecklichen Leufften tröstet  
vñd stercket im Glauben / Hoffnung  
vñd

und Gebet/Dadurch wir vns an Chri-  
stum/als vnsern einigen Fels vnd An-  
cker/wider alle vngestümmigkeit hal-  
ten / Vnd in nicht anders auffwecken/  
als die Apostel / da sie mit im Schiff  
vnd in mitten in der grösten Gesehr-  
ligkeit anruffen.

Aber der Satan / Damit er vns  
solchs Trosts gantz entblösse gegen  
dem Jüngsten tage / vnd allem Un-  
glück wehrlos mache / Vnd die Welt  
auffs aller tieffeste in Sicherheit ver-  
sencke / drücket darumb die Warheit  
so gewaltig vnter/Vnd beritet seine ver-  
damliche Lügen aus/durch so mancha-  
feltige vnd scheinbarliche Kotten vnd  
Secten / Vnd gebraucht dazu anse-  
henliche Leute / Nicht allein aus dem  
Papisten / Sondern aus vnsern eige-  
nen Schulen vnd Kirchen / Das sie  
herfür schleichen / wie die tückische  
vnd schedliche Füchse/vnd verwüsten  
den Weinberg des HErrn.

S

Über

## Gemeiner Beschluss des gantzen

Über solche Klage am aller hefftigsten der heilig Geist im hohen Lied Salomonis / vnd spricht / Sahet die Füchse / die kleine Füchse / die den Weinberg verderben etc. Nicht on vrsach nennet er sie nicht Wolffe ( wie sie doch in Wahrheit auch sind ) Sondern die Füchse / ja die kleinen Füchse. Denn es scheint / als thun sie wenig schadens / Können auch selbs iren irthumb meisterlich entschuldigen / vnd den Leuten einbilden / als sey es nicht werth / einiges zanccks vnd widerrede / Wenn man sie aber recht beim Liecht ansihet / So sind sie viel schedlicher / denn die öffentlichen Wolffe / die Pastoren selbs. Denn dieselbige sind so grob vnd augenscheinlich an den tag gebracht / Das sie sich weiter mit keinem Schein schmücken noch decken können / Sondern leichtlich von jedermaniglich / als feinde Gottes vnd der Kirchen erkand vnd vermieden können werden.

Aber

Aber die Kotten vnd Secten sind die allerschedlichsten / Sintemal sie ihren wandel vnd wesen mitten in vnsern Schulen vñ Kirchen führen / nicht als schlechte gemeine Brüder / Sondern als die fürnemsten vnd fürngenger / Die so viel in der Kirchen geschriben vnd gethan / Das sich niemands einiges Irrthums zu ihnen versehen kan. Ober solche klagt auch der heilig S. Paulus Actor. 20. Da er zwar die Wolffe erstlich vorher setzt / vnd spricht / Ich weis / das nach meinem Abschied gewuliche Wolffe werden vnter euch komē / Die der Herde nicht verschonen werden etc. Aber bald setzt er auch die Secten hernach / Als die listige vnd allerschedlichste Füchße / vnd spricht / Ja aus ewrem Mütel selbs / werden Menner auffstehen / die verkerete ding leren werden / das sie die Jünger nach sich ziehen etc.

S ij Mit

## Gemeiner Beschlus des ganken

Mit diesen Worten werden eigent-  
lich vnd fürnemlich gemeint / die jeni-  
gen / Welche in der Kirchen Gottes  
oben ansitzen / Als die fürnemsten Le-  
rer / Vnd massen sich solcher Autoritet  
an / Das / ob sie gleich irren / vnd von  
der Wahrheit abweichen / sol jnen doch  
niemand widersprechen.

Solche Ansehung der Personen/  
ist die aller schedlichste Plage in der  
Kirchen Gottes / Vnd so ein hoher  
Berg / das vielen Leuten vnmüglich  
ist / drüber zu springen / Vnd mus doch  
gleichwol geschehen von allen die vn-  
nerfüret wollen bleiben / Wie allent-  
halben die Schrifft so ernstlich dafür  
warnet / Als S. Paul Gal. 1. So auch  
ein Engel vom Himmel ein ander Euan-  
gelium prediget / der sey verflucht /  
Item Matth. 23. Ir solt euch nicht  
Rabbi nennen lassen. Denn einer ist  
ewer Meister / das ist / Christus der  
HERR

Herr etc. Item / Matth. 5. So dein  
 Flug (vernum dein Lerer) dich ergert /  
 So reisse es aus / vnd wirffs von dir  
 etc. Item Deut. 33. Wer zu seinem Va-  
 ter vnd zu seiner Mutter spricht / Ich  
 sehe in nicht / Vnd zu seinem Bruder /  
 Ich kenne in nicht / Vnd zu seinem  
 Son / ich weis nicht / Diese halten  
 deine Rede / vnd bewaren deinen  
 Bund / Die werden Jacob deine rech-  
 te leren / vnd den Israel den Gesetz  
 etc.

Derwegen wil vns von nöten  
 sein / Das wir nach laut der verma-  
 nung Christi Matth. 10. (Seid einfelt-  
 zig wie die Tauben / vnd Flug wie die  
 Schlangen) vnser Einfalt gleichwol  
 mit solcher Klugheit temperiren vnd  
 messigen / Das wir vmb keiner Per-  
 sonen Ansehen willen / die Lügen an-  
 nemen / Noch die Wahrheit vmb vnanz-  
 sellicher geringer Person willen ver-

S ij achten

## Gemeiner Beschluss des gantzen

achtē/ sondern die vnleugbare warheit  
des seligmachenden Euangelij / durch  
den thewren Man Gottes / Doctor  
Luthern/ aus Prophetischen vnd A-  
postolischen Schrifften vns offenba-  
ret vnd an tag gebracht / Vnd wider  
des Teufels vnd der Welt danck vnd  
willen erkleret hat / mit aller demut  
hören vnd annemen / Gott gebe wie  
wenig vnd gering die jenigen sind/ Die  
es vns lauter vnd vnuerfelscht fürtra-  
gen/ Lassen vns auch nicht anfechten/  
Wie gros vnd viel der jenigen sind/ die  
es felschen vñ verleugnen/ oder dauon  
abweichen.

Dieher gehört auch der Spruch  
Christi Matth. 24. Da er nach viel er-  
zelten zeichen des Jüngsten tages vnd  
vorgehenden Secten / endlich zum  
Beschluss also spricht/ Wo ein Aßs ist/  
da versamen sich hin die Adler etc.  
Mit welchen worten er zuuerstehen  
gibt/ Das auch für dem Jüngsten ta-  
ge / mitten vnter den Secten / Da es  
alles

alles durch einander gehen wird / den  
 noch jemerdar zum wenigsten etliche  
 bleiben werden vnter den lérern / Wel-  
 chen Gott durch den heiligen Geist /  
 ein rechts Adlers gesicht geben wer-  
 de / Das sie die Irrthumen werden  
 mercken vnd prüfen / Darnach auch  
 vnter den Zuhörern / die nach dem ge-  
 tödten vnd gecreutzigten Christo / im  
 lantern Euangelio fürgetragen / wer-  
 den hungern vnd dürsten / Als die hun-  
 gerige Adler nach ein Afs / Vnd sich  
 kein Gewalt lassen dauon abtreiben.  
 Solch des Adlers scharffsichtigkeit /  
 alle Irrthum zu erkennen / vnd solch-  
 en vng gehaltenen vnsettigen Dungen /  
 Zu der lantern Lere des Euangelij /  
 wölle vns Christus der ewige Son  
 Gottes geben / mehren vnd erhalten /  
 Welchem sampt dem Vater vnd dem  
 heiligen Geist / Als vnserm einigen  
 waren Gott / sey Lob / Ehr vnd preis /  
 von nu an bis in Ewigkeit / Amen.

S iij ~ Beschlus

Beschlus.

# Beschlus.

**D**ieweil denn an die-  
sem allen / Sonder-  
lich zu Erhaltung  
Gottes Worts vnd  
der reinen Lere des  
heiligen Euangelij/  
Welche durch die an-  
geregten Secten vnd Irrthumen / zu-  
nerfelschen vnd zuuerdrücken / vnter-  
standen / trefflich gros / viel vnd hoch  
gelegen / So haben wir obgedachter  
Herzog Johans Fridrich zu Sachs-  
sen der Mittler etc. für vns selbs / Vnd  
von wegen vnser freundlichen lieben  
Brüdere / hiemit ernstlich euch obge-  
melten vnsern / vnd irer Liebden Un-  
terthanen vnd Verwanten (denen wir  
Fürstlichs Ampts halben solchs zu  
thun / vns schuldig erkennen / Als wel-  
che Gottes wort vnnnd die reine Lere  
von

von hertzen lieben vnd meinen / Vnd  
 sich wissentlich dauon nicht gerne ab-  
 füren lassen wolten) mit berürter Con-  
 futation nicht wenig gedienet zu sein/  
 erachtet. Zu dem / das auch nicht als-  
 lein die vnsern / Sondern auch die  
 Frembden vnd Auswertigen / welch-  
 en es geliebt vnd gefellet / Vnd die es  
 solcher gestalt / wie es von vns Christ-  
 lich / trewlich / vnd wol gemeinet / zu  
 danck annemen vnd erkennen / hie von  
 in gleichnis bericht / vnd wissenschaftt  
 empfahen / Vnd also die gesunde rei-  
 ne Lere / inhalt der Augspurgischen  
 Confession / Apologien / vnd Schmal-  
 kaldischen Artikeln / von den Secten  
 vnd Irrthumen sondern vnd scheiden  
 mügen .

Vnd demnach für vns selbs / vnd  
 von wegen vnser lieben Brüdere / son-  
 derlich aber auff vieler guthertzigem  
 bey vns vnterthenigs beschehen ersu-  
 chen vnd bitten / nicht zu vmbgehen  
 S v wissen/

## Beschlus.

wissen / Dieselb Confutation vnter  
vnserm Namen hiemit öffentlich an  
tag zu geben / vnd ausgehen zu lassen.

Doch allein vnd anders nicht /  
denn wie angezeigt / auch Christlicher  
guter wolmeinung / vnd vmb erhal-  
tung / förderung vñ ausbreitung wil-  
len Gottes reinen Worts vnd heiligen  
Euangelij / Auff das der Secten vnd  
Irrthumen / verfelschungen in Got-  
tes Wort / vnd der reinen Lere geoffen-  
bart / erkand / Vnd sich meniglich dar-  
für habe vnd wisse zu hüten.

Aber für vnser Person wollen vñ  
wissen Wir hiemit Christlichen Ober-  
keiten kein Ziel oder mas zu setzen vnd  
zu geben / Sondern dieselben werden  
sich zuuersichtig Gottes Wort vnd E-  
uangelio nach / allenthalben zu halten  
wissen. Vnd nicht verhängen noch ge-  
statten / da einige Secten / Irrthu-  
men vnd verfelschungen dawider vn-  
ter jnen

ter inen entstanden weren/ oder noch  
 mals entstehen möchten/ Das diesel-  
 ben geduldet vnd gelitten/ Sondern  
 gantzlich verworffen werden. Des  
 gleichen vnser Christlich Gemüt vnd  
 neigung/ dahin verstehen vnd vermer-  
 cken / Das wir nichts liebers wolten/  
 denn das Gottes Wort / vnnnd heilig  
 Euangelium / nach ausweisung vor-  
 berürter Augspurgischen Confession/  
 Apologien / vnd Schmalkaldischen  
 Artikeln / durch seiner Allmechtigkeit  
 hülff / rein / lauter / klar vnd vnuerfel-  
 schet möcht erhalten / Vnd nach sei-  
 nem Willen weiter auch bracht vnd  
 gepflantzet werden.

Dierauff / Euch allen vnsern / vnd  
 vnser lieben Brüdere vorgebant vn-  
 terthanen vnd Verwandten / semptlich  
 vnd sonderlich / für vns selbs / vnd  
 von wegen jrer Liebden / Diemit gne-  
 diglich vnd ernstlich gebietend vnd be-  
 felhend / Das sich ewer jeder Got-  
 tes

## Beschlus.

tes Wort / vnd dem heiligen Euange-  
lio / Auch den gemelten Confutation  
gemies / vnd anders nicht / allenthal-  
ben halten vnd erzeigen sol / Bey ver-  
meidung vnser vnd irer Liebden ernstler  
Straff vnd vngnad.

In dem allen geschicht / one zwei-  
nel / Gott dem Allmechtigen ( des  
Wort vnnnd Euangelium der gestalt  
rein vnd vnuerselcht bleibet / erhalten  
vnd gefördert wird) ein wolgefelliges  
Christlichs / angenehmes vnnnd gutes  
werck / Vnd gereicht zu eins jeden selbs  
Seelen Weil vnd ewiger Seligkeit /  
Auch vnser vnd vnser lieben Brüdere  
gantzliche zuuerlessige vñ gefellige  
meinung. Geben in vnserer Eh-  
tenburg zu Coburg / den 28.

Nouembris, Anno Do-

mini M. D.

LVIII.

iger  
tion  
hals  
ver  
nster

zwei  
des  
stalt  
alten  
iges  
ntes  
elbs  
zeit/  
dere  
ige  
s

Gedruckt zu Thena durch  
Thomam Nebart.



Handwritten text, likely bleed-through from the reverse side of the page. The text is faint and difficult to decipher but appears to be arranged in two lines.








50003

X 2198273

13.



wie der Poet sagt *Nihil a me dictum sit prius.*  
Nach dem befehl des heiligen Apostels Pauli/  
*Oportet Episcopum non esse nouitium.*

Vnd bitte den lieben Gott, das er mich in seiner  
Göttlichen warheit bestetige / vnd durch seinen  
heiligen Geist / also hinfort wölle leiten, das ich  
ja nichts schreiben oder leren müge / on was ich  
mit den Schrifften der lieben Propheten/  
Euangelisten / Aposteln / vnd alle Christ-  
lichen warhaffteigen Schrifften der  
Väter vnd bewerten Theologen/  
erhalten vnd beweren könn-  
ne / Amen.

\* \*

\*

*Exulat charitas ubi periclitatur fides.*

Des Durch:

2

leuchtigen Hochgebornen  
Fürsten vñ Herrn / Herrn Johans  
Friderichen des Wittlern / Hertzo-  
gen zu Sachsen / Landgrauen in Düringen/  
vnd Marggrauen zu Meissen / für sich selbs/  
Vnd von wegen seiner F. G. Brüdere / Herzog  
Johans Wilhelmen / vnd Herzog Johans Fri-  
derichen des Jüngern zu Sachsen etc. in Got-  
tes wort / prophetischer vñnd Apostolischer  
Schrift / gegründete Confutationes / Widerles-  
ungen vnd verdammung etlicher ein zeit her/  
zu wider demselben Gottes wort / vnd heilige  
Schrift / auch der Augspurgischen Confession  
Apologien / vnd den Schmalkaldischen Artic-  
keln / Aber zu färdern vnd wider anrichtung

